

JNUHUN VAHA NI TEE SAN MATEO

*Lista ñayuu yucūn jeē ní quiji Jesucristo
(Lc. 3.23-38)*

¹ Yāha cúu lista ñayuu yucūn jeē ní quiji Jesucristo. Te máá yá ni quiji nuū yucūn rey David, te David ni quiji nuū yucūn Abraham.

² Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jíin táca ñani i. ³ Te Judá ni cuu de tátá Fares jíin Zara, te náná ndindúú i ni cuu Tamar. Te Fares ni cuu de tátá Esrom, te Esrom ni cuu de tátá Aram. ⁴ Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón. ⁵ Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí. ⁶ Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xīhna gā ni cuu ña ñasihí Urías.

⁷ Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa. ⁸ Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías. ⁹ Te Uzías ni cuu de tátá Jotam, te Jotam ni cuu de tátá Acaz, te Acaz ni cuu de tátá Ezequías. ¹⁰ Te Ezequías ni cuu de tátá Manasés, te Manasés ni cuu de tátá Amón, te Amón ni cuu de tátá Josías. ¹¹ Te Josías ni cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

¹² Te náa cáyūcú i yūcuán, te Jeconías ni cuu de tátá Salatiel. Te Salatiel ni cuu de tátá Zorobabel. ¹³ Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor. ¹⁴ Te Azor ni cuu de tátá Sadoc, te Sadoc ni cuu de tátá Aquim, te Aquim ni cuu de tátá Eliud. ¹⁵ Te Eliud ni cuu de tátá Eleazar, te Eleazar ni cuu de tátá Matán, te Matán ni cuu de tátá Jacob. ¹⁶ Te Jacob ni cuu de tátá José, tēe ni cuu ȳh María. Te María ni cuu ña náná Jesús, Yaā naní Cristo.

¹⁷ Te nde Abraham te nde David ni ĩyo uxī cuūn yucūn. Te nde David te nde náa cuangoo ñayuu Israel preso ñuu Babilonia ni ĩyo inga uxī cuūn yucūn. Te nde ná ni jengoo i preso te nde ni cacu Cristo, suni ni ĩyo inga uxī cuūn yucūn.

*Jeē ní cacu Jesucristo
(Lc. 2.1-7)*

¹⁸ Te jeē ní cacu Jesucristo, súcuan ni cuu: Náná yā María, je ni cundaā jeē quijnáhan ña jíin José. Te nde ná tu quijnáhan ña jíin de, te ni jecūhun séhe ña ni sáha Espíritu Santo. ¹⁹ Te José, tēe quijnáhan ña jíin, chi tēe ndaā cúu de. Te tu ní cúní de cuāha de jnūhun canu ña, chi sa cúní de jeē na jécuiñī sāhi jēē ma quijnáhan de jíin ña. ²⁰ Te níní súcuan nácani ni de, te jíin jéni ni quee-ni ñn ndajéhé maá Jítóho yō Yaā Dios nuū de, te ni cahān yā jíin de:

José, séhe yucūn David, ma yūhu ró cueca ró ñasihí ró María, chi séhe jeē scácu ña, vēji i nde nuū maá Espíritu Santo. ²¹ Te scácu ña ñn séhe yí. Te snání ró i Jesús, chi máá i cúu Yaā jnama ñayuu nuū cuéchi i, áchí ndajéhé.

22 Súcuan ni cuu tǎcá jniñu yáha, návāha squícu jnūhun Jitoho yō Yaā Dios jeē ni cáhān tēe ni nacani jnūhun ya nde jenahán. Te suhva ni cahān de:

23 Coo ñn sūchi sǎhí, te nihīn séhe i,
te scácu i ñn sēhe yí,

te conaní sūchí un Emanuel.

Achí tutu. Te sǎhví yáha cúní cahān: Yaā Dios ndeé yá jíin yó.

24 Te ni natahū ni José, te ni sáha de nájnūhun ni cahān ndajéhé Jitoho yō jíin de. Te ni jeca de María ni cuu ña ñasihí de. 25 Te tu ní quíxí de jíin ña, chi nde ni scácu ña sēhe yí núú ña. Te ni snaní de i Jesús.

Jeē ní quijicoo tēe mago nuū yā

2

1 Te ná ni cacu Jesús ini ñuu Belén ndañūu Judea, te tiempo un ndácu rey Herodes jniñu. Yūcuán na te jecu tēe ndíchí jeē cascuáha siquī quími, ni quijicoo de nde jicá, ichi nuū cáne niāndii, te ni jinūcoo de ñuu Jerusalén. 2 Te ni cacajnūhún de ñayuu:

¿Ndé nuū íne sūchí jeē ní cacu jeē coo rey ñayuu hebreo? Chi ichi núú cáne niāndii ni cajito ná ñn quími cáhnu jeē cúu seña jeē ní cacu i. Te vējicoo ná chiñúhún ná i, áchí de.

3 Te rey Herodes, ná ni jini de jnūhun yáha, te ni cunéé ni de, nde jíin táca ñáyuu ñuu Jerusalén. 4 Te ni nastútú de táca sūtū cácujuhnu jíin tēe cástéén tutu ley Yaā Dios nuū ñáyuu. Te ni cajnūhún de tēe un ndé nuū cacu Cristo achí tutu. 5 Te ni cacachi nuū de:

Ini ñuu Belén ndañúu Judea. Chi suhva cáhán nuū tútu ni tee tēe ni nacani jnūhun ya nde jehahán:

⁶ Te róhó ñáyuu ñuu Belén ndañúu Judá, cújéhnú ga ñuu rō vēsú tāca gá jeē cujéhnú ini Judá. Chi suu ini ñuu rō quenda in Yaā ndacu jniñu, te coto ya ñayuu maá rí Israel, achí Yaā Dios. Achí tutu.

⁷ Yūcuán na te Herodes ni cana sāhí de tāca tēe ndíchí un jēe naní mago. Te ni cajnūhun yúcún de ndé quívī ní cane quīmī ún. ⁸ Te ni tají de tēe un quíngoo de ñuu Belén. Te ni cahān de:

Cuángoo ní te cajnūhun yúcún ní ndé nuū íne sūchi lúlí un. Te núu ni nanihīn ní i, te quiji-coo ní castūhun ní nuū ná, návāha suni máá ná quichiñúhún ná i, áchí rey.

⁹ Te jeē ní cajini de jnūhun ni cahān rey, te cuangoo de. Te máá quīmī cáhnu jeē ní cajito de ichi núu cáne niāndii, yósnúu núu de cuahān nde ni jinū nuū íne sūchi lúlí un, te yūcuán ní jecuiñī.

¹⁰ Te ná ni cajito de jeē ní jecuiñī quīmī ún, te yōhyo ni cacusī ní de. ¹¹ Te ni jinūcoo de ni quívicoo de ini vehe, te ni cajito de nuū súchi lúlí un jíin náná i María. Te ni cajecuiñī yití de nuū i, te ni cachiñúhún de i. Te ni canune de yejnū de, te ni casocō de oro jíin súje cútú jíin súje uvuā nuū i.

¹² Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanuhun de ñuu de.

Jeē ní jinu José cuangoo de nación Egipto

¹³ Te náa cuánuhun tāca tēe mago, te ni scóto jēni José jeē in ndajéhé maá Jítoho yō Yaā Dios ni cahān yā jíin de:

Ndocuñi te cunu ró quíngoo ró jíin súchi lúli jíin náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchi lúli jíñā jeē cáhni de i. Achí yá.

¹⁴ Te ni natahū ni José. Te cuangoo de jíin súchi lúli jíin náná i, te ñuú ní cajica de cuangoo de nación Egipto. ¹⁵ Te ni coyūcú de yūcuán ndé ni jihī Herodes. Te súcuan ni cuu návāha squícu jnūhun Jitoho yō Yaā Dios jeē ni cáhān tēe ni nacani jnūhun ya nde jenahán: Nde nación Egipto ni cana ri Sēhe ri vēji i, áchí Yaā Dios, achí tutu.

Jeē ní ndacu Herodes jniñu jeē na cúū tāca súchi yí lúli

¹⁶ Yūcuán na te Herodes ni jini de jeē súcuan ni castáhú tēe mago un de, te yōhyo ni quitī ni de. Te ni tají de soldado cuangoo, te ni cajehni tāca súchi yí lúli jéē uú cuiyā jíin jéē yiquín gá jeē cáyūcú ini ñuu Belén jíin tāca ñuu yajni. Chi je ni cajnūhun yúcún de tāca tēe mago un nasaa tiempo ni cuu jeē ní cacu Jesús. ¹⁷ Te súcuan ni squícu jnūhun ni cahān Jeremías, tēe ni nacani jnūhun Yaā Dios nde jenahán, chi ni cahān de:

¹⁸ Ini región Ramá ni jini sōho ri jeē cándahyū te cándahyū cohó. Chi ñahan cácuu yucūn Raquel, cándahyū ña jehē séhe ña, te tu cácumí ña ndusī ni ña, chi ni cajihī i. Achí tutu.

¹⁹ Yūcuán na te ni jihī Herodes. Te ni scóto jēni José jeē ñn ndajéhé Jitoho yō Yaā Dios ni cahān yā jíin de nuū ndeé de nación Egipto. ²⁰ Te ni cahān yā jíin de:

Ndocuiñi te nuhun rō ñuu rō Israel jín súchi lúlí jín náná i. Chi je ni cajihí tēe cánducú cahni sūchi lúlí jínā nuú. Achí ndajéhé.

²¹ Yūcuán na te ni ndocuiñi de, te cuanuhun de nación Israel jín súchi lúlí jín náná i. ²² Te ni nihín de jnūhun jeē Arquelao ni nucuñi de nuū tatá de Herodes, te máá de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quíhín de región Galilea, te cuangoo de. ²³ Te ni jinū de yūcuán, te ni coyūcú de ñuu naní Nazaret. Súcuan ni cuu návāha squícu jnūhun ni cacahān tēe ni canacani jnūhun Yaā Dios nde jenahán. Chi ni cacachi de jeē cahān ñayuu jeē tēe ñuu Nazaret cúu Jesús.

Jnūhun Juan tēe scuándute

(Mr. 1.1-8; Lc. 3.1-9, 15-17; Jn. 1.19-28)

3

¹ Te ni yāha tiempo, te ni jinū Juan tēe scuándute nde nuū ñúhun téhé ndañúu Judea, nácani de jnūhun suhva:

² Nacani ni rō jijnáhan ró jēe stóo ró cuéchi ró, chi je ni cuyajni Yaā ndeé andiví jēe ndacu ya jniñu nuū rō. Achí de.

³ Te Isaías, tēe ni nacani jnūhun Yaā Dios nde jenahán, suhva ni tee de jnūhun Juan nuū tútu:

Coo ñn tēe cana jee nde nuū ñúhun téhé:

Sátūhva ró máá ró jijnáhan ró, chi quee maá Jítóho yō.

Te sáha ró jniñu ndaā, chi vēji ya, achi de.

Achí Isaías.

⁴ Te sahma ñúhun Juan cúu ixi quití nání camello, te núhni ñn cinturón ññ chīji de. Te jeē técu de

cúu táca ndicuéhyí jíin ndúxi yocō. ⁵ Te ñayuu ñuu Jerusalén jíin táca ñáyuu región Judea jíin ñáyuu yúcu yajni yuyúte Jordán, ni quijicoo i nuū de. ⁶ Te ni canacani ndaā i cuēchi i nuū Yaā Dios, te ni scuándute de i ini yūte Jordán.

⁷ Te ná ni jito de jeē véjicoo cuehē tēe grupo fariseo jíin tēe grupo saduceo nuū scuándute de, te ni cahān de jíin:

Va sēhe coō cácuu ró, chi xeēn rō nájñūhun coō. ¿A cájeni ni rō jeē cuu cunu ró cācu ró núū castigo xeēn jeē quíji? ⁸ Núu súcuan te sáha ró jniñu váha, te súcuan stéen rō jeē ní canacani ndije ni rō jeē stóo ró cuéchi ró. ⁹ Te ma cáni ni rō cahān rō jeē cuu cācu ró síquī jeē cácuu ró yúcūn Abraham. Chi cáhān rī jíin ró jeē cuu sáha Yaā Dios jeē táca yūū yáha nduu sēhe Abraham jeē candíje vāha, te núu cúní yā. ¹⁰ Te cácuu ró nájñūhun nundēhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñūhun je íyó túhva ñn cāa jeē cahnde nde yoho yujnu. Núu súcuan te sáha ya jíin ró nájñūhun jíin táca yujnu jeē tu cúun ndehē váha, jeē tahndé te cayū nuū ñuhún. ¹¹ Te ruhū chi jíin ndute scuándute ri rohó, te yūcuan cúu jeē steen rō jeē ní canacani ni rō jeē stóo ró cuéchi ró. Te Yaā jeē quíji, chi nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñuhūn. Te Yaā quíji chi cújéhnū ndasí yá. Chi tú na vé jéhnū cuiñi cúu ri nuū yā, ni jeē cuajniñu ri nuū yā vésú ñn jniñu lúlí gá nájñūhun jeē quénehen ri ndijēn yā. ¹² Te sáha ya nájñūhun sáha tēe scánda trigo, chi sásñn ya ñayuu váha jíin ñáyuu cunéé, nájñūhun cúndoo trigo jeē quénda sñn

paja. Te nastútú yá trigo yā ndīvī ini yacā yā. Te paja chi jnaa yā nuū ñuhún jeē ma ndahvá cuiti. Achí Juan.

Jeē ní jendute Jesús
(Mr. 1.9-11; Lc. 3.21-22)

¹³ Yūcuán na te ni quenda Jesús región Galilea, te ni quee yā yūte Jordán nuū íne Juan, návāha scuándute de ya. ¹⁴ Te tu ní cúní Juan scuándute de ya, chi ni cahān de jíin yá:

Sa suhva cánuú jeē scuándute máá ní sãñá, ¿te ndese cúu jeē sa nuū ná vēji ní? áchí de.

¹⁵ Te ni cahān Jesús jíin de:

Tuú chi sáha ró, chi súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya. ¹⁶ Te ná ni cuu ni jendute Jesús, te ni quenda ya nuū ndúte. Te ni nune-ni andiví, te ni jito ya jeē cúun Espíritu Yaā Dios vēji, te cáa nájñuhun ñn paloma, te ni quee xinī yā. ¹⁷ Te ichi ándiví ni cahān ñn jñuhun:

Yāha cúu Sēhe ri jeē maní ndasí rí jíin, te yōhyo cúsiñ ni rí jíin, áchí.

Jeē ní jito ndee jexeén Jesús
(Mr. 1.12-13; Lc. 4.1-13)

4

¹ Yūcuán na te ni jinū Jesús nde nuū ñuhun téhé ní sáha Espíritu Santo. Te yūcuán coto ndee jexeén yā, chi cúní jeē sáha ya cuēchi.

² Te ni Iyo ndite ni yā uū xico nduú uū xico ñuú, sáá te jíi yā sōco. ³ Te ni quee maá jexeén jeē cóto ndee un yá, te ni cahān jíin yá:

Núu máá ró cúu Sēhe Yaā Dios, te cahān rō jeē yuū yúcu yáha na ndúu staā caji rō, achí.

⁴ Te ni cahān yā jíin:

Tuú chi yósó núu tútu iī: Nasūu máni máá jíin stāā cátecu ñayuu, chi suni jíin táca jnúhun cáhán Yaā Dios, achí yá.

⁵ Yūcuán na te cuahān jexeén un jíin yá nde ñuu iī Jerusalén. Te ni jeni ya xinī torre templo. ⁶ Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñúhun, chi jnama ya rohó. Chi yósó núu tútu:

Tejníñu ya ndajéhé yā quiijicoo coto róhó.

Te cunundee yā rohó jíináhan ya,

návāha ma cáchihí ró jéhē rō nuū yuú.

Achí tutu. Achí jexeén.

⁷ Te ni cahān Jesús:

Tuú chi suni yósó núu tútu jeē ma cóto ndee ñayuu Jítoho i Yaā Dios, núu jnama ya i chí tuú, achí yá.

⁸ Te jexeén un ní jeca tucu ya cuahān jíin yá nde xinī ñn yucu súcún ndasí. Te ni steén tǎcá nación ní cáhnu ñayiví núu yā, te yōhoyo luu cáa ndihí. ⁹ Te ni cahān jíin yá:

Tǎcá ñuu yáha cuáha ri nuū rō, te núu cuiñi yítí ró chiñúhún ró ruhū, achí.

¹⁰ Yūcuán na te ni cahān Jesús nuū jexeén:

Satanás, cujiyo quihīn rō, chi yósó núu tútu jeē chiñúhún ñayuu maá Jítoho i Yaā Dios, te nuū maá-ni ya cuajníñu i. Achí yá.

¹¹ Yūcuán na te ni cujiyo-ni jexeén un cuáhān. Te ni quecoo ndajéhé Yaā Dios ni cajejníñu nuū yā.

*Jeē ní quejéé Jesús nácani ya jnūhun región Galilea
(Mr. 1.14-15; Lc. 4.14-15)*

¹² Te ná ni nihīn Jesús jnūhun jeē íne Juan vecāa, te cuanuhun yā región Galilea. ¹³ Te tu ní cóndee yā ñuu Nazaret, chi ni jehēn yā ni condee yā ñuu Capernaum. Te ñuu un íne yumar, máá región Zabulón jíin Neftalí. ¹⁴ Te súcuan ni squícu jnūhun ni tee Isaías, tēe ni nacani jnūhun Yaā Dios nde jenahán:

¹⁵ Región Zabulón jíin Neftalí,
ichi jeē yíhi yumar, lado yūte Jordán nuū cáne
niāndii,
jíin región Galilea nuū cáyūcú ñayuu tácá nación tu
jíní jnūhun ya.

¹⁶ Ñayuu ún chi nájnūhun cáyūcú i nuū néé,
te coto i nájnūhun ñn luz cáhnu.
Te ñayuu je yajni naa, nihīn i jnūhun váha ndasí,
suu jnūhun jeē jnama ya anuá i.
Achí Isaías.

¹⁷ Te nde quiṽí yúcuani ní quejéé Jesús nácani ya
jnūhun, te ni cahān yā suhva:

Nacani ni rō jijnáhan ró jéē stóo ró cuéchi ró, chi
je ni cuyajni Yaā ndeé andiví jéē ndacu ya jniñu
nuū rō, achí yá.

*Jeē ní cana ya cuūn tēe jn# chācá
(Mr. 1.16-20; Lc. 5.1-11)*

¹⁸ Te jíca Jesús yumar Galilea cuahān yā. Te ni
jito ya nuū uú jnáhan ñani. Te ñn de cúu Simón jeē
suní nání Pedro, te inga de cúu Andrés. Te tēe cájni#
chācá cácuu de, te cásinga de ñunu de ini mar. ¹⁹ Te
ni cahān yā jíin de:

Condiquĩn ruhũ na quĩhĩn yõ, te nasáha ri rohó tée nihĩn cuehẽ ñayuu candíje ruhũ, nájñuhun cánihĩn rõ chácá, áchí yá.

²⁰ Yũcuán na te ni castóo-ni de ñunu de, te ni candiquĩn de ya.

²¹ Te ni jica ya jecu gā, te ni jito ya nuũ ینگa uũ jnáhan ñani. Te cácuu de Jacobo jíin Juan, sēhe Zebedeo. Te cáyucú de ini barco jíin tátá de Zebedeo, cánachijnĩ de ñunu de. Te suni ni cana ya de jeē cóndiquĩn de ya. ²² Te ni castóo-ni de tátá de jíin barco, te ni candiquĩn de ya cuango de.

*Jeē ni steén yā nuũ cuehẽ ñayuu
(Lc. 6.17-19)*

²³ Te ni jica cuu Jesús ní región Galilea, ni steén yā jñuhun ini tãcá vehe iĩ jeē cúu sinagoga. Te ni nacani ya jñuhun vāha ndese ndácu Yaā Dios jniñũ. Te ni nasávāha ya ñayuu cácuu tãcá-ni cuehyĩ.

²⁴ Te ni jite núu jñuhun ya cuahān ní región Siria. Te nuũ yā ni caquindeca i tãca ñáyuu cácuu, ñayuu cándoho tijni nuũ cuehyí, jíin jéē jetú, jíin jéē ñuhun tachĩ ini, jíin jéē jihí yĩhí, jíin jéē ni íjin. Te ni nasávāha ya i jíināhan i. ²⁵ Te cuehẽ ñayuu región Galilea jíin Decápolis, jíin ñáyuu ñuu Jerusalén jíin región Judea, jíin táca ñuu ichi núu cáne niāndii yũte Jordán, ni cacondiquĩn i ya.

Jeē ní nacani ya jñuhun nde nuũ yúcu

5

¹ Te ni jito Jesús nuũ ñáyuu cuehẽ. Te ni caa ya yucu cuahān yā, te ni cucõo ya. Te tēe cáscuáha jíin yá, ni jinũcoo de nuũ yā yũcuán. ² Te ni quejéé yá ni steén yā tãca jñuhun yáha nuũ de:

*Jnūhun yōhyo ndetū
(Lc. 6.20-23)*

³ Yōhyo ndetū ñayuu jeē cānacuni i jeē tu íyó váha ánuá i síquī cuéchi i, chí je ni quīvicoo i ndaha Yaā andiví jeē ndácu ya jniñu nuū i.

⁴ Yōhyo ndetū ñayuu cācucuíhyá ni, chí ndusī ni i sáha Yaā Dios.

⁵ Yōhyo ndetū ñayuu cáhīyo vītá suchí ini, chí ni jejnūhun ya jeē cutahū i ñayiví.

⁶ Yōhyo ndetū ñayuu jeē nájñūhun jeē cájiī i sōco cájichī i, súcuan jnāā i sáha i jniñu ndaā, chí máá yá chindéé ñáhán yá i jeē cuu sáha i.

⁷ Yōhyo ndetū ñayuu cācundáhú ni jnáhan, chí suni cundáhú ni Yaā Dios i.

⁸ Yōhyo ndetū ñayuu cáhīyo ndoo ini anuá, chí coto i nuū Yaā Dios.

⁹ Yōhyo ndetū ñayuu cānasámanī jnáhan, chí cahān Yaā Dios jeē sēhe ya cācuu i.

¹⁰ Yōhyo ndetū ñayuu jeē cájito xeēn inga ñayuu i síquī jeē casáha i jniñu ndaā, chí je ni quīvicoo i ndaha Yaā andiví jeē ndácu ya jniñu nuū i.

¹¹ Yōhyo ndetū maá ró jijnáhan ró núu cācahān neé i nuū rō jeē síquí ruhū, te coto xeēn i rōhó, te stáú yáhu i rōhó, vēsú tú cuéchi ró. ¹² Na cúsi ni rō jijnáhan ró núu súcuan, te sa víhyá gā cusī ni rō, chí cáhnu ndasí coo tahū rō nde andiví. Chí suni súcuan ni cajito xeēn i tāca téé ni canacani jnūhun Yaā Dios jeē ní quijicoo xīhna gā vēsú rohó.

*Jnūhun yátá síquī ñī jīn síquī luz
(Mr. 9.50; Lc. 14.34-35)*

¹³ Máá ró jijnáhan ró cájejniñu ró ini ñayiví nájñūhun jéjniñu ñī nuū cúñu návāha tú tehyū. Te núu ñī ún na náā jeē uhvuá, ¿te ndese nduu uhvuā

tucu? Tuá cuajniñu cuiṭi gā, chi sa cate ñayuu te cueñū i siquī.

¹⁴ 'Máa ró cácuu nájñūhun luz jeē steén ini anuá ñayuu ñayiví. Te cácuu ró nájñūhun ññ nuu íne xinī yúcu, jeē ma cúu quisāhí. ¹⁵ Te ni tu nástíin ñayuu ññ lámpara te chune i chíji cajón, chí sa suhva jéni i nuū sucún, návāha cundijin nuū tāca jéē cáyūcú ini vehe. ¹⁶ Te suni súcuan na stéén rō luz maá ró nuū tāca ñayuu, te suu cúu jeē cúni i jniñu váha cásáha ró, te cahān i jeē yóhyo vāha Yaā cúu Tátá rō jeē ndeé yá andiví.

Jeē ni stéén yā siquī ley Yaā Dios

¹⁷ 'Ma cáni ni rō jijnáhan ró jéē véji ri snāā rī ley jeē ni jéhe Yaā Dios nuū Moisés, jíin jéē snāā rī tāca jñūhun ni cacahān tēe ni canacani jñūhun ya jenahán. Tú véji ri jeē snāā rī, chí sa suhva jeē steén cají rí jñūhun ndíso. ¹⁸ Chí jendaá cahán rī jíin ró jeē núu níni íyó andiví jíin ñáyiví, te ma náā cuiṭi ni ññ punto ni ññ letra nuū tutu ley yā, chí nde na squícu tācá ndihi jñūhun jeē cahán. ¹⁹ Núu súcuan te núu ññ ñayuu tu squícu i ññ jñūhun yáha jéē ndácu ley yā, vésú ññ jñūhun lulí gá cúu, te núu stéén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ññ ñayuu squícu i te stéén i jeē squícu ñayuu, yūcuán na te cujéhnū i ichi andiví nuū ndácu Yaā Dios jniñu. ²⁰ Chí cahán rī jíin ró jeē núu tú coo ndaā gā jniñu cásáha ró vésú jniñu cásáha tēe cástéén tutu ley yā jíin tēe grupo fariseo, te ma quívicoo cuiṭi rō ndaha Yaā andiví jéē ndacu ya jniñu nuū rō.

Jeē ni stéén yā jeē ma quiṭi ni yō
(Lc. 12.57-59)

²¹ 'Je ni cajini ró jnúhun ni cacahān jín ñáyuu jenahán, jeē ma cáhni i ndīyi, te na-ni ñayuu núu cahni i ndīyi, te cundaā cuēchi i nuū tāca tóhō, achí.

²² Te ruhū chi cáhán rī jín ró, vēsú núu máá jēē quiṭi ni ñn ñayuu jíto i jnáhan i, suni cundaā siquī cuēchi i ún. Te núu ñn ñayuu cahān neé i nuū jnáhan i, núu súcuan te cundaā cuēchi i un núu justicia cujéhnua ga. Te núu ñn ñayuu cahān i nuū jnáhan i: Róhó jēē canéé íi, achi i, núu súcuan te quiṭi i nuū ñuhún infierno te núu ma nácani ni i.

²³ 'Jeē yúcuán te núu ni jinū rō nuū altar jín jēē socó rō nuū Yaā Dios, te núu ni nucūhun ni rō jeē ni sáha ró cuēchi siquī jnáhan ró, ²⁴ núu súcuan te squéndōo ró jēē socó rō ún xiin altar, te xīhna gā quihīn rō ndumanī rō jín jnáhan ró. Yūcuán na te nandicó ró socó rō.

²⁵ 'Te núu ñn ñayuu quihīn i jín ró nuū tohó jeē cacān i cuēchi siquī rō, núu súcuan te níni cuáhān rō jín i ichi te sándaā maá ró jín i, návāha ma squívi i róhó núu juez. Chi juez siáha de róhó núu policía, te chune de róhó vecāa. ²⁶ Te jendaá cahán rī jín ró jeē ma quénda cuiṭi rō yūcuán, chi nde chunaa rō ndihī cuiṭi xūhun jēē cájicān de.

Jeē ni stéén yā jeē ma cósiquí ndéē jnáhan

²⁷ 'Ni cajini ró jnúhun ni cacahān jenahán jeē ma cósiquí ndéē jnáhan ñayuu. ²⁸ Te ruhū chi cáhán rī jín ró jeē núu ñn tēe ndéhe de nuū ñn ñahan jeē ndíyo ni de ña, yūcuán na te je ni casíquí ndéē de ñahan ún ini anuá de.

²⁹ 'Núu súcuan te núu tinūu lado váha ró sáha jeē quiṭi ró cuēchi, vāha ga quenehen ró te scáne ró,

návāha tuá sáha ró cuéchi. Chi vāha gā jeē nāā ñn tinūu ró vēsú jeē cóo ndihí yiquí cúñu rō te quihñn rō infierno. ³⁰ Te núu ndaha váha ró sáha jeē quívi ró cuéchi, vāha ga cahnde rō te scáne ró, návāha tuá sáha ró cuéchi. Chi vāha ga jeē nāā ñn ndaha ró vēsú jeē cóo ndihí yiquí cúñu rō te quihñn rō infierno.

Jeē ni stéén yā jeē ma ndusñn jnāhan
(Mt. 19.9; Mr. 10.11-12; Lc. 16.18)

³¹ Te suni ni cacahān nde jenahán: Núu ndé ñn cúní stóo ñasihí, te na cuáha acta nuū ña jeē ndusñn jíin ña. ³² Te ruhū chi sa cáhán rī jíin ró jeē núu ñn tēe stóo de ñasihí de, te núu nasūu jéē tǵjni ni ña, núu súcuan te sáha de jeē casíquí ndéē ña de, chi condee ña jíin inga tēe. Te núu ñn tēe condeca de ñahan ní ndusñn, suni cásíquí ndéē de ña.

Jeē ni stéén yā siquī jnúhun jéjnūhun téyí

³³ Te suni ni cajini ró jnúhun jeē ni cáhān jíin ñāyuu nde jenahán: Núu ni jejnūhun téyí ró jeē squícu ró, jíto jínúū Yaā Dios, núu súcuan te cánuú squícu ró jéē ni cáhān teyí ró un, áchí. ³⁴ Te ruhū chi cáhán rī jíin ró jijnáhan ró jeē ní ñn siquī jníñu ma cahán teyí ró nde jíin sǵhví Yaā Dios, ni ma cahán teyí ró jeē jíto jínúū yā. Te núu jéjnūhun téyí ró te tú vāha jeē ndácunehen ró andívi ní ñayívi. Chi andívi cúu nuū ín mesa nuū ndácu Yaā Dios jniñu. ³⁵ Te ñayívi cúu nájñūhun teyū nuū ín jehē yā. Te ni ma ndácunehen ró ñuu Jerusalén, chi suu cúu ñuu maá Yāá cúu Rey cujéñu. ³⁶ Ni ma cahán rō jeē na cóndee cuéchi siquī rō núu tu squícu ró. Ma cahán rō súcuan, chi mā cúu cuiti sáha ró jéē ni ñn ixi xíní rō nducuíjín chí ndujnúú. ³⁷ Chi suhva-ni cahán rō:

Cuu, achi rō. Tuú, achi rō. Chi núu chisóó gá rō jnūhun cahān rō, te nuū jexeén vēji.

*Jeē ni stéén yā jeē ma cuāha yó jéē ndútahū ñayuu
(Lc. 6.29-30)*

³⁸ 'Ni cajini ró jnúhun jeē ni cáhān jíin ñáyuu jenahán: Núu ñn tēe ndahva de tinūu jnáhan de, suni súcuan na ndáhva tinúú de. Te núu ñn tēe stáva de jnūhun jnáhan de, suni súcuan na stáva jnūhun de, áchí. ³⁹ Te ruhū chi sa cáhān rī jíin ró: Ma nácuāha ró jéē ndútahū tēe sáha ndevāha jíin ró. Chi sa núu ndé tēe cani de yiqui núu lado váha ró, te vāha ga suni cuāha ró inga lado cani de, vēsú jeē nácuāha ró jéē ndútahū de. ⁴⁰ Te núu ndé tēe stáú yáhu de róhó te quénde de camisa rō, suni cuāha ró jnúhun jeē na quíhín de jíin ndé ticāchi ró. ⁴¹ Te núu ndé tēe scáca de róhó jéē condiso ró ndajníñu de ñn kilómetro, te caca ró úu kilómetro jíin de. ⁴² Te na-ni ñayuu núu jícán i ndajníñu ró, te cuāha ró núu i. Te ñayuu jicán núu ndajníñu nuū rō, ma sasáhán ró cuāha ró núu i.

*Jnūhun jeē cundáhú ni yō ñayuu cájito uhū yohó
(Lc. 6.27-28, 32-36)*

⁴³ 'Te suni ni cajini ró jnúhun jeē ni cáhān nde jenahán: Cundáhú ni rō ñayuu cáhiyo manī jíin ró, te coto uhū rō ñayuu cájito uhū rohó, áchí. ⁴⁴ Te ruhū chi sa cáhān rī jíin ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha siquī rō. Te sáha vāha ró jíin ñáyuu cáquīñi ni nuū rō. Te cacān tahu rō jehē ñáyuu cácahān neé núu rō te cájito xeēn i róhó. ⁴⁵ Te súcuan stéén rō jeē cácuu ró séhe máá Tátá rō, Yāā ndeé andiví, chi máá yá jéhe niāndii cúndijin nuū ñáyuu

cunéé jíin ñáyuu váha. Te jéhe ya saū nuū ñáyuu casáha jniñu ndaā jíin núū ñáyuu casáha jniñu néé. ⁴⁶ Chi núu íyó mánī rō jíin máá-ni ñáyuu jeē maní jíin ró, te tú na tahū nihīn rō nuū yā. Chi nde tēe cástútú xúhun renta jeē castáhú, suni súcuan cásáha de. ⁴⁷ Te núu máni jnáhan ró cáhán yíñúhún ró jíin, ¿te na vé jeē váha ga sáha ró núu súcuan? Chi nde ñáyuu tu cá candíje Yaā Dios, suni súcuan cásáha i. ⁴⁸ Núu súcuan te ndaā na cóo ndihī jeē sáha ró, nájnūhun íyó ndaā ndihī jeē sáha Tátá rō, Yaā ndeé andiví.

Jeē ni stéén yā ndese sáha yó jniñu váha

6

¹ Te jeē sáha ró táca jniñu váha nuū Yaā Dios, coto ró jéē ma sáha ró máá síquī jeē cúni ñáyuu te cuajnúhún i rōhó. Chi núu súcuan sáha ró, te tú na tahū rō cuāha máá Tátá rō, Yaā ndeé andiví. ² Jeē yúcuan te jeē sáha ró caridad, te ma sáha ró jéē cúni tāca ñáyuu, nájnūhun cásáha tēe stáhú-ni, cáhīn de nuū cúchitú ñáyuu ini taca vehe īi sinagoga jíin núu yáhu. Chi súcuan cásáha de návāha cuajnúhún ñáyuu de jeē váha cásáha de. Jendaá cahán rī jíin ró jeē tahū de cúu jeē jejnúhún ñáyuu de. ³ Te rōhó jíjnáhan ró, núu cásáha ró caridad, te sáha yuhu rō, návāha nde amigo vāha ró tú cuni jeē sáha ró. ⁴ Súcuan na sáha yuhu rō caridad. Te máá Tátá rō jeē jíto ya jeē sáha yuhu rō, ñn quivī te cuāha ya tahū cuu ró.

*Jeē ni stéén yā ndese cacān tahú yō
(Lc. 11.2-4)*

⁵ Te jeē cájicān tahú rō, te ma sáha ró nájñūhun cásáha tēe stáhú-ni. Chi cánujnahan ni de cuiñi de cacān tahú de nuū iyó chitú ñayuu ini tācá vehe īi sinagoga jín táca yíqui yáhu, návāha cuni ñayuu te cuajnúhún i de. Jendaá cahán rī jín ró jeē maá yúcuan-ni cúu tahū jeē nihín de, suu jeē jejnúhún ñayuu de. ⁶ Te róhó jínáhan ró, núu cájicān tahú rō, te ndīvi ró ini vehe ró te casi rō yehyí. Te cacān tahú rō nuū maá Tátá rō, Yaā ndeé yuhu jín ró. Yūcuán na te máá Tátá rō jeē jító ya jeē súcuan sáha yuhu rō, sáha ya jeē jicán rō.

⁷ Te jeē cájicān tahú rō, te ma cahán saá-ni ró jnúhun jeē tu cájecūhun ni rō, nájñūhun cásáha ñayuu tu cájini jñūhun Yaā Dios. Chi cájeni ni i jeē núu cuehē jñūhun súcuan cahán i, te sáa te cuni sōho ya, te tuú. ⁸ Núu súcuan te ma sáha ró nájñūhun cásáha máá i. Chi máá Tátá rō, je jíní yā na vé cájini ñúhún ró nde ná tu cacān rō nuū yā. ⁹ Núu súcuan te suhva cacān tahú rō:

Tátá maá ná jijnáhan ná jéē ndeé ní andiví,
níní na cóo yíñúhún ná nuū ní, chi Yaā īi cúu ní.

¹⁰ Te ñúhún ni na jéē yachī quiji quivī ndacu ní
jniñu ní ñáyiví yáha.

Te na cóo tācá jniñu nújnahan ni ní,
nájñūhun iyó ini andiví, súcuan na cóo ini ñayiví.

¹¹ Staā jeē cátecu na táca quiví, cuāha ní núu ná
vijna.

¹² Te cone cahnu ni ni núu tāca cuéchi cásáha ná núu
ní,
nájñūhun cáhine cáhnu ni na núu ñáyuu casáha
cuéchi nuū ná.

¹³ Te ma cuáha ni jnúhun jeē coto ndee jexeén sáñá,
chi sa suhva jnama ní sáña núu tāca jéē neé.

Chi máá ní cúu Yaā ndácu jniñu, te jn# ní poder,
te yōhyo luu cújéhnú ní n# cáni. Súcuan na cóo.

Amén.

Achi rō jijnáhan ró.

14 'Chi núu cone cáhnu ni rō nuū ñáyuu casáha
cuēchi nuū rō, te suni súcuan cone cáhnu ni maá
Tátá rō andiví nuū cuéchi ró. 15 Te núu ma cóne
cáhnu ni rō nuū ñáyuu casáha cuēchi nuū rō, te suni
súcuan ma cóne cáhnu ni maá Tátá rō nuū cuéchi ró
jijnáhan ró.

Jeē ni stéén yā siquī jnúhun condite ni

16 'Te núu condite ni rō jeē chiñúhún ró Yaā Dios,
te ma sáha ró nájnuhun cásáha tēe stáhú-ni. Chi
cásáha de jeē coto xií de, te súcuan stéén de nuū
ñayuu jeē iyó ndite ni de, návāha cuajnúhún i de.
Jendaá cahán rī jín ró jeē maá yúcuan-ni cúu tahū
jeē nihín de, suu jeē jejnúhún ñayuu de. 17 Te máá
ró jijnáhan ró, núu iyó ndite ni rō, te sa chuhun
vāha ró xínī rō te nandahá núū rō, 18 návāha ma
cúni ñayuu jeē iyó ndite ni rō. Chi máá-ni Tátá rō
jeē ndeé yuhu yā jín ró, cuni yā, te ñn quiví te
cuāha ya tahū cuu ró.

Ndese coo cúcá yó nde andiví

(Lc. 12.33-34)

19 'Ma cóndihvī ni rō caya rō ndajniñu cúcá ini
ñayiví yáha, chi quiví tiquíxin, te cáne xehyu, te tívi.
Te suni quívicoo ñacuíhná te sácuíhná. 20 Chi sa
suhva sáha ró táca jniñu váha návāha cayā tahū rō
nde andiví. Chi yúcuan má quiví tiquíxin ni ma cáne
xehyu jeē tívi. Ni ma cúu quiví ñacuíhna sácuíhná.
21 Chi nde nuū nihín rō tahū váha ró, yúcuan cúu
nuū cóndihvī ni rō siquī.

Tinūu cúu lámpara yiqui cúñu
(Lc. 11.34-36)

²² Tinūu ró cúu nájnūhun lámpara nuū yiqui cúñu rō. Nūu súcuan te nūu tinūu ró iyó ndijin, te ní-ni yiqui cúñu rō cúndijin. ²³ Te nūu tinūu ró tu iyó ndijin, te ní-ni yiqui cúñu rō iyó nee. Te suni súcuan cúu ánuá rō, chi nūu máni jeē jéni neé ni rō, te nacā jeē nee gā iyó ini anuá rō nūu súcuan.

Jeē ma cóndihvī ni yō siquī xúhun
(Lc. 16.13)

²⁴ Ni ñn mozo ma cúu cuajníñu de nuū uū patrón. Chi quitī ni de nuū ñn te coo manī de jíin inga, chí squícu vāha de nuū ñn te sájéē ni de nuū inga. Te suni súcuan ma cúu cuajníñu ró nūu Yaā Dios te nūu máni siquī xúhun ndíhvī ni rō.

Yaā Dios ndíto ya yohó
(Lc. 12.22-31)

²⁵ Nūu súcuan te cáhán rī jíin ró jijnáhan ró: Ma nácani ndasí ni rō siquī jeē cótecu rō, nūu ndese caji rō coho ró, ni siquī sahma, nūu ndese cuhun ró. Chi Yaā Dios ni sáha ya jeē técu rō jíin yiqui cúñu rō, te nagā ni cuu jeē ma cuáha ya jeē cáji rō jíin jéē cúhun ró. ²⁶ Condēhe ró ndese cátecu saa, chi tu cátaji tí, ni tu cánastútú tí jeē chívāha tí, ni tú yacā tí. Te vēsú súcuan te máá Tátá rō andiví scáji yā tí. Te cánuú ndasí gá rō jijnáhan ró vēsú tēcá saa ún. ²⁷ ¿Te ndé ñn ró, á cuu scuéhnu ró máá ró sava metro gā, vēsú na nácani ndasí ni rō?

²⁸ ¿Te najehē cánacani ndasí ni rō jeē ma nihín rō sahma? Condēhe jijnáhan ró ndese jée ita tāca yúcū. Chi tu sájniñu, ni tu táú. ²⁹ Te cáhán rī jíin ró jeē ni rey Salomón, quivī ní ñūhun de sahma váha

ndasí, tu ní ñúhun de sahma lúu súcuan nájñuhun ita ún. ³⁰ Te núu súcuan jéhe Yaā Dios sahma lúu ita un jéē jée vijna te sajnē cayū nuū ñuhún, te nagā ni cuu rōhó jíjnáhan ró jéē ma sáha ya jeē nihín rō sahma. ¿Te naun tu cácanđije ñihin ró jéē ndító ya rohó? ³¹ Núu súcuan te ma nácani ndasí ni rō síquī jeē cáji rō, jeē coho ró, jeē cuhun ró. ³² Chi tāca ñāyuu ñayīvī jéē tu cácanđije cúu jeē máni síquī jeē yáha cándihvī ni i. Te máá ró jíjnáhan ró, chi íyó Tátá rō andiví, te jíni yā jeē cájini ñúhun ró tāca jéē yáha. ³³ Te sa suhva cánuú gá jeē cóndihvī ni rō síquī jniñu jeē ndácu Yaā Dios nuū rō, jíni síquī jeē sáha ró jniñu ndaā jeē nújnahan ni yā. Yūcuán na te sáha ya jeē nihín rō tāca jéē yáha. ³⁴ Núu súcuan te ma nácani ni rō síquī jeē cóo sajnē, chi vijna cúu vijna te sajnē cúu sajnē. Chi caní ni rō síquī jnúndóho jeē iyó ná ñn ná ñn-ni quivī.

*Jeē ma cahán yō síquī cuēchi jnáhan yó
(Lc. 6.37-38, 41-42)*

7

¹ Ma cahán rō síquī ñayuu ndese sáha i, návāha suni ma cahán Yaā Dios cuēchi síquī maá ró jeē casáha ró súcuan. ² Chi nájñuhun cácahān rō síquī cuēchi ñayuu, suni súcuan cahān yā síquī cuēchi ró. Te cūhva jeē cándihvī ni rō síquī i, suni cūhva yúcuan sáha ya jíni ró. ³ Chi cuēchi jnáhan ró cúu nájñuhun jeē íne ñn yāca lúli tinūú i. ¿Te naun casáha ró cuenta jeē súcuan, te tu casáha ró cuenta cuēchi máá ró jeē cúu nájñuhun jeē íne ñn nduhu tinūu máá ró? ⁴ ¿Te naun cácahān rō jíni jnáhan ró: Na táva rī yāca íne tinūu ró, te tu cánacani ni rō jeē íne

ñ nduhu tinūu máá ró? ⁵ Tēe stáhú-ni cácuu ró núu súcuan. Xihna gā tinūu máá ró tava rō nduhu, te yūcuán na te cuu condēhe váha ró jéē táva rō yāca tinūu jnáhan ró.

⁶ Ma sáha fuerza rō ñayuu cunéé quívicoo i nuū jnúhun iī yā núu tu cúní i. Chi ndonda i siquī rō nájnūhun ina jeē cáyīhi tí rohó. Te ma nácani ró jnúhun ya nuū ñáyuu jeē tu cúní cuiti cuajnúhún. Chi cándāa i nájnūhun quinī jeē jeñú tī siquī perla jeē ndeé yahu ga.

Cacān yō nuū yā te nihīn yō

(Lc. 11.9-13; 6.31)

⁷ Cacān rō nuū Yaā Dios, te cuāha ya nuū rō. Te nducú ró tāca jéē váha iyó núu yā, te nihīn rō sáha ya. Te cacān tahú rō nde nihīn rō, nájnūhun sáha ñayuu cahán yehyí ndé nune quívi i. ⁸ Chi tāca ñáyuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cuní i.

⁹ ¿Te ndé ñn róhó núu sēhe ró jicán i staā nuū rō, te á cuáha ró ñn yuū nuū i? ¹⁰ ¿Te núu jicán i ñn chācá, te á cuáha ró ñn coō nuū i? Tú cuiti súcuan. ¹¹ Núu súcuan te máá ró jijnáhan ró, vēsú ñayuu iyó cuéchi cácuu ró, te cájini rō cuāha ró jéē váha nuū séhe ró. Te nagā ni cuu máá Tátá rō andiví jéē ma cuáha ya jeē váha nuū ñáyuu jicán nuū yā.

¹² Te nájnūhun cúní rō jeē sáha váha ñayuu jín ró, suni súcuan na sáha vāha ró jín i. Chi tutu ley Moisés súcuan ndácu jniñu, jín táca tutu tēe ni canacani jnūhun Yaā Dios.

Siquī jeē quíví yó yéhyí túū

(Lc. 13.24)

13 'Condihvī ni rō quīvīcoo ró ndaha Yaā Dios. Chi cúu nájnūhun ñn yéhyí túū. Chi yéhyí jíin ichi jeē cuahán nuū jnahnú ndetū ñayuu, jíté te cáhnu, te cuehē i quīvīcoo yūcuán. 14 Te yéhyí jíin ichi jeē cuahán nuū nihín tahu i cotecu i, chi tuū yehyí te cuiñi ichi, te jecu-ni i cánihīn i.

Jíin jniñu cásáha ñayuu te nácuni yō ndese ñayuu cácuu i

(Lc. 6.43-44)

15 'Te ma cándíje cuiti rō tēe stáhú jēe cácahān de jeē jnúhun Yaā Dios cánacani de. Chi nájnūhun lanchi, quiti tú xeēn, súcuan cásáha de vējicoo de nuū rō. Te ini anuá de chi cácuu de nájnūhun yihī, quiti xéén. 16 Jíin jniñu cásáha de te nacuni rō de ndese tēe cácuu de. Chi cúu nájnūhun jeē tu scóyo ró ndehē uva xinī iñu, ni tu scóyo ró higo xinī iñu yóquin. 17 Te tācá yujnu váha chi jēhe ndehē váha, te yujnu néé chi cúun ndehē neé. 18 ñn yujnu váha ma cúun ndehē neé, te ni ñn yujnu néé ma cuáha ndehē váha. 19 Te tācá yujnu jeē tu jēhe ndehē váha, chi tahndē te cayū nuū ñuhún. 20 Te suni súcuan cácuu tēe ún, chi jíin jniñu cásáha de te nácuni rō ndese tēe cácuu de.

Nasūú ndihī ñayuu quīvīcoo andiví

(Lc. 13.25-27)

21 'Nasūú ndihī ñayuu jeē cahán i Jitoho i ruhū cúu jeē quīvīcoo nuū ndácu Tátá rī jniñu nde andiví. Chi quīvīcoo máá nene ñayuu jeē squícu jniñu cúní Tátá rī andiví. 22 Te quivī jeē sándaā rī jniñu ñayuu, te cuehē i cahān jíin rí: Jitoho na jíjnáhan ná, ni canacani ná jnúhun jíin síhví ní, te ni caquenehen ná táchī jíin síhví ní, te ni casáha ná

cuéhē jniñu jéhnú jíín síhví ní jeē náā ni ñayuu sáha. Achi i. ²³Yūcuán na te cahān rī jíín ñáyuu ún: Tu jííní cuítí rī rohó. Cujiyo quingoo ró, chí ñayuu casáha jniñu néé cácuu ró, achi rī.

Siquī uú vehe

(Lc. 6.47-49; Mr. 1.22)

²⁴Núu súcuan te tāca ñáyuu jeē cájini sōho jnūhun cáhán rī te squícu i, cácuu i nájnūhun ñn tēe ni nacani vāha ni, te ni jeni de vehe de siquī cáva. ²⁵Te ni cuun saū, te ni ndaa yūte, te ni quee tachī xeén, te ni cachundahá vehe ún. Te tu ní cótúú, chí siquī cáva ndéé. ²⁶Te tāca ñáyuu jeē cájini sōho jnūhun cáhán rī te tu squícu i, cácuu i nájnūhun ñn tēe cánéé jeē ní jeni de vehe de nuū ñítí. ²⁷Te ni cuun saū, te ni quiji ndute ñúhún cuéhē, te ni quee tachī xeén, te ni cachundahá vehe ún. Te ni cótúú-ni, te ni naa ñ-ni. Achí yá jíín i jíínáhan i.

²⁸Te ná ni jíinu ni cahān Jesús tāca jnúhun yáha, te ñayuu cuehē un ní canaa ni i ni cajini i jnūhun ni steén yā. ²⁹Chí ni steén vāha ya nuū i, chí máá yá cúu jeē ndíso jniñu siquī ndíhi. Te tēe cástéén tutu ley Yaa Dios, tu súcuan cástéén de.

Jeē ní nasávāha ya ñn tēe ndóho cuehyī stehyú

(Mr. 1.40-45; Lc. 5.12-16)

8

¹Te ni nanuu Jesús yucu ún, te cuehē ñayuu cándiquīn i ya. ²Te ñn tēe ndóho cuehyī stehyú, ni quee de nuū yā. Te ni jecuiñí yítí de nuū yā, te ni cahān de jíín yá:

Jííní na jéē cuu sáha ní jéē nduvāha ná, te núu cúní ni, áchí de.

³ Te Jesús ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un. ⁴ Yūcuán na te ni cahān Jesús jíin de:

Ma cáchi cuiti rō nuū ní ñn. Chi quisteén rō maá ró nuū sutú, te condahá ró jeē socó rō nuū Yaā Dios, nájnūhun ni ndacu Moisés jniñu jenahán, návāha cuni ñayuu jeē ní nduvāha ró. Achí yá.

*Jeē ní nasávāha ya mozo capitán
(Lc. 7.1-10)*

⁵ Te ni quivi Jesús ñuu Capernaum. Te ñn tēe nación Roma jeē cúu capitán, ni quee de nuū yā, te ni cahān ndahú de jíin yá:

⁶ Mozo na cátú i vehe ná, chi ni ĩjin i te ndóho xeēn i, áchí de.

⁷ Te ni cahān Jesús:

Quihīn rī nasávāha ri i núu súcuan, áchí yá.

⁸ Te ni cahān capitán jíin yá:

Tu cújéhnu ná jéē quihín ni quivi ní vehe ná. Chi máá jéē cahán-ni ní, te na ndúvāha-ni mozo na. ⁹ Chi máá ná suni ndíso jniñu ná ní casáha tēe cácujuhnu ga. Te cújéhnu ná núu taca soldado na. Te núu cáhán na jíin ñn de jeē na quihín de, te cuahān de. Te núu cáhán na jíin inga de jeē na quíji de, te quíji de. Te núu ndácu ná ñn jniñu nuū mozo na, te sáha i. Achí de.

¹⁰ Te jeē ní jini Jesús jnūhun yáha, te ni naa ni yā. Te ni cahān yā jíin ñayuu cándiquīn yā ún:

Jendaá cahán rī jíin ró jeē ni nación yō Israel tu ní níhín rī ni ñn ñayuu candíje níhin súcuan,

nájñūhun cándíje tēe yáha, vēsú tēe nacióñ tu jíñi jñūhun Yaā Dios cúu de. ¹¹ Te cáhán rī jíñi ró jeē quíjicoo cuehē ñayuu ichi núū cáne niāndii jíñi ichi núū quée niāndii. Te cucōo i caji i staā jíñi Abraham jíñi Isaac jíñi Jacob nuū ndácu Yaā Dios jñiñu nde andiví. ¹² Te sava ñayuu nacióñ Israel jeē maá i quívicoo núú, te sa quenehen ya i quihñi i nuū néē, chi tu ní cácdíje i. Te yūcuan ndáhyū i te nacayhí yuhu i jeē ndoho xeēñ i. Achí yá.

¹³ Yūcuán na te ni cahāñ yā jíñi tēe cúu capitán:

Cuánuhun vehe ró, chi sáha ri nájñūhun cándíje ró jéē sáha ri.

Te mozo de un ní nduvāha-ni i máá hora un.

Jeē ní nasávāha ya naná chīso Pedro

(Mr. 1.29-31; Lc. 4.38-39)

¹⁴ Te ni jehēñ Jesús vehe Pedro. Te ni jito ya naná chīsó de jeē catú ña yñi quíji ña. ¹⁵ Te ni jñiñi ya ndaha ña, te ni quenda-ni quíji ún ña. Te ni ndocuiñi ña, te ni sáha ña jeē ní cayeji de jíñi yá.

Jeē ní nasávāha ya cuehē ñayuu

(Mr. 1.32-34; Lc. 4.40-41)

¹⁶ Te jeē ní cuaa ni quecoo ñayuu jíñi cuéhē ñayuu jeē ñūhun tachī ini i. Te ni quenehen ya tachī un cuángoo jíñi jñūhun cáhán-ni ya. Te suni ni nasávāha ya tāca ñayuu cácuñū. ¹⁷ Te súcuan ni cuu návāha cundaā jñūhun ni cahāñ Isaías, tēe ni nacani jñūhun Yaā Dios jenahán: Máá yá ni tejiyo ndinuū cuehyí cándoho yó, áchí Isaías.

Siquí ñayuu jeē cácuñi i condiquñi i ya

(Lc. 9.57-62)

¹⁸ Te ni jito Jesús jeē ní ndicó nduū cuehē ñayuu yā. Te ni cahāñ yā jíñi tēe cáscuáha jíñi yá jeē na

yáha de jíin yá ɪnga lado mar. ¹⁹ Te ɪn tēe stéén tutu ley Yaā Dios, ni quee de nuū yā, te ni cahān de:

Maestro, condiquɪn na níhɪn quíhɪn yō ndé-ni cúu-ni nuū quihín ni, áchí de.

²⁰ Te ni cahān Jesús jíin de:

Tāca ñúcuii, íyó yāū cava cáñuhun tɪ. Te suni saa, iyó táca tɪ. Te ruhū, Yaā ní nduu tēe, tuú nuū cusú rɪ, achí yá.

²¹ Te ɪnga tēe ni cahān de jíin yá, te tēe scuáha jíin yá cúu de:

Condetu ní ndé na quíchindūji ná tátá na xíhna gā. Yūcuán na te condiquɪn na níhɪn, áchí de.

²² Te ni cahān Jesús jíin de:

Condiquɪn ruhū na quíhɪn yō. Te stóo tāca ndíyɪ na chindūji jnáhan ndíyɪ, chí ndíyɪ cácuu ñayuu tu cácandíje. Achí yá.

*Jeē ní jecuiñi tachī níhin jíin mar ni sáha ya
(Mr. 4.35-41; Lc. 8.22-25)*

²³ Yūcuán na te ni quívi Jesús ini barco, te tēe cáscuáha jíin yá ni quívicoo de cuahān de jíin yá.

²⁴ Te nuū mar ni jequíhi ɪn tachī níhin, te ni stónnda ndute mar, ni quívi ini barco un. Te Jesús chí quíxí yā. ²⁵ Te tēe cáscuáha jíin yá ni castónnda de ya, te ni cacahān de:

Jnama ní yóhó, chí je quée yó chíji ndute, áchí de.

²⁶ Te ni cahān yā jíin de:

¿Naun cáyūhú ndasí ró? Te tu cácandíje níhin ró jée cácu ró sáha rɪ, achí yá.

Yūcuán na te ni ndocuiñi yā, te ni cahān yā nuū tachí níhin un jíin núu mar. Te ni cuu nayúú í-ni.

²⁷ Te ni canaa ni de jíin náhan de, te ni cacahān de:

¿Ndé ñn ga cúu tēe yáha, jēē ndé tachī níhin jín mar cájetáhú jēē cahán de? áchí de.

Tēe Gadara jeē cándoho tachī
(Mr. 5.1-20; Lc. 8.26-39)

²⁸ Te ni jinū yā inga lado mar, máa región ñayuu Gadara. Te uū tēe ni quendacoo de nde nuū yíndūji ndīyi, ni quiñahan de ya. Te cáñuhun tachī ini de, te siquī jeē yóhyo xeēn tachī ún, te ni ñn ñayuu tu cúu yāha i ichi yúcuan. ²⁹ Te ni cacana cóhó de ni casáha tachī:

¿Naun vēji ní núū ná, Jesús Sēhe Yaā Dios? ¿A véji ní yáha jeē stóho ní sáña ndé ná tu quee maá quívī? áchí.

³⁰ Te nde jicá jecu cáhīin cuehē quinī cájitu ti.

³¹ Te tachī jeē cáñuhun ini tēe un ní cacahān ndahú jín yá:

Núu quenehen ní sáña, te cuāha ni jnúhun na quívīcōo ná ini quinī cáhīin yūcuán, áchí.

³² Te ni cahān yā jín:

Cuángoo núu súcuan.

Te ni quendacoo tachī ún ini tēe ún, te ni quívīcōo ini quinī. Te quinī un ní cajinu ti ni caningava ti ñn yucáva, te ni ndaquīhi ti ndute mar, ni cajihī ti.

³³ Te tēe cándito ti ni cajinu de cuangoo de jeē ní cayūhú de. Te ni najinūcōo de ñuu. Te ni cacastūhún de tēcá jniñu yúcuan, jín ndese ni cuu jeē ní quendacoo tachī ini ndíndúú tēe ún.

³⁴ Yūcuán na te ndívīi ñayuu ñuu un, ní quendacoo i cuacondéhé i Jesús. Te ná ni jinūcōo i nuū íne ya, te ni cacahān ndahú i jín yá jeē na quénda ya región yúcuan quíhīn yā.

*Jeē ní nasávāha ya ñn tēe ndóho cuehyī ni íjin
(Mr. 2.1-12; Lc. 5.17-26)*

9

¹ Yūcuán na te ni ndīvi Jesús ini barco. Te ni nayāha ya cuahān yā inga lado mar, te ni najinū yā ñuu maá yá. ² Te ni caquindeca ñayuu ñn tēe ndóho cuehyī ni íjin, cátú de nuū ñn camilla. Te ni jini Jesús jeē cá candíje i jeē cúu nasávāha ya tēe ní íjin ún. Te ni cahān yā jíin de:

Na ndúndeyí ni rō séhē, chi je íne cáhnu ni rī nuū tāca cuéchi ró, áchí yá.

³ Yūcuán na te jecu tēe cástéén tutu ley Yaā Dios, ni cajeni ni de siquī yā: Jeē cahán tēe yáha súcuan, chí cáhán de jnūhun ndevāha jeē quií ni Yaā Dios.

⁴ Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri? ⁵ Jeē uú jnūhun yáha, ¿ndé ñn yí gá cáa? ¿A jéē cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuñī te caca ró, chí je ni nduvāha ró, achi rī? ⁶ Te vijna te na stéén rī jeē maá rí, Yaā ní nduu tēe, ndíso jníñu ri ini ñayīvi yáha jéē cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Ndocuñī te naquihin ró camilla rō te quinhun rō vehe ró, áchí yá jíin de.

⁷ Yūcuán na te ni ndocuñī-ni tēe ún, te cuanhun de vehe de. ⁸ Te ná ni cajito ñayuu un jéē súcuan ni sáha ya, te ni cayūhú i. Te ni cacahān i jeē yóhyo vāha Yaā cúu Yaā Dios jeē súcuan ni jēhe ya poder nuū ñn tēe jeē cúu nasávāha de ñayuu, áchí i cájito i Jesús.

*Jeē ní cana ya Mateo
(Mr. 2.13-17; Lc. 5.27-32)*

⁹ Te ni quenda Jesús yūcuan cuáhān yā. Te ni jito ya nuū ñn tēe nání Mateo, néne de nuū cutútú xúhun renta. Te ni cahān yā jíin de:

Condiquīn ruhū na quíhín yō.

Te ni ndocuiñī de, te cuahān de jíin yá.

¹⁰ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásáha cuēchi, suni cáyūcú de cáyeji de staā jíin Jesús jíin tēe cáscuáha jíin yá. ¹¹ Te tēe grupo fariseo, ni cajito de, te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe cásáha cuēchi? áchí de.

¹² Te ni jini Jesús, te ni cahān yatá yá jíin de:

Ñayuu cáhīyo vāha, tu jíini ñúhún i tēe tájné, chi ñayuu cácuñú cúu jeē jíini ñúhún. ¹³ Cuáhán jíinánhan ró núu súcuan, te nacani ni rō na vé cúu jeē cahán jnūhun yáha jéē yosó núu tútu iī: Cúní rī jeē na cúndáhú ni rō jnánhan ró, nasūu jéē socó rō quiti nuū rī, achí Yaā Dios nde jenahán. Te ruhū nasūu jéē véji rī cana rī ñayuu tú cuēchi, jeē cúu i nájnūhun ñayuu cáhīyo vāha, chi sa suhva vēji rī cana rī ñayuu iyó cuēchi, jeē na nácani ni i te stóo i cuēchi i. Achí yá.

*Jeē ní cacajñūhún de ya siquī jeē cóndite ni
(Mr. 2.18-22; Lc. 5.33-39)*

¹⁴ Yūcuán na te tēe cáscuáha jíin Juan tēe scuándute, ni quecoo de nuū Jesús. Te ni cacahān de jíin yá:

Sãña jíin té grupo fariseo, tijni jínu cáhīyo ndite ni na núu Yaã Dios. Te tēe cáscuáha jíin máá ní, ¿naun tu cásaaha de súcuan?

¹⁵ Te ni cahān Jesús jíin de:

¿A cuu condite ni de níni jéē iyó rí jíin de? ¿A cuu cucuíhyá ni ñayuu cáhīn vico nándāha, te núu níni néne tēe nándāha? Te quee quivī jeē cújiyo tēe nándāha, te quivī ún chi condite ni i.

¹⁶ Te ni cahān yā uū jnūhun yátá síquī jeē tu quíjnáhan jnūhun jeé jéē steén yā jíin táca jnúhun jenahán. Achí yá:

Ni ñn tu náchuhun ñn pedazo sahma jéé núu ñn sahma túhú. Chi núu súcuan te ndiyi pedazo jeé un, te tahndē gā jeē tuhú un, te nducáhnú ga nuū catáhdé un. ¹⁷ Te suni tu cáchuhun vino jeé ini ññ túhú. Chi núu súcuan te ndatā ññ ún, te naa vino jíin ññ. Chi cánuú jéé chúhun i vino jeé ini ññ jéé, te súcuan te quéndō vāha ndindúú. Achí yá.

Jnūhun sēhe síhí Jairo jíin ñahan ní quehé yusáhma ya

(Mr. 5.21-43; Lc. 8.40-56)

¹⁸ Te níni cáhán Jesús táca jnúhun yáha, te ñn tēe cújéhnú nuū ñáyuu hebreo, ni quee de nuū yā. Te ni jecuiñī yití de nuū yā, te ni cahān de:

Sēhe síhí ná sá ní jihī i. Te núu na quíhín yō soó ní ndaha ní síquī i, te natecu i. Achí de.

¹⁹ Te ni ndocuiñī Jesús, te cuahān yā jíin de, te suni cuangoo tēe cáscuáha jíin yá. ²⁰ Te mēhñu ñáyuu cuangoo jíin yá ni quee ñn ñahan, te je ni cuu uxī uū cuiyā ndóho ña cuehyī niñī. Te ni quee ña ichi yátá yā, te ni quehé ña yusáhma ya. ²¹ Chi ni jeni ni ña: Vēsú maá sahma ya na níhín rī quehé rí,

te nduvāha ri, jéni ni ña. ²² Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje ró jéē cuu nasávāha ri rohó, te jeē yúcuan ní nduvāha ró, áchí yá.

Te ni nduvāha ña máá hora un.

²³ Te ná ni jinū Jesús vehe tēe cújéhnu ún, te ni jito ya nuū tēe cácuu músico jeē quíchindūji de i, jíin núū ñayuu cuehē, cásávaā i. ²⁴ Te ni cahān yā jíin i:

Cujiyo jíjnáhan ró, chí sūchi síhí yáha, tu ní jíhí i chí quíxí-ni i, áchí yá.

Te ni cajecū catá i jeē ni cáhān yā. ²⁵ Te ni quenehen ya ñayuu cuehē ún, te ni quívi ya ini vehe. Te ni jñi ya ndaha sūchi síhí ní jíhí ún, te ni ndocuñi-ni i. ²⁶ Te ní región yūcuan ní jítē núu jñūhun jñiñu jéhnu ní sáha ya ún.

Jeē ní nasávāha ya uū tēe cuáá

²⁷ Te ni quenda Jesús yūcuan cuáhān yā. Te uū tēe cuáá cuángoo de yatā yā, cácana jee de:

Máá ní jeē cúu ní Sēhe yucūn David, cundáhú ni ní sáña víi, achí de.

²⁸ Te ná ni jinū yā vehe, te ni jinūcoo tēe cuáá un núu yā. Te ni cahān yā jíin de:

¿A cá candíje ró jéē cúu nanune ri tinūu ró? achí yá.

Te ni cacahān de:

Cá candíje ná, áchí de.

²⁹ Yūcuán na te ni tee ya ndaha ya tinūú de, te ni cahān yā:

Na sáha ri nájnūhun cá candíje ró, áchí yá.

³⁰ Te ni cananune-ni tinūú de. Te Jesús ni cahān nīhin ya jíin de:

Ma cáchi cuiṭi rō nuū ni ñn, áchí yá.

³¹ Te máá de chi ni quendacoo de, te ni cajete-ni de jñūhun ní región yūcuan jeē súcuan ni sáha ya jíin de.

Jeē ní nasávāha ya ñn tēe ññhín

³² Te nuū ní quendacoo tēe un cuángoo de, te ni quecoo ñayuu jíin ñn tēe ññhín, jeē ññhun tachī ini de. ³³ Te ni quenehen ya tachī un cuáhān. Te tēe ññhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuiṭi yō ni ñn jniñu súcuan ini ñuu Israel, achí i.

³⁴ Te tēe grupo fariseo chi ni cacahān de:

Tēe yáha chí quénehen de tachī jíin fuerza maá jexeén jeē kujéñnu nuū tachī, achí de.

Jeē cundáhú ni yā ñayuu cuehē

³⁵ Te ni jica cuu Jesús tācá ñuu jíin rancho, te ni steén yā jñūhun ini tācá vehe ñ sinagoga. Te ni nacani ya jñūhun vāha ndese ndácu Yaā Dios jniñu. Te ni nasávāha ya ñayuu cácuñu na-ni cuehyí cándoho i. ³⁶ Te cundáhú ni yā jíto ya nuū ñayuu cuehē ún. Chi cándoho i te cácuñuhyá ni i, chí cácuu i nájnūhun lanchi jeē tú jitoño tī, chí tu ndíquín i Yaā cúu Jitoño i. ³⁷ Yūcuán na te ni cahān yā jíin tēe cácuáha jíin yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu. ³⁸ Núu súcuan te cacān tahu rō nuū maá Jítoño rō Yaā Dios jeē na tájí yá cuehē tēe na quíngoo de cahnde de trigo, cúu jeē nácani de jñūhun ya nuū ñayuu. Achí yá.

*Jeē ní nacāji ya uxī uū tēe apóstol
(Mr 3.13-19; Lc. 6.12-16)*

10

¹ Yūcuán na te ni cana ya uxī uū tēe jeē scuáha de jíin yá. Te ni jēhe ya poder nuū de jeē quenehen de tachī ini ñayuu, jíin jēē nasávāha de ñayuu cácu hū tācá ndinuū cuehyī.

² Te yāha cúu s̄hví ndihúxí uū tēe apóstol un: Tēe ñn cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan. ³ Yūcuán na te Felipe, Bartolomé, Tomás, Mateo tēe ni stútú xúhun renta, Jacobo sēhe Alfeo, jíin Lebeo jeē suni nání Tadeo, ⁴ jíin Simón tēe grupo cananista, jíin Judas Iscariote, tēe jeē ní nastúu de ya.

*Jeē ní tají yá ndihúxí uū de quinacani de jnūhun
(Mr. 6.7-13; Lc. 9.1-6)*

⁵ Te ni tají Jesús ndihúxí uū tēe yāha jeē quíngoo de. Te ni ndacu ya jniñu nuū de ndese sáha de:

Ma quíngoo ró núu ñáyuu jeē násūu ñáyuu hebreo cácuu i, ni ma quívicoo ró táca ñuu ñayuu Samaria.

⁶ Chi nuū maá-ni ñayuu nación yō Israel quíngoo ró, chi cácuu i nájñūhun lanchi jeē ní sana. ⁷ Te jeē quíngoo ró te suhva nacani ró jnūhun: Je ni cuyajni Yāā ndeé andiví jeē ndacu ya jniñu nuū rō, achi rō.

⁸ Te nasávāha ró ñáyuu cándoho cuehyī stehyú jíin ñáyuu cándoho táca gá cuehyī, te nastécu rō ndiyi te quenehen ró táchī ini ñayuu. Te súcuan-ni ni jēhe ri poder nuū rō jeē sáha ró, te suni súcuan-ni sáha ró jíin i.

9 'Te ma cóndiso ró xúhun oro, ni xūhun plata, ni centavo cuechí. 10 Ni ma cóndiso ró ñunu stáá caji rō ichi, ni inga camisa, ni ndijēn, ni vara. Chi siquī jniñu jeē nácani ró jnúhun nuū ñáyuu, te cánuú coto i róhó.

11 'Te na-ni ñuu chí rancho núu ni jinūcoo ró, te yūcuán nducú ró ññ ñayuu vāha, te coyūcu ró vehe i nde quingoo tucu ró. 12 Te jeē quivī ró vehe ñayuu ún, te cahān rō jeē na quíji jnúhun ndeyí jnúhun sīñ ni nuū i. 13 Te núu ñayuu vāha cácuu i, te jnúhun ndeyí ní cahān rō quendōo siquī i. Te núu nasūu ñáyuu vāha cácuu i, te jnúhun ndeyí ní cahān rō ma quéndōo siquī i. 14 Te núu íyó ñáyuu jeē tu cájetáhú i róhó, ni tu cúní i cuni nahín i jnúhun cahān rō, yūcuán na te quendacoo ró vehe un chí ñuu ún, te scóyo ró tícachā jehē rō, te súcuan stéén rō jeē iyó cuēchi i jeē tu ní cájetáhú i. 15 Jendaá cahán rī jíin ró jeē quivī juicio te xeēn gā coo castigo siquī ñuu casáha súcuan vēsú siquī ñuu Sodoma jíin ñuu Gomorra nuū ní casáha ndasí ñáyuu cuēchi.

Jeē coto xeēn ñayuu de jíjnáhan de

16 'Cuni sōho ró, chi tájí rí rohó quingoo ró nájnūhun lanchi mēhñu yíhī. Núu súcuan te coo listo rō nájnūhun coō, te coo vītá ni rō nájnūhun paloma. 17 Te condito ró máá ró nuū ñáyuu, chi quee quivī jeē quíndeca i róhó núu tohó, te caní i róhó ñni tǎcá vehe ññ sinagoga. 18 Te suni nde nuū tǎcá gobernador jíin rey quíndeca i róhó jéē siquí ruhū. Te súcuan te nune ichi jeē nacani ndaā rō jnúhun ri nuū de jíin núu ñáyuu tǎcá nación jeē tu jíin jnúhun Yaā Dios. 19 Te núu ni jendeca i róhó núu tǎca téé ún, ma nácani ndasí ni rō ndese cahān

rō. Chi máá hora un te máá yá steén nuū rō ndese cahān rō. ²⁰ Chi nasūu máá ró cúu jeē cahán, chi Espíritu maá Tátá rō cúu jeē cahán jíin yuhu ró.

²¹ Te sava ñayuu tu cá candíje, nastúu i ñani i jeē na cúu. Te tátá nastúu sēhe. Te sēhe ndonda siquī tátá jíin náná jeē na cúu. ²² Te ndihí ñayuu quiṭi ni i nuū rō jeē siquī ruhū. Te ñayuu jeē cuiñi nīhin nde jeē jínu jnūndóho, ñayuu ún chi cācu ánuá i. ²³ Te núu cájito xeēn i róhó ñn ñuu, te cunu ró quihīn rō inga ñuu. Chi jendaá cahán rī jíin ró jeē ma ndécāva ró caca cuu ró ndihí nació n yō Israel te ndiji-ni máá rí, Yaā ní nduu tēe.

²⁴ 'Īn tēe scuáha, tu cújéhnu de nuū maestro de. Ni tēe cúu mozo, tu cújéhnu de nuū patrón de. ²⁵ Tēe scuáha chi nájnūhun ndóho maestro de suni súcuan ndoho nahín máá de, te tēe cúu mozo suni ndoho de nájnūhun ndóho patrón de. Núu súcuan te núu ruhū cácahān i jeē Satanás cúu ri, te nagā ni cuu jeē ma cahán i jeē rohó cácuu Satanás.

*Jeē ní cachi yā ndé ñn cúu jeē yūhu yó
(Lc. 12.2-9)*

²⁶ 'Núu súcuan te ma yūhu ró coto ró ñáyuu. Chi tāca jnūhun cácahān sāhí i ma quéndōo sāhí cuiṭi, chi ndihí natūu ndijin, te cuni ñayuu. ²⁷ Jnūhun ní cahān rī jíin ró jeē tu ní jíiní ñayuu, na nácastūhun cájí ró nuū i. Te jnūhun ní nacani sāhí rí nuū rō, na nacani jee ró yátā tācá vehe. ²⁸ Te ma yūhu ró coto ró ñáyuu cahni yiqui cúñu rō, chi ma cúu cahni i ánuá rō. Chi sa suhva yūhu ró jéē ma stívi ró núu Yaā Dios, chi cuu snáhnú ndetū yā rohó jéē quívi ánuá rō jíin yiqui cúñu rō infierno.

29 'Te tǎcá saa chi tú yahu ndéé tī, chi nde uū tī jeē ñn centavo lulí. Te ni ñn ti tu nínga nuū ñúhun te núu tu jéhe Tátá rō jnūhun, chi ndíto ya ti. 30 Te nagā ni cuu rǒhó jijnáhan rǒ, chi nde ndihí ixi xíní rō je ni cahu ya. 31 Núu súcuan te ma yūhu rǒ jijnáhan rǒ, chi cánuú ndasí gá rō nuū yā vēsú cuehē tǎcá saa.

*Ñayuu jejnúhún Jesucristo nuū ñga ñayuu
(Lc. 12.8-9)*

32 'Te tǎca ñayuu jeē cuajnúhún rúhū nuū ñga ñayuu, suni súcuan cuajnúhún rí i nuū Tatá rī, Yaā ndeé andiví. 33 Te tǎca ñayuu jeē ma cuájnúhún rúhū nuū ñga ñayuu, suni súcuan ma cuájnúhún rí i nuū Tatá rī, Yaā ndeé andiví.

*Jeē siquí Jesús te cusñn ini ñayuu
(Lc. 12.51-53; 14.26-27)*

34 'Ma cáni ni rō jijnáhan rǒ jéé véji ri jeē cóyūcu manī ñayuu ñayiví. Tú véji ri jeē cóyūcu manī ñayuu, chi sa suhva cuajnáhan i jeē siquí ruhū. 35 Chi jeē siquí ruhū te cusñn ini sēhe yí jín tátá, te sēhe síhí jín náná, te sēhe jēnu jín náná chīsó. 36 Chi tǎca ñayuu candíje ruhū, chi jnáhan vehe i cúu jeē quitī ni nuū i.

37 'Te núu ndé ñn ñayuu manī gā i jín tátá i chí jín náná i vēsú jín rúhū, nasūu ñayuu vāha cúu i jeē cóndiquñ i ruhū. Te núu ndé ñn ñayuu manī gā i jín sēhe yí i chí jín sēhe síhí i vēsú jín rúhū, te suni nasūu ñayuu vāha cúu i jeē cóndiquñ i ruhū. 38 Te na-ni ñayuu núu tu jéhe i jnūhun ndoho i jnündóho vēsú nde cuu i jeē siquí jeē cóndiquñ i ruhū, nasūu ñayuu vāha cúu i jeē cóndiquñ i ruhū. 39 Te núu ndé ñayuu cúní i cācu i nuū jnúndóho quiiji nuū i jeē siquí ruhū, núu súcuan te jnahnū ndetū i ní cáni.

Te núu ndé ñin ñayuu vēsú na cúu i jeē siquí ruhū, te cotecu i ñí cáni.

Jeē iyó táhū yō nuū Yaā Dios

(Mr. 9.41)

⁴⁰Te ñayuu cuatáhú róhó jijnáhan ró, núu súcuan te ruhū cájetáhú i. Te ñayuu cájetáhú rúhū, cájetáhú i Yaā ní tají rúhū vēji ri. ⁴¹Núu na-ni ñayuu cuatáhú i ñin tēe nácani jnūhun Yaā Dios, siquí jeē jíca de jniñu Yaā Dios, núu súcuan te inuú-ni coo tahū de nuū Yaā Dios jíin tēe nácani jnūhun Yaā Dios. Te núu na-ni ñayuu cuatáhú i ñin tēe ndaā, siquí jeē tēe ndaā cúu de, núu súcuan te inuú-ni coo tahū de nuū Yaā Dios jíin tēe ndaā. ⁴²Te núu ndé ñayuu cuāha i vēsú ñin ñajin ndute míjin coho ñin sūchi yáha, siquí jeē cúu i sūchi cándíje ruhū, ndaā ndije cúu jeē nihín i tahū i. Achí yá.

Jeē ní tají Juan uū tēe nuū yā

(Lc. 7.18-35)

11

¹Te ná ni jīnu ni ndacu Jesús jniñu nuū ndihúxí uū tēe cáscuáha jíin yá, te ni quenda ya yūcuan cuáhān yā jeē steén yā te nacani ya jnūhun tācá ñuu región yūcuán.

²Te íne Juan vecāa. Te ni nihín de jnūhun tācá jniñu sáha Cristo. Te ni tají de uū tēe cáscuáha jíin de, ³cuacajñuhún de ya:

¿A máa ní cúu Cristo jeē achí tutu jeē quíji, chí condetu yó inga tēe quiji? áchí de.

⁴Te ni cahān yā jíin de:

Cuángoo te castūhun ró nuū Juan tācá jniñu cájito ró jíin jnūhun cájini ró. ⁵Te cachi rō nuū de

jeē ñáyuu cuaá cánanune tinūú i, te ñayuu yacúa cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñáyuu ndahú jéē jnama Yaā Dios i. ⁶ Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jiín de.

⁷ Te náa cuanuhun ndīndúú tēe ún, te ni quejéé Jesús cahán yā jnūhun Juan jiín ñáyuu:

¿Na vé ni jécondēhe ró jijnáhan ró nde nuū ñūhun téhé? ¿A ñn tēe jéni ñn jéni uū ni, nájnūhun ite jeē cánda sáha tachī? ⁸ Te núu tuú, ¿te na vé ni jécondēhe ró núu súcuan? ¿A ñn tēe cúní kujéhu jeē ñūhun sahma lúu? Tuú chi cájini rō jeē tēe cáñuhun sahma lúu, máni ini vehe rey cáyūcú de. ⁹ ¿Te na vé ni jécondēhe ró núu súcuan? ¿A ñn tēe nácani jnūhun Yaā Dios? Cáhán rī jiín ró jeē suu ni jecondēhe ró, te cújéhu ga Juan yáha vēsú tāca gá tēe ni canacani jnūhun Yaā Dios. ¹⁰ Chi jnūhun Juan cúu jeē ni cáhān Yaā Dios jeē yosó núu tútu i:

Tají rí tēe nacani jnūhun ri cosnūú de ichi núu Cristo,

návāha coo tūhva ñayuu jeē jinú yā.

Achí Yaā Dios, achí tutu. ¹¹ Te jendaá cahán rī jiín ró jeē ini ñayiví yáha cújéhu ga Juan tēe scuándute vēsú tāca gá tēe jeē ni íyo ini ñayiví. Te vēsú súcuan te tāca tēe núu ga ini ñuu nuū ndácu Yaā andiví jniñu, cújéhu ga de vēsú Juan.

¹² Te nde quiví ní quee Juan tēe scuándute, te nde vijna, chi cánducú ndéyí ñáyuu quivícoo i ndaha Yaā andiví jéē ndácu ya jniñu nuū i. Te nde ñayuu xeēn cánducú ndéyí i siquī. ¹³ Chi nde ná tu quiji

Juan, te ni ïyo máá ley Moisés, te suni ni ïyo tāca tée ni canacani jnūhun Yaā Dios. Te ni cacastūhún de ndese coo jeē ndacu Yaā Dios jniñu. ¹⁴ Te ni cacahān de jeē ndíji Elías. Te núu cáacuni rō cuatáhú ró jnūhun, te jíni rō jeē maá Juan cúu tēe jeē ní cachi tutu jeē quíji, chí cúu de nájñūhun Elías. ¹⁵ Tāca róhó jēe jíni sōho, na chúsóhó ró.

¹⁶ Yāhá cachi rī ñn jnūhun yátá návāha na cúni rō ndese cúu ñayuu tiempo vijna. Cúu i nájñūhun sūchi lúli cáhīn nuū yáhu cácasíquí i. Te cácana ndee i xinī jnáhan i: ¹⁷ Ni cativi rī scuili, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájñūhun cándāa sūchi lúli un jēe tu ní núnahan ni i ni ñn, súcuan cándāa ró. ¹⁸ Chí ni quíji Juan te cuehē jínu ni ïyo ndite ni de, tu ní yéji de ni tu ní jíhi de. Te tu ní cánujnahan ni rō, chí ni cacahān rō jeē ñūhun tachī ini de. ¹⁹ Yūcuán na te ni quee maá rí, Yaā ní nduu tēe, te yéji rī jíhi ri, te tu cánujnahan ni rō, te chísoó jnūhun ró cácahān rō jeē máni máá jēe yéji rī jíhi ri vino. Te quíjnahan ri jíin tēe cástútú xūhun renta jíin táca gá tēe cásaaha cuēchi, áchí ró. Te núu cúndichí ñn tēe jíin jnūhun Yaā Dios, te jíin jniñu sáha de te nátūu jeē tēe ndíchí cúu de. Achí yá.

*Jeē ní cúxeēn yā nuū sava ñuu nīhni ni
(Lc. 10.13-15)*

²⁰ Yūcuán na te ni quejéé yá cúxeēn yā nuū tācá ñuu nuū ni sáha ya cuehē jniñu jéhnū, chí tu ní canacani ni i jeē stóo i cuēchi i. Te ni cahān yā:

²¹ Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chí núu ini ñuu Tiro jíin ñuu Sidón ni sáha ri jniñu jéhnū

jeē ni sáha ri ini ñuu maá ró, te yachī nacani ni ñayuu ñuu un jéē stóo i cuēchi i núú. Te sáha i seña jeē steén jeē nácani ni i siquī cuéchi i, chi cuhun i sahma jnúú te chuhun i yaā xinī i núú. ²² Núu súcuan te cáhán rī jín ró jeē quivī coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jín ñuu Sidón. ²³ Te róhó ñáyuu ñuu Capernaum, ¿á cájeni ni rō jeē cujéhnú ró nájñūhun ñn jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndīyí. Chi núu ini ñuu Sodoma ni sáha ri jniñu jéhnú jeē ni sáha ri nuū maá ró, te coo ñuu yúcuan ndé vijna núú. ²⁴ Núu súcuan te cáhán rī jín ró jeē quivī coo juicio te xeēn gā coo castigo siquī rō vēsú jeē ni íyo siquī ñáyuu ñuu Sodoma. Achí yá.

*Nehen nuū rī ndetātu ró, achí yá
(Lc. 10.21-22)*

²⁵ Te suni quivī un ní cahān Jesús:

Na cútahū na núu ni Tátā, Jitoho andiví jín ñáyiví. Chi ni jesi ní táca jnúhun ndíchí ní, jeē ma cūni ñayuu ndíchí jín ñáyuu tūhva cuenta ñáyiví yáha. Te ni steén ni núu ñáyuu cácuu nájñūhun sūchi lúli. ²⁶ Chi súcuan ni nujnahan ni ni Tátā, achí yá.

²⁷ Te ni cahān gā yā:

Ndivii ni jéhe Tátá rī nuū rī. Te tu cájini ñayuu ndé ñn cúu ruhū, Sēhe Yaā Dios, chi máá-ni Tátá rī cúu jeē jiní yā ruhū. Ni tu cájini ñayuu ndese Yaā cúu máá Tátá, chi máá-ni Sēhe cúu jeē jiní. Te íyó ñáyuu jeē cuní maá Séhe steén yā nuū i ndese Yaā cúu Tátá yā, te máá i suni cuni i. ²⁸ Tāca ró jéē ni cuíta ró jín táca jniñu jín ley jeē yí sáha jín ró, nehen quivīcoo ró ndaha ri, te ndetātu ró sáha ri.

²⁹ Quiv̄i ró núū jniñu ndácu máá rí, te scuáha ró coo ró nájnūhun íyó máá rí. Chi vītá ni rī te suchí ni rī. Te súcuan te ndetātu ró jíin ánuá rō sáha ri. ³⁰ Chi tú yí jéē cuandetū rō nuū rī, ni tú yí jéē squícu ró jniñu ndácu ri. Achí yá.

*Jeē ní cataxín de yoco trigo quiv̄i ndétātú
(Mr. 2.23-28; Lc. 6.1-5)*

12

¹ Te ñn quiv̄i ndétātu ní yāha Jesús cuahān yā nuū cáa trigo. Te tēe cáscuáha jíin yá, cájiī de sōco. Te ni quejéē de cátaxín de yoco trigo cáyeji de. ² Te ni cajito tēe grupo fariseo, te ni cacahān de jíin yá:

Condēhé, chi tēe cáscuáha jíin ró casáha de jniñu jeē tu íyó váha sáha yó quiv̄i ndétātú, áchí ley Moisés.

³ Te ni cahān maá yá jíin de:

¿A tu ní cácahu ró tutu ndese ni sáha David, ñn quiv̄i jeē ni jíī de sōco jíin tēe cáhīn jíin de? ⁴ Te ni quiv̄i de ini vehe Yaā Dios. Te ni yeji de pan īi jeē yosó ndijin nuū Yaā Dios. Te tú na ley jeē cáji de, ni tēe cáhīn jíin de, chi máá-ni sutū cuu caji. Te vēsú súcuan te tú na cuēchi ní íyo siquī de. ⁵ ¿Te á tu ní cácahu ró tutu ley Moisés, ndese cásajniñu sutū ini templo, vēsú quiv̄i ndétātu cúu? Te tú na cuēchi íyó síquī de, vēsú quiv̄i ndétātu cásajniñu de jniñu jeē cácuu de sutū. ⁶ Te cáhān rī jíin ró jeē máá rí jeē iyó yáha, cújēhnu ga rī vēsú templo. ⁷ Te tu cájecūhun ni rō jijnáhan ró jnūhun yáha jeē yosó núū tútu īi jeē ni cáhān Yaā Dios: Jeē cuní gā rī cúu jeē cundáhú ni rō jnáhan ró, vēsú jeē socó rō quiti nuū rī, achí yá. Te núu jeē ní cajecūhun ni rō jnūhun yáha, te ma cahān rō súcuan siquī tēe jeē tú na cuēchi núu. ⁸ Chi ruhū,

Yaā ní nduu tēe, máá rí cúu jeē ndácu jniñu siquī ndese sáha ñayuu quiivī ndétátú, áchí yá.

Jeē ní nduvāha tēe ni ichī ndaha

(Mr. 3.1-6; Lc. 6.6-11)

⁹ Yūcuán na te cuahān Jesús, te ni quiivī ya ini vehe iī sinagoga. ¹⁰ Te yūcuan íne ñn tēe ni ichī ñn ndaha de. Te cácu ni tēe grupo fariseo jeē nihīn de cuēchi siquī yā, te ni cacajñuhún de ya:

¿A íyó ley jeē cuu nasávāha yó ñayuu cuhú quiivī ndétátú? áchí de.

¹¹ Te ni cahān yā jíin de:

¿Ndé ñn róhó, núu névāha ró ñn lanchi, te núu nínga tí ini ñn yaū quiivī ndétátú, te á tu jéhén rō natava rō tí, chí naún? ¹² ¿Te á tu cánuú ndasí gá ñn tēe vésú ñn lanchi? Núu súcuan te vetū-ni sáha yó jniñu váha quiivī ndétátú, áchí yá.

¹³ Yūcuán na te ni cahān yā jíin tēe ni ichī ndaha ún:

Scaá ndaha ró.

Te ni scaá de, te ni nduvāha-ni nájnūhun íyó inga.

¹⁴ Yūcuán na te ni quendacoo tēe grupo fariseo, te ni candajñuhún de siquī Jesús, ndese cahni de ya.

Jnūhun Jesús jeē ni cáhān Isaías nde jenahán

¹⁵ Te ni jini Jesús jeē súcuan cájeni ni de, te ni quenda ya yūcuan cuahān yā. Te cuehē ñayuu cándiquīn i ya. Te ni nasávāha ya ndihī ñayuu cuhú.

¹⁶ Te ni ndacu ya jniñu nuū i jeē ma stéen i ya. ¹⁷ Te súcuan ni cuu návāha squícu jnūhun ni cahān Yaā Dios siquī Jesús, te ni nacani Isaías jnūhun ya un ndé jenahán:

¹⁸ Yāha cúu mozo rī jeē ní nacāji rī, te manī rī jíin yá, te cúshī ni rī jíin yá.

Te cuāha ri Espiritu rī coo jín yá.
Te máá yá sándaā jniñu ñayuu tǎcá nación.

¹⁹ Ma tejnáhan ya, ni ma cána jee ya,
te ni ma cahán jee ya ichi jeē cúni ñayuu.

²⁰ Ma sáha xeēn yā jín ñáyuu ni cunīhin jnūndóho
siquī,

ni ma snāā yā ñayuu jeē maá lulí-ni cá candíje.

Chi cujéhnú ya siquī ndihí, te ndaā ndacu ya jniñu.

²¹ Te ñayuu tǎcá nación cocuhun ni i jeē jnáma ya i.
Achí Yaā Dios, achí Isaías nde jenahán.

*Jeē ní cacahān de jeē jejniñu ya fuerza Satanás
(Mr. 3.19-30; Lc. 11.14-23; 12.10)*

²² Yūcuán na te ni caquindeca i nuū yā in tēe
cuáá ñíhín, chí ñúhun tachí ini de. Te ni nasávāha
ya de. Te ni ndundijin tinūú de te ni nacahān de.

²³ Te ndihí ñayuu cuehē un ní canaa ni i cájito i, te
ni cacahān i:

¿A tēe yáha cúu jeē ni cáhān Yaā Dios jeē cacu nuū
yucūn David? áchí i.

²⁴ Te tēe grupo fariseo, ni cajini de jeē súcuan
cácahān i. Te ni cacahān de:

Tēe yáha ma cúu quenehen de tachí núu jeē tu
sáha de jín fuerza Satanás jeē cujéhnú nuū tachí,
áchí de.

²⁵ Te Jesús ni jini yā jeē súcuan cájeni ni de, te ni
cahān yā jín de:

Tǎcá nación jeē casásin máá te cájejnáhan máá,
núu súcuan te snāā jeē iyó váha máá. Te núu in ñuu
chí in vehe casásin máá te cájejnáhan máá, te ma
cúu ga coyūcu cáhnu. ²⁶ Te suni súcuan Satanás núu
quenehen jnáhan tachí, núu súcuan te sásin máá.
¿Te ndese cuiñi nīhin Satanás jeē ndácu jniñu núu
súcuan? ²⁷ Chi cácahān rō jeē jín fuerza Satanás

quénehen ri tachī. Te núu súcuan cúu núú, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jijnáhan i cachi jeē ní castívi ndasí suhva ró ni cacahān rō jeē cáquenehen ri tachī jíin fuerza Satanás. ²⁸ Te tuú chi sa jíin Espíritu Yaā Dios cúu jeē quénehen ri tachī. Núu súcuan te je ndéé Yaā Dios mēhñu ró jeē ndácu ya jniñu.

²⁹ ¿Chi ndese cuu quívi ñin tēe ini vehe tēe ndacuī jeē quenehen de ndajníñu de? Chi cánuú jeē xíhna gā cuhni de tēe ndacuī ún, te yūcuán na te cuu quenehen de ndajníñu ún. Te suni súcuan cúu jeē jíhni rī Satanás te quénehen ri tachī.

³⁰ Te ñayuu tu íyó mánī jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

³¹ Jeē yúcuan cáhán rī jíin ró: Iyó modo coo jnūhun cáhnu ni nuū tāca cuéchi cásáha ñayuu, jíin núu tāca jnúhun néé cácahān i. Te núu cahān ndevāha i síquī Espíritu Santo, te ma cóne cáhnu ni Yaā Dios nuū i. ³² Te núu na-ni ñayuu cahān i síquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i síquī Espíritu Santo, ma cóne cáhnu ni Yaā Dios nuū i, ni jeē iyó i ñayívi yáha, ni ní tiempo quíji.

Jnūhun yujnu váha jíin yujnu néé

(Lc. 6.43-45)

³³ Núu yujnu váha, te vāha ndehē, te núu yujnu néé, te cánéé ndehē. Chi jíin ndéhē te jíní yō ndese yujnu cúu. Te suni súcuan ñayuu. ³⁴ Va sēhe coō cácuu ró, chi xeēn rō nájjnūhun coō. ¿Ndese cuu cahān rō jnūhun vāha, chi ñayuu cásáha néé cácuu

ró? Chi jniñu jeē jéni ni anuá ñayuu, máni yūcuan cáhán i. ³⁵ Tēe vāha cáhán de jnūhun vāha, chi íyó ndáa anuá de. Te tēe sáha néé cáhán de jnūhun néé, chi cánéé ánuá de. ³⁶ Te cáhán rī jín ró jeē tācá na-ni jnūhun cácahān ñayuu, nacuāha i cuenta jnūhun un quivī coo juicio. ³⁷ Chi jín jnúhun ni cahān rō sándaā yā siquī rō, núu jeē quéndōo ndaā rō chí jéē cóndee cuēchi siquī rō. Achí yá.

Jeē ní cajicān ñayuu tu cácaandíje ñn jniñu jéhnú
(Mr. 8.12; Lc. 11.29-32)

³⁸ Yūcuán na te jecu tēe grupo fariseo jín tēe cástéén tutu ley Yaā Dios, ni cacahān de jín yá:

Maestro, cáconi na jéē sáha ní ñn jniñu jéhnú jeē steén núu máá ní cúu Yaā ní tají Yaā Dios, achí de.

³⁹ Te ni cahān yā jín de:

Ñayuu yáha jeē casáha jniñu néé, tu cájetáhú cuiti i Yaā Dios. Te cájicān i ñn jniñu jéhnú jeē steén núu Yaā ní tají Yaā Dios cúu rī. Te tuá na inga jniñu jéhnú stéén rī nuū i, chi máá-ni jniñu jéhnú nájnūhun ni cuu jín Jonás, tēe ni nacani jnūhun Yaā Dios. ⁴⁰ Chi nájnūhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone rī chíji ñuhun unī nduú unī ñuú, te sáa te natecu rī. ⁴¹ Te tāca ñáyuu ñuu Nínive nuū ní nacani Jonás jnūhun, natecu i jín ñáyuu tiempo yáha, quivī juicio jeē sándaā yā cuēchi, te cahān i cuēchi siquī ñáyuu yáha. Chi máá i ni canacani ni i ni castóo i cuēchi i quivī ní nacani Jonás jnūhun nuū i. Te vijna chí cújéhnú ga ruhū Yaā íne yáhá vésú Jonás, te tu cácaandíje ró rúhū. ⁴² Te reina jeē ní cújéhnú nación ichi sur, natecu ña jín ñáyuu tiempo yáha, quivī juicio jeē sándaā yā cuēchi, te

cahān ña cuēchi siquī i. Chi nde jicá téyí ní quiji ña ni jini nahín ña jnūhun ndíchí ní cahān rey Salomón. Te vijna chi cújéhnu ga ruhū, Yaā íne yāhá vēsú Salomón, te tu cácdíje ró rúhū.

*Tachī jeē nastútú jnáhan ndívi ini ñayuu
(Lc. 11.24-26)*

⁴³ Núu ni quenda ñn tachī ini ñn tēe tu cácdíje, te jica cuu nuū ñūhun téhé, ndúcú núu ndétátú, te tu níhín, yūcuán na te jéni ni maá: ⁴⁴ Na quínuhun rī vehe nuū ní quenda rī. Te núu ni ndee tucu, te jító jeē tēe tu cácdíje ún, cúu de nájnūhun ñn vehe íyú te ni ndundoo. ⁴⁵ Yūcuán na te jéquihin uxā gā tachī neé gá vēsú maá. Te quívicoo ini tēe un jēe cóyūcu yúcuan. Núu súcuan te xeēn gā ndoho tēe un jēe sándíhí vēsú jeē xíhna ñūhún. Te suni súcuan ndoho ñayuu tiempo yáha jeē casáha néé. Achí yá.

*Náná yā jíin ñani yā
(Mr. 3.31-35; Lc. 8.19-21)*

⁴⁶ Te níni súcuan cáhán yā jíin ñayuu ún, te ni quee naná yā jíin táca ñani yā, íin ña nuū quéhe, te cúní ña cahān ña jíin yá. ⁴⁷ Te ni cachi ñn tēe nuū yā:

Náná ni jíin táca ñani ni cáhíin nuū quéhe, te cácuini cahān jíin ní, achí de.

⁴⁸ Te ni cahān yā jíin tēe ni cahān súcuan jíin yá:
¿Ndé ñn cúu náná rī, te ndé ñn cácuu ñani rī? Achí yá.

⁴⁹ Te ni steén ndaha yá nde nuū cáyūcu tēe cáscuáha jíin yá. Te ni cahān yā:

Suni náná rī jíin ñani rī cácuu tāca jēe yáha. ⁵⁰ Chi tāca ñayuu casquícu jniñu cúní maá Tátá rī, Yaā ndeé andívi, suu cácuu ñani rī, cuāha rī, náná rī. Achí yá.

Jnūhun yátá síquī tēe jéte trigo
(Mr. 4.1-9; Lc. 8.4-8)

13

¹ Te quivī un ní quenda Jesús vehe cuahān yā, te ni jinū yā ni cucōo ya yumar. ² Te ni cutútú cuéhē ndasí ñayuu nuū yā. Te ni quivī ya ini ñn barco, ni cucōo ya. Te tāca ñayuu un cáyūcú i yumar. ³ Te jín jnūhun yátá ni cahān yā cuehē jnūhun nuū i, te súcuan ni cahān yā:

ñn tēe cate trigo, ni quenda de jeē cate de. ⁴ Te ná ni quejé de jéte de, te jecu trigo ni jitē yuhíchi. Te ni quecoo saa, ni cayeji tī. ⁵ Te jecu gā trigo ni jitē nuū ñūhun yuū, nuū tú cuehē ñuhun. Te yachi-ni ni cane, chi tu cóquin ñuhun. ⁶ Te nuū ní cane niāndii, te ni ichī-ni, te ni casun, chi tu ní níhín nuū quihín yoho. ⁷ Te jecu gā trigo ni jitē nuū náne iñu. Te ni jehnu iñu ún, te ni jesi nuū. ⁸ Te jecu ni jitē nuū ñūhun váha, te ni jēhe cuehē nunī. Sava ni jēhe ciento jeē ñn ñn, te sava ni jēhe unī xico, te sava ga ni jēhe ocō uxī. ⁹ Tāca róhó jéē jíni sōho, na chúsóhó ró. Achí yá.

Najehē cahán yā máni jnūhun yátá
(Mr. 4.10-12; Lc. 8.9-10)

¹⁰ Yūcuán na te tēe cácuáha jín yá un ní quecoo de nde nuū yā, te ni cacajñuhún de ya:

¿Najehē cúu jeē máni jnūhun yátá cahán ni jín ñayuu? achí de.

¹¹ Te ni cahān yā jíni de:

Róhó jíjnáhan ró chi sáha ya jeē cájecūhun ni rō jnūhun ni yisāhi yáha, ndese quivīcoo ñayuu ndaha Yaā andiví jeē ndacu ya jniñu nuū i. Te ñayuu yáha

jéē tu cá candíje, chi ma jécūhun ni i. ¹² Chi ñayuu je jécūhun ni, chi stéén gā yā nuū i, te víhyá gā cuni i. Te ñayuu tu cándíje, sa suhva naa jecu jeē je jíní i ún. ¹³ Jeē yúcuán cáhán rī jnūhun yátá jíín i. Chi vésú cájito i, te quendōo i nájnūhun jeē tú na vé ni cájito i. Te vésú cájini sōho i, te ma jécūhun ni i, te quendōo i nájnūhun jeē tú na vé ni cájini i. ¹⁴ Ñayuu yāhá chi squícu siquī i jnūhun ni cahān Yaā Dios jeē ní nacani Isaías, tēe ni nacani jnūhun nde jenahán: Vésú cuni nahín ró, te ma jécūhun ni rō, te vésú coto ró, te ma nácuni rō.

¹⁵ Chi ñayuu yáha yōhyo ni ndunīhni ni i, te yōhyo uhū chusóhó i, te nájnūhun cájesi i tīnūú i, návāha coo nájnūhun jeē tu cájito i, ni tu cájini nahín i, te ni ma jécūhun ni i, ni ma násāma ini i quīvicoo i nuū rī jeē nasávāha ri anuá i nuū cuéchi i. Achí Yaā Dios, achí tutu.

¹⁶ Te máá ró jíjnáhan ró, yōhyo ndetū rō, chi cájito ró jíín tīnūu ró, te cájini nahín ró jíín sóho ró. ¹⁷ Chi jendaá cahán rī jíín ró jeē cuehē tēe ni canacani jnūhun Yaā Dios jíín cuehē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

*Jeē ní castūhun cájí yá jnūhun yátá tée jéte trigo
(Mr. 4.13-20; Lc. 8.11-15)*

¹⁸ Núu súcuán te cuni nahín jíjnáhan ró na vé cuní cahān jnūhun yátá tée jéte trigo: Trigo un cúu jnūhun Yaā Dios. ¹⁹ Te ñayuu cájini sōho jnūhun

ndese ndácu Yaā andiví jniñu, núu tu cájecūhun ni i te cácuu i nájnūhun trigo jeē ni jítē yuhíchi. Yūcuán na te quiji jexeén te quēnde-ni jnūhun ini anuá i. ²⁰ Te trigo jeē ni jítē nuū ñúhun yuū cúu nájnūhun ñayuu cájini sōho jnūhun, te yachī-ni cájetáhú i te cácusī ni i jíin. ²¹ Te tu cúcutú jnúhun ún ini anuá i, te jecu-ni quiivī cájetáhú i. Te núu ni quejéé jnúndóho, chí jító xeēn ñayuu i síquī jnúhun ún, te quéjéé nácani yátá ni i. ²² Te jeē ni jítē nuū náne iñu cúu ñayuu cájini nahín jnúhun, te cándihvī ni i síquī jeē iyó ini ñayivī yáha, te cúní i cucúcá i, te stáhú un i cujnéñu i jíin. Te ndihī jeē yáha jési nuū jnúhun ya, te tu íje i jíin jnúhun ya. ²³ Te trigo jeē ni jítē nuū ñúhun váha cúu nájnūhun ñayuu cájini nahín jnúhun, te cájecūhun ni i, te cáhije i jíin jnúhun ya. Te sava i cúu nájnūhun nunī jeē jéhe ciento jeē ñin ñin, te sava ga i jéhe unī xico, te sava ga i jéhe ocō uxī. Achí yá.

Jnúhun yátá síquī ite lasú

²⁴ Te ni cahān yā inga jnūhun yátá jíin de:

Jeē ndácu Yaā andiví jniñu cúu nájnūhun ñin tēe jeē ní jete de trigo váha nuū ñúhun de. ²⁵ Te íyó ñin tēe jító uhū de tēe chíi trigo. Te náa cáquixī tēe chíi trigo jíin táca jnáhan de, te ni jehēn ni jete ndiquin lású nuū trigo de, te cuahān. ²⁶ Te nuū ní cane trigo ún, te ni cane yoco i, te suni súcuan ni jehnu ite lasú un. ²⁷ Yūcuán na te ni jengoo mozo ni cacahān i jíin patrón i: ¿A násūu trigo váha ní jéte ní núu ñúhun ní? ¿Te ndese cúu jeē ní canecoo ite lasú nuū? ²⁸ Te ni cahān de jíin i: ñin tēe jító uhū ruhū ni sáha jeē yáha. Te ni cacahān mozo un jíin de: ¿Núu súcuan te á cúní ni jéē na quíngoo ná te jnūhun ná? áchí i.

²⁹ Te ni cahān de: Tuú, chi núu jnuhun ró lású un te sanaa te jnuhun ró ndé jíin trigo. ³⁰ Vāha ga na cuéhnu máá ndé quivī tahndé. Te quivī un cáhān rī jíin tée cahnde jeē xīhna gā ite lasú cahnde de, te chucú tūtú de návāha cahmu yó. Yūcuán na te trigo chi cahnde de ndīvī ini yacā rī, achí de. Achí yá.

Jnūhun yátá síquī ndiquin mostaza

(Mr. 4.30-32; Lc. 13.18-19)

³¹ Te suni ni cahān yā inga jnūhun yátá jéē steén yā ndese ndúcuehē ñayuu ndácu Yaā andiví jniñu nuū:

Ndúcuehē i nájnuhun jéhnū ñn ndiquin mostaza jeē ní jequin ñn tēe nuū ñúhun de. ³² Te jendaá jeē ñn ndiquin lúlí gá cúu vēsú tāca gá ndiquin. Te núu ni jehnu, te cúu cáhnu ga vēsú tāca gá yucū, chi ndúu nájnuhun ñn yujnu. Te quijicoo saa, te cásáha ti tacā tī chíji ndaha ún. Achí yá.

Jnūhun yátá síquī levadura

(Lc. 13.20-21)

³³ Te inga jnūhun yátá ní cahān yā jíin de:

Jeē ndácu Yaā andiví jniñu nuū ñáyuu cúu nájnuhun levadura jeē ní quihin ñn ñahan. Te ni saca ña jíin únī kilo harina, nde ni ndaa ndihí ñujen ni sáha. Achí yá.

Jeē máni jnūhun yátá cáhān yā jíin i

(Mr. 4.33-34)

³⁴ Tāca jnúhun yáha ní cahān Jesús jíin ñáyuu cuehē ún. Te tāca jéē ni stéén yā, máni jnūhun yátá ní cahān yā jíin i. ³⁵ Súcuan ni sáha ya návāha squícu jnūhun ni cahān tēe ni nacani jnūhun Yaā Dios nde jenhán:

Cahān rī tāca jnúhun yátá jíin ñáyuu,

te cachi rī tāca jnūhun yísāhí ndé quiṽí ní jecōo
ñayīṽí.

Achí tutu, áchí yá.

Jeē ní castūhun cájí yá jnūhun ite lasú

³⁶ Yūcuán na te ni nacuatáhu Jesús nuū ñáyuu. Te ni ndīṽí ya ini vehe. Te tēe cáscuáha un ní jinūcoo de nuū yā, te ni cacahān de jíin yá:

Nacani cájí ní jnūhun yátá ite lasú nuū ná, áchí de.

³⁷ Te ni cahān yā jíin de:

Jeē jéte trigo vāha un cúu máá rí, Yaā ní nduu tēe. ³⁸ Te ñuhun un cúu ñayīṽí. Te trigo vāha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén. ³⁹ Te tēe jíto uhū jeē ní jete lasú un cúu máá jexeén. Te quiṽí tahndé cúu quiṽí jínu ñayīṽí. Te tēe cahnde un cácuu ndajéhé Yaā Dios. ⁴⁰ Te nájnūhun tahndē ite lasú te cayū nuū ñuhún, súcuan coo quiṽí jínu ñayīṽí.

⁴¹ Chi máá rí, Yaā ní nduu tēe, tají rí ndajéhé rī quingoo. Te nastútú yá tāca ñáyuu casquīṽí jnáhan nuū cuéchi, jíin ñáyuu casáha jniñu néé, quenehen ya i mēhñu ñáyuu ndácu ri jniñu nuū. ⁴² Te jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. ⁴³ Yūcuán na te ñayuu squícu nuū yā chi ndindēé i nájnūhun niāndii, te coyūcú i nuū ndácu máá Tátá i jniñu. Tāca róhó jēé jíni sōho, na chúsóhó ró.

Jnūhun yátá síquī yejnū xūhún jeē yísāhí

⁴⁴ Te jeē ndácu Yaā andīṽí jniñu nuū ñáyuu, suni cúu nájnūhun ñn yejnū xūhún jeē yísāhí chíji ñn ñuhun. Te ni nanihín ñn tēe, te ni nacasi tucu de

siquī. Te jeē cúsī ni de jíin, te ni jehēn de ni xīcō ndīhi de jeē névāha de, te ni jeen de ñuhun ún.

Jnūhun yátá síquī perla jeē ndeé yahu

⁴⁵ Te jeē ndácu Yaā andiví jniñu nuū ñáyuu, suni cúu nájnūhun ñn tēe jéen xīcō, te ndúcú de perla váha. ⁴⁶ Te ni jini de ñn perla jeē yáhu ndasí, te ni jehēn de ni xīcō ndīhi de jeē névāha de, te ni jeen de perla un.

Jnūhun yátá síquī ñunu jnī chācá

⁴⁷ Te jeē ndácu Yaā andiví jniñu nuū ñáyuu, suni cúu nájnūhun ñn ñunu jeē cásingava de ini mar, te quivícoo ndīnuū chācá. ⁴⁸ Te núu ni chitú ñunu ún, te cánatava de yundúte. Te cácucoo de cánacāji de chācá. Te chācá váha cájnaa de ini jīca, te chācá tú vāha cáscāne de. ⁴⁹ Te suni súcuan coo quiví jīnu ñayiví. Chi quijicoo ndajéhé yā, te sásīn ya ñayuu casáha jniñu néé méhñu ñáyuu casáha jniñu váha. ⁵⁰ Te ñayuu cunéé chi jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

Jnūhun yátá síquī ndajniñu ndeé yahu

⁵¹ Te ni cajnūhun yá de jíináhan de:

¿A ní cajecūhun ni rō tāca jnúhun yáha, chí tuú? áchí yá.

Te ni cacahān de jíin yá:

Ni cajecūhun ni ná, áchí de.

⁵² Te ni cahān yā jíin de:

Iyó váha núu súcuan. Te ñn tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca jnúhun siquī ún. Chi cúu de nájnūhun ñn tēe chíí vehe. Te ini yejnū de táva

de ndajniñu ndéé yahu, sava jeē jeē jíin sava jeē je ni cunahán íyó. Achí yá.

Jeē cuánuhun yā ñuu Nazaret

(Mr. 6.1-6; Lc. 4.16-30)

⁵³ Te ná ni ndihi ni cahān Jesús tāca jnúhun yátá yáha, te ni quenda ya yūcuan cuáhān yā. ⁵⁴ Te ni najinū yā ñuu yā Nazaret. Te ni steén yā jnūhun ini vehe īī sinagoga yūcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jnúhun ndíchí? ¿Te ndese cúu sáha de tācá jniñu jéhnu yāhá? ⁵⁵ Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas. ⁵⁶ Te suni cáyūcu cuáha de jíin yó yāhá. ¿Te ndese jíin de tāca jnúhun yáha núu súcuan? Achí ñayuu.

⁵⁷ Te súcuan ni cacujéē ni i nuū Jesús. Te ni cahān yā jíin i:

Tāca tēe nácani jnūhun Yaā Dios, íyó yíñúhún ñayuu jíin de, te máni ñayuu ñuu maá de jíin ñáyuu vehe máá de cúu jeē tu íyó yíñúhún jíin de. Achí yá.

⁵⁸ Te tu ní sáha ya cuehē jniñu jéhnu yūcuán, chi tu cácañdije i ya.

Jeē ni jíhī Juan tēe scuándute

(Mr. 6.14-29; Lc. 9.7-9)

14

¹ Te tiempo yúcuán te Herodes, tēe ndácu jniñu región Galilea, ni jini jnūhun de jnūhun Jesús. ² Te ni cahān de jíin ñáyuu cáhīin jíin de:

Tēe yúcuán cúu Juan tēe ni scuándute, te ni natecu de. Jeē yúcuán íyó poder de sáha de jniñu jéhnu. Achí de.

³ Chi Herodes, je ni ndacu de jniñu jeē na quiví Juan vecāa, jíin jéē na cónuhnī de jíin cadena. Súcuān ni sáha de jeē siquí Herodías, ñasihí ñani de Felipe. ⁴ Chi Juan ni cahān de nuū Herodes:

Tu íyó ley condeca ró ña, áchí de.

⁵ Te jeē yúcuān ní cuni Herodes cahni de Juan. Te yúhú de jeē quití ni ñayuu, chi ndihí i jéni ndije ni i jeē ñn tēe nácani jnūhun Yaā Dios cúu Juan. ⁶ Te ñn quiví ni sáha Herodes ñn vico quiví ní cacu de. Te sēhe síhí Herodías ni quiví i ni jíta jéhé i nuū ñáyuu ní caña de ún. Te ni cusí ni Herodes ni sáha i. ⁷ Te ni jejnūhun téyí de jeē cuáha de núu na vé cacān i nuū de. ⁸ Te ni jehēn i ni cajnūhún i náná i na vé cacān i. Te ni ndiví i nuū Herodes, te ni cahān i:

Cuáha ní xíní Juan tēe scuándute, cone nuū ñn cohō, achí i.

⁹ Yūcuán na te rey Herodes ni cucuíhyá ni de. Te siquí jeē ni jéjnūhun téyí de, jíin jéē ní cajini sōho tēe cáyeji staā jíin de, jeē yúcuān ní ndacu de jniñu jeē na cuáha nuū i. ¹⁰ Te ni tají de soldado jeē na quícahnde xiní Juan ini vecāa. ¹¹ Te ni quee soldado un jíin xíní Juan, íne nuū ñn cohō, te ni jēhe nuū súchi síhí un. Te máá i ni jendeca i nuū naná i.

¹² Yūcuán na te ni jengoo tēe cáscuáha jíin Juan, te ni candonehen de yiquí cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

Jeē ni scáji yā uhūn mil tēe

(Mr. 6.30-44; Lc. 9.10-17; Jn. 6.1-14)

¹³ Te ná ni jini Jesús jnūhun, te ni cujiyo ya yūcuān cuáhān yā jíin barco, jeē cóne sín ya ñn lugar nuū tú ñayuu. Te ni cajini ñayuu jeē cuahán yā. Te

tācá ñuu ni quendacoo i cájica jéhe i, cuajnahán i ya. ¹⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya tāca ñáyuu cácuñū jeē véjicoo i jíin. ¹⁵ Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. Núu súcuan te taji ní ñayuu na quíngoo i tācá ñuu, te cuaan i jeē cáji í.

¹⁶ Te ni cahān Jesús jíin de:

Tu jíini ñúhún quíngoo i, chi cuāha máa ró jeē cáji i, áchí yá.

¹⁷ Te ni cacahān de jíin yá:

Tú na vé cánevāha ná yāha, chi uhūn-ni staā jíin úū-ni chācá, áchí de.

¹⁸ Te ni cahān yā jíin de:

Cuāha na quíji, áchí yá.

¹⁹ Te ni cahān yā jíin ñáyuu un jéē na cúcōo i nuū íte. Te ni quihin ya ndihúhún staā jíin úū chācá un. Te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá. Te máa de ni casaja de nuū ñáyuu cuehē ún. ²⁰ Te ndivii i ni cayeji, te ni candutú chíji i. Te ni canastútú de pedazo jeē ní quendōo, te ni chitú úxí uū jíca. ²¹ Te tēe ni cayeji un cúu nájñūhun uhūn mil, te sñn ga cúu ñahan jíin súchi lúlí.

Jeē ní jica jéhe yá nuū mar

(Mr. 6.45-52; Jn. 6.16-21)

²² Yūcuán na te ni cahān-ni Jesús jíin tēe cáscuáha jíin yá jeē na quívicoo de barco, te cosnūú de quíngoo de nde inga lado mar, níni jéē nátaji yá ñayuu un quíngoo i. ²³ Te nuū ní cuu ni nacuatáhú yá

nuū i, te máñúhún-ni ya ni caa ya yucu, cuacacān tahu yā. Te ni cuaa, te íne máñúhún yá yūcuán.
²⁴ Te barco un, je ni cuu sava nuū mar cuahān. Te ndute mar un nátundahá níhin barco, chi vēji tachī ichi núú de. ²⁵ Te jeē yínee gā ni quee Jesús nuū de, jíca jéhé yá nuū mar. ²⁶ Te tēe cáscuáha ún, ni cajito de ya jeē jíca ya nuū mar. Te ni candondava de, te ni cacana cóhó de jeē cáyuhú de.

Jíhná cúu, áchí de.

²⁷ Te ni cahān-ni Jesús jíin de:

Ndeyí coo ni rō, te ma yūhu ró, chi máá rí cúu, áchí yá.

²⁸ Yūcuán na te ni cahān Pedro jíin yá:

Núu máá ní cúu, te cahān ni jíin ná jeē na cáca jéhé ná nuū mar te jeē na núu ní, áchí de.

²⁹ Te ni cahān yā:

Nehen núu súcuan, áchí yá.

Te ni quenda Pedro ini barco, te ni jica de nuū ndúte cuahān de nuū Jesús. ³⁰ Te nuū ní jini de jeē níhin yíhi tachī, te ni yūhú de. Te ni quejéé de quee de chíji ndute. Te ni cana cóhó de:

Jnama ní sáña, áchí de.

³¹ Te Jesús ni jññ-ni ya ndaha de. Te ni cahān yā jíin de:

Tēe tu cándíje nīhin cúu ró. ¿Naun ni nayūhu ró? Achí yá.

³² Te ni quiví ya ini barco un jíin de, te ni jecuiñi-ni tachī. ³³ Yūcuán na te tēe cáhīin ini barco un, ni cajecuiñi yití de nuū yā. Te ni cacahān de:

Jendaá ndije jeē Sēhe Yaā Dios cúu ní, áchí de.

Jeē ní nasávāha ya ñayuu cácuñū región Genesaret (Mr. 6.53-56)

³⁴ Te ni quenda jíyo ya jíin de nuū mar un, ní jinū yā región Genesaret. ³⁵ Te ñayuu yūcuan ní canacuni i ya. Te ni cascáca i jnūhun tācá ndañúū yūcuan jeē ni jíin yā. Te ñayuu ni caquindeca i ñayuu cácuñū nuū yā. ³⁶ Te ni cacahān ndahú i jíin yá jeē na quéhé i vēsú yusáhma ya. Te tāca ñayuu jeē ní caquehé sahma ya, ni canduvāha i.

*Siquī ndese cújnehén ñáyuu
(Mr. 7.1-23)*

15

¹ Yūcuán na te jecu tēe grupo fariseo jíin tēe cástéén tutu ley Yaā Dios, ni quendacoo de ñuu Jerusalén, te ni quecoco de nuū yā. Te ni cacahān de jíin yá:

² Tēe cáscuáha jíin ró, ¿naun cástívi de costumbre jeē ní cajequin ñayuu jenahán? Chi tu ní cáscuicu de costumbre jeē nándahá de nuū yā te caji de staā. Achí de.

³ Te Jesús ni cajnūhun yá de:

Te máá ró jijnáhan ró, ¿suni naun cástívi ró jniñu ní ndacu Yaā Dios nuū rō? Chi sa costumbre máá ró cúu jeē cascuicu ró. ⁴ Chi ni cahān Yaā Dios: Cooyíñuhún ró jíin tátá rō jíin náná rō. Te núu ndé ñin cahān siquī tátá chí síquī naná, na cúu nahín, áchí Yaā Dios. ⁵ Te máá ró chí cacahān rō jeē cuu cahān ñin tēe jíin tátá de jíin náná de: Ma cúu chindéé ñáhán ná níhín cuáha na jéē cáji ni jéē cúhun ní, chi ndíhi jeē névāha ná, je ni socō na núu Yaā Dios. ⁶ Te tēe cahān súcuan, tuá cánuú chindéé ñáhán de tátá de náná de, áchí ró jijnáhan ró. Te súcuan cástívi ró jniñu ní ndacu Yaā Dios, jeē siquí costumbre ni cajequin máá ró. ⁷ Tēe stáhú-ni cácuu ró. Ndaā ni

nacani Isaías jnūhun siquī rō nde jenahán, yósó núū tútu īi jeē ni cáhān Yaā Dios:

⁸ Ñayuu yáha chi máá yuhu-ni i cájetáhú i ruhū, te nasūu ndé jíin ini jíin ánuá i.

⁹ Te cáchiñúhún sáá-ni i ruhū, chi jnūhun cástéén i cúu jniñu ní candacu tēe, te nasūu jéē ní ndacu máá rí cúu.

Achí Yaā Dios. Achí yá.

¹⁰ Te ni cana ya ñayuu cuehē ún, te ni cahān yā jíin i:

Cuni sōho vāha jíjnáhan ró, te chuhun ni rō:

¹¹ Nasūu jéē quívi ini yuhu ñayuu cujnéhén i sáha. Chi jnūhun jeē quénda yuhu i, yūcuan cúu jeē cujnéhén i sáha, áchí yá.

¹² Yūcuán na te tēe cáscuáha jíin yá, ni quecoo de nuū yā, te ni cacahān de:

¿A jíiní ni jéē ní caquiti ni tēe fariseo jeē ní cajini sōho de jnūhun ni cahān ní? áchí de.

¹³ Te ni cahān maá yá:

Cácuu de nájnūhun yujnu jeē tu ní náchuhun Tátá rī, Yaā ndeé andiví, te ñn quívi te jnuhun ya quihīn.

¹⁴ Na quíngoo máá de. Chi cácuu de nájnūhun tēe cuáá cástéén ichi nuū inga tēe cuáá. Chi núu ñn tēe cuáá stéén de ichi nuū inga tēe cuáá, te ndindúú de ñinga de xehvā. Achí yá.

¹⁵ Te ni cahān Pedro jíin yá:

Castūhun cájí ní jnúhun yátá yáha nuū na jíjnáhan ná, áchí de.

¹⁶ Te ni cahān Jesús:

¿Te á suni máá ró ná tu jecūhun ni rō chí naún?

¹⁷ ¿A tu cájecūhun ni rō jeē tāca jéē yéji ñayuu, chi quívi chíji i, te quénda-ni cuahān? ¹⁸ Te jnūhun

jeē quenda yuhu ñayuu, chi nde ini anuá i vēji, te yūcuan cúu jeē cujnéhén i sáha. ¹⁹ Chi nde ini anuá ñayuu quenda jeē jéni néé ni, jeē jéhni ndīyi, jeē casíquí ndéē jnáhan, jeē jíca jnéni, jeē sacuíhná, jeē cahán jnūhun stáhú, jeē cahán yāa síquí jnáhan. ²⁰ Tāca jéē yáha cúu jeē cujnéhén ñayuu sáha. Te núu tu squícu i costumbre jeē nándahá i te caji i staā, tu cúnéhén i sáha. Achí yá.

Ñahan inga nación jeē ní candíje nīhin
(Mr. 7.24-30)

²¹ Te ni quenda Jesús yūcuan cuáhān yā región Tiro jíin Sidón. ²² Te ññ ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátā, Sēhe yucūn David, cundáhú ni ni sáña víi. Chi sēhe síhí ná, ñúhun tachī ini i, te yōhyo xeēn ndóho i, áchí ña jíin yá.

²³ Te tu ní cáhān cuiti yā jeē ni cáhān ña. Yūcuán na te ni quecoo tēe cáscuáha jíin yá, te ni cacahān de:

Cahān ni jíin ña na quíhín ña, chi cána jee ña vēji ña yatā yō, achí de.

²⁴ Te ni cahān yā jíin ña:

Nuū maá-ni ñayuu nación Israel ni tají Yaā Dios sáña véji ná, chi cácuu i nájñūhun lanchi, quití ní sana.

²⁵ Te ñahan ún chi ni quee ña, te ni jecuíñi yítí ña nuū yā, te ni cahān ña:

Tátā, chindéé ñáhán ní sáña víi, achí ña.

²⁶ Te ni cahān yatá yá jíin ña:

Tu íyó váha jeē quénde yō staā sēhe, te cuāha yó núū ína, achí yá.

²⁷ Te ni cahān ña:

Jendaá cahán ni Tátā, te chindéé ñáhán ní sáña vésú cúu ná nájñuhun ina. Chi suni máá tí cánihín nahín tí pedazo staā cuechí jéē cóyo chíji mesa jitohe tī cáyeji tī, achí ña jíín yá.

²⁸ Yūcuán na te ni cahán Jesús:

Yōhyo vāha jeē cándíje nīhin ní súcuan, nánā. Te na sáha ná jéē cuní ni, achí yá.

Te máá hora un ní nduvāha-ni sēhe síhí ña.

Jeē ní nasávāha ya cuehē ñayuu cácuhū

²⁹ Te ni quenda Jesús cuahān yā yūcuán, te ni yāha ya yumar Galilea. Te ni caa ya ñin yucu, te yūcuan ní cucōo ya. ³⁰ Te cuehē ñayuu ni quecoo i nuū yā, te cándeca i tāca jéē cájica chácuá, jeē cuaá, jeē ñihín, jeē cacúhndú, jíín cuéhē gā ñayuu cácuhū. Te ni cajequin i nuū jehé Jesús. Te ni nasávāha ya i jíínáhan i. ³¹ Te ni canaa ni ñayuu un cájito i jeē nácahān ñayuu ñihín, ndúvāha ñayuu cuhndú, nácaca vāha ñayuu chacuá, nánune tinūu ñáyuu cuaá. Te ni cacahān i jeē yóhyo vāha Yaā cúu Yaā Dios ñuu i Israel.

Jeē ni scáji yā cuūn mil tēe

(Mr. 8.1-10)

³² Yūcuán na te ni cana Jesús tēe cáscuáha jíín yá, te ni cahān yā jíín de:

Cúndáhú ni rī ñayuu cuehē yāhá, chi je ni cuu unī quivī cáyūcú i jíín rí, te tuá na vé caji i. Te tu cúní rī natajī rí i nuhun ndite i, chi núu súcuan te sava ichi te cuīta íi i. Achí yá.

³³ Te ni cacahān tēe cáscuáha jíín yá:

¿Te ndé nuū nihín yō staā caji ñayuu cuehē yāhá? Chi yāhá tú na ñayuu yúcu, achí de.

³⁴ Te ni cajñuhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chācá lúli, áchí de.

³⁵ Yūcuán na te ni cahān yā jíin ñáyuu cuehē un jéē na cúcōo i. ³⁶ Te ni quihin ya ndihúxá staā jíin chāca ún, te ni nacuatáhú yá nuū Yaā Dios. Te ni tahu cuéchí yá, te ni jēhe ya nuū tēe cáscuáha jíin yá, te máá de ni casaja nuū ñáyuu. ³⁷ Te ndihi i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jīca. ³⁸ Te tēe ni cayeji ún, nde cuūn mil de cúu, te síin ga cúu ñahan jíin súchi lúli. ³⁹ Yūcuán na te ni nacuatáhú yá nuū ñáyuu ún, te cuanungoo i. Te ni ndīvi ya ini barco, te cuahān yā región Magdala.

*Jeē cájicān de ñn jniñu jéhnu nuū yā
(Mr. 8.11-13; Lc. 12.54-56)*

16

¹ Te ni quecoo tēe grupo fariseo jíin tēe grupo saduceo nuū yā. Chi cácuni de coto ndee de ya, te ni cajicān de jeē na sáha ya ñn jniñu jéhnu jeē coo ñn seña ichi ándiví. ² Te máá yá ni cahān yā jíin de:

Núu ni ini, te cácahān rō: Nandii, chi ni nasácuéhé i andiví, áchí ró. ³ Te jenéhen chí cácahān rō: Vijna te cuun saū, chí ni nasácuéhé i andiví, áchí ró. Tēe stáhú-ni cácuu ró. Chi cájecūhun ni rō ndese stéén seña andiví, te tu cájecūhun ni rō ndese stéén tācá jniñu jéhnu sáha ri tiempo yáha. ⁴ Ñáyuu yáha jeē casáha jniñu néé, tu cájetáhú cuiti i Yaā Dios. Te cájicān i jeē sáha ri ñn jniñu jéhnu jeē coo ñn seña andiví. Te tuá na ñnga jniñu jéhnu stéén rī nuū i, chí máá-ni jniñu jéhnu nájnūhun ni cuu jíin Jonás,

tēe ni nacani jnūhun Yaā Dios nde jenahán. Achí yá.

Te ni stóo ya de jíjnáhan de, te cuahān yā.

Jnūhun levadura tēe fariseo

(Mr. 8.14-21)

⁵ Te tēe cáscuáha jíin yá ni canaa ni de condiso de staā náa cuango de jíin barco inga lado mar. ⁶ Te ni cahān Jesús jíin de:

Coto má candíje ró levadura tēe grupo fariseo jíin tēe grupo saduceo, achí yá.

⁷ Te tēe cáscuáha un ní cacahān maá de:

Va síquī jeē tú na staā ndíso yó, jeē yúcuān cáhán yā súcuān, áchí de.

⁸ Te ni jini Jesús, te ni cahān yā:

¿Najehē cácahān rō jeē ní cáhán rī súcuān síquī jeē tú na staā cándiso ró? Tēe tu cándíje nīhin cácuu ró.

⁹ ¿A ná tu jecūhun ni rō jeē tu ní cáhán rī súcuān síquī jeē tu ndíso ró stáā? ¿A tu cánucūhun ni rō jeē ní tahú cuéchí rí uhūn staā ni cayeji uhūn mil tēe, te nasaa jīca ni canastútú ró jeē ní quéndōo? ¹⁰ ¿Te á tu cánucūhun ni rō jeē ní tahú cuéchí rí uxā staā ni cayeji cuūn mil tēe, te nasaa jīca ni canastútú tucu ró? ¹¹ ¿Te najehē tu cájecūhun ni rō jeē násūu síquī staā ní cahān rī jíin ró jeē ní cáhán rī jeē coto má candíje ró levadura tēe fariseo jíin tēe saduceo? Achí yá jíin de.

¹² Yūcuán na te ni cajecūhun ni de jeē tu ní cáhán yā jeē coto de jeē ma cáji de pan jeē yñi levadura, chí sa suhva ní cahān yatá yá jeē ma cándíje de jnūhun stáhú cástéén tēe fariseo jíin tēe saduceo.

Jeē ní cáhán Pedro jeē Jesús cúu Cristo

(Mr. 8.27-30; Lc. 9.18-21)

¹³ Te nuū ni jínū Jesús región Cesarea Filipino jín tée cáscuáha jín yá, te ni cajnúhun yá de:

Ruhū, Yaā ní nduu tēe, ¿ndé ñn cúu ri cácahān ñayuu?

¹⁴ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnúhun Yaā Dios nde jenahán. Te sava ga i cácahān jeē Jeremías chí inga tēe ni nacani jnúhun Yaā Dios cúu ní. Achí de.

¹⁵ Te ni cahān yā jín de:

Te máá ró, ¿ndé ñn cúu ri cácahān rō? achí yá.

¹⁶ Te ni cahān Simón Pedro:

Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu ní cáni, achí de.

¹⁷ Te ni cahān Jesús:

Yōhyo ndetū rō, Simón sēhe Jonás, chí nasūú ñn ñayuu ni steén jnúhun yáha nuū rō, chí sa suhva máá Tátá rī, Yaā ndeé andiví, ní steén yā nuū rō.

¹⁸ Te ruhū suni cáhān rī jín ró jeē maá ró cúu Pedro, jeē cuní cahān: yuū. Te jnúhun ndaā jeē ni cáhān rō jeē maá rí cúu Cristo, suu cúu nájnūhun ñn yuū cáhnu. Te siquī yuū cáhnu yáha sáha ri jeē quítuu vehe, te vehe un cúu ñayuu cácañíje ruhū. Te tu ndé vé cundeyí cuiñi siquī i, ni jnúhun xeēn jeē cájihī i, tuá na vé cúu sáha jín ánuá i. ¹⁹ Te máá ró condiso jniñu ró sáha ró jéē quíñicoo ñayuu ndaha Yaā andiví jeē ndacu ya jniñu nuū i. Te tāca jéē cási rō jeē ma sáha ñayuu ini ñayiví yáha, suni casi jeē cáyūcú nde andiví. Te tāca jéē cuáha ró jnúhun sáha i ini ñayiví yáha, suni jeē cáyūcú nde andiví cuáha jnúhun. Achí yá.

20 Yūcuán na te ni ndacu ya jniñu nuū tée cáscuáha jíin yá, jeē ma cáchi de nuū ní ññ ñayuu jeē cúu ya Cristo.

*Jeē ní castūhún Jesús jeē cúu yā
(Mr. 8.31-9.1; Lc. 9.22-27)*

21 Te nde saá ní quejéé Jesús cástūhun cájí yá nuū tée cáscuáha jíin yá jeē jíni ññhún quihīn yā ñuu Jerusalén. Te tāca tée jéhnū jíin sūtū cácujuhūn jíin tée cástéén tutu ley, stóho ndasí de ya. Te cahni de ya, te nuū uní quivī te natecu yā, achí yá. 22 Yūcuán na te Pedro, ní cana máñuhún de ya, te ni quejéé de cáhán de nuū yā:

¿Naun cáhán ni súcuan? Chi tu cúní Yaā Dios jeē cuu súcuan. Tu jíni ññhún cuiti ndoho ní jnūndóho yáha, áchí de.

23 Te ni ndió cóto ya nuū Pedro, te ni cahān yā jíin de:

Cujiyo quihīn rō, chi cáhán rō ná cáhán Satanás. Chi tēe ndúcú stívi ruhū cúu ró. Te tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu. Achí yá.

24 Yūcuán na te ni cahān yā jíin tée cáscuáha jíin yá:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuāha i jñūhun ndoho i jñūndóho jeē siquí rī, vēsú na cúu i. 25 Chi núu ndé ñáyuu cuní i cācu i nuū jñūndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñáyuu, vēsú na cúu i jeē siquí ruhū, te cotecu i ní cáni. 26 ¿Chi ndé cuajníñu vēsú na cūndeyí ñáyuu nihīn i ní ñáyiví, te núu quivī i nuū jnahnú ndetū i? Chi tú na jíin cuiti chunaa

ñayuu jeē cácu ánuá i. ²⁷ Chi ruhū, Yaā ní nduu tēe, ndiji ri jíin táca ndajéhé rī, te yōhoyo luu kujéhnū ri nájnūhun cújéhnū Tátá rī. Yūcuán na te cuāha ri tahū nuū ññ ññ ñayuu núu ndese jniñu ni casáha i. ²⁸ Te jendaá cahán rī jíin ró jeē sava tēe cáhīin yāhá, ma cúu de chi nde cuni de jeē maá rí, Yaā ní nduu tēe, ndácu ri jniñu jíin poder rī.

Jeē tucu ni nduu ya
(Mr. 9.2-13; Lc. 9.28-36)

17

¹ Yūcuán na te nuū iñú quivī te Jesús ni jeca ya Pedro jíin Jacobo jíin Juan ñani Jacobo, cuahān sīn ya jíin de ññ yucu súcún. ² Te yūcuán, tucu ni nduu ya nuū de. Chi ni ndindēe núu yā nájnūhun niāndii. Te sahma ya ni nducuíjín quiyi ndasí, nájnūhun nduva luz. ³ Te ni cajito-ni de jeē Moisés jíin Elías, tēe ni cahīyo jenahán, cándajnūhún de jíin yá. ⁴ Te ni cahān Pedro jíin yá:

Nacā jeē váha jeē cáhīin ná yáha. Te núu cúní ni te na sáha ná únī vehe ramada, ññ cuu máá ní, inga cuu Moisés, te inga cuu Elías, achí de.

⁵ Te níní cáhán gā de, te ni quiji vicō nūhun jéē yaa ndasí, ni jesi-ni nuū de. Te nuū vicó un ní cahān ññ jnūhun:

Yāha cúu Sēhe ri jeē maní ndasí rí jíin, te cúsiñ ni rī jíin. Na cúní nahín ró jnūhun cáhán yā. Achí.

⁶ Te jeē súcuan ni cajini sōho tēe cáscuáha ún, te ni cajecava ndeyi de, chí yōhoyo ni cayūhú de. ⁷ Yūcuán na te ni quee Jesús, te ni soó yá ndaha ya siquī de. Te ni cahān yā:

Ndocuñī, te ma yūhu ró jijnáhan ró, achí yá.

⁸ Te ni candacoto de, te tuá tēe un ní cájito de, chi máá ñn na Jesús.

⁹ Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní ñn jeē súcuan ni cajito ró, chi nde na nátecu maá rí, Yaā ní nduu tēe, áchí yá.

¹⁰ Yūcuán na te tēe cáscuáha jíin yá, ni cacajñuhún de ya:

Núu súcuan te tēe cástéén tutu ley Yaā Dios, ¿na-jehē cácahān de jeē cánuú ndiji Elías xihna gā, te sáa te quiji Yaā cúu Cristo? achí de.

¹¹ Te ni cahān Jesús jíin de:

Jendaá cúu jeē xihna gā quiji ñn tēe cuu nájnūhun Elías, te sátūhva de ndihí, áchí tutu. ¹² Te cáhán rī jíin ró jeē jé ni quiji tēe ni cuu nájnūhun Elías, te tu ní jíní ñayuu jeē suu de cúu. Te ni casáha ndevāha ñayuu jíin de ndihí jeē ní cacuu ni maá i. Te suni súcuan stóho i ruhū, Yaā ní nduu tēe. Achí yá.

¹³ Yūcuán na te tēe cáscuáha un, ní cajecūhun ni de jeē cahán yā jeē Juan tēe scuándute, ni cuu de nájnūhun Elías.

Jeē ní nasávāha ya ñn sūchi jíhí yíhí

(Mr. 9.14-29; Lc. 9.37-43)

¹⁴ Te ni najinū yā jíin de nuū ñáyuu cuehē ún. Te ni quee ñn tēe, ni jecuiñí yití de nuū yā, te ni cahān de:

¹⁵ Cundáhú ni ni séhe yíhí ná, chi yōhyo xeēn ndóho i cuehyí jíhí yíhí. Te je ni cuu cuehē jínu cótúú i nuū ñuhún jíin núu ndúte. ¹⁶ Te ni quindeca ná i nuū tēe cáscuáha jíin ní, te tu ní cúu sávāha de i, áchí de.

¹⁷ Te ni cahān Jesús:

Ñayuu yōhyo nīhni ni cácuu ró chi tu cá candíje ró jéē cuu nduvāha i. ¿Nasaa ga quiivī condee rī jín ró? ¿Te nasaa ga quiivī cuandeyí ni rī jín ró? Cuáquihin sūchí un na quíji i, áchí yá.

¹⁸ Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

¹⁹ Yūcuán na te tēe cáscuáha un, ní cacajñūhun sīn de ya:

¿Najehē tu ní cúu quenehen ná tachī un jíjnáhan ná? achí de.

²⁰ Te ni cahān yā:

Siquī jeē tu cá candíje nīhin ró jéē cuu sáha ró. Chi jendaá cahán rī jín ró, jeē núu candíje ró vēsú ñn tíhli-ni, cūhva nájnūhun ñn ndiquin mostaza, te cuu sáha ró táca-ni jniñu yí. Chi cuu cahān rō jeē na cújiyo yucu yáha quihīn ñnga lado, te cujiyo-ni. Te tācá-ni jniñu chi cuu sáha ró, te núu candíje nīhin ró jéē cúu. ²¹ Te ñn tachī súcuan chi ma quenda cuiti quihīn, te núu tu cacān tahú rō te coo ndite ni rō. Achí yá.

Jeē ni cáhān tucu ya jeē cúu yā

(Mr. 9.30-32; Lc. 9.43-45)

²² Te jíca cuu Jesús jín de jíjnáhan de región Galilea, te ni cahān yā jín de:

Máá rí, Yāā ní nduu tēe, nastúu i ruhū nuū tāca tēe xeēn. ²³ Te cahni de ruhū, te nuū uní quiivī te natecu rī, achí yá.

Te ni canducuíhyá ndasí ni de jeē ni cáhān yā jñūhun yáha.

Siquī xúhun cuajniñu ini templo

24 Te ni jinū yā ñuu Capernaum jíin tée cáscuáha jíin yá. Te tēe cástútú xūhun templo ni quecoo de, te ni cacajñuhún de Pedro:

Te maestro maá ró jijnáhan ró, ¿á tú cuāha de xūhún cuajñíñu ini templo, chí naún? áchí de.

25 Te ni cahān Pedro:

Cuu, áchí de.

Te ná ni quiv̄i de ini vehe, te xīhna gā Jesús ni cahān yā jíin de:

¿Ndese jéni ni rō, Simón? Tāca tēe cácuu rey ini ñaȳiv̄i yáha, ¿ndé núū cájicān de xūhun renta jíin xūhun cuajñíñu ñuu? ¿A núū séhe de chí núū ñáyuu sín vehe? áchí yá.

26 Te ni cahān Pedro:

Nuū ñáyuu sín vehe, áchí de.

Te ni cahān Jesús:

Núu súcuan te tú na inga cujéhnu nuū séhe rey jeē cacán xūhún un núū i.

Súcuan ni cahān yā jeē cujéhnu ya cúu ya Sēhe Yaā Dios. Te ni cahān yā:

27 Te na chúnaa yō, návāha tu squítí ni yō de. Núu súcuan te cuáhán ndé yumar, te scāne ró gancho jeē jñí chācá, te tava rō chācá jéē jñí xīhna gā. Te ndica rō yuhu tí, te yūcuan níhīn rō ñn xūhun jéē cánda chunaa rō jeē cájicān de. Te quindēca ró núū de jeē cúu ruhū jíin rōhó. Achí yá.

*Ndé ñáyuu cúu jeē cujéhnu ga
(Mr. 9.33-37; Lc. 9.46-48)*

18

1 Te suni quiv̄i un ní quecoo tēe cáscuáha un núū yā, te ni cacajñuhún de ya:

¿Ndé ñn cújéhnú ga nuū ñáyuu jeē ndácu Yaā andiví jniñu nuū? achí de.

² Te ni cana ya ñn sūchi lúli, te ni jeni ya i mēhñú de. ³ Te ni cahān yā:

Jendaá cahān rī jín ró, núu tú nandió cóo ni rō te cani ni rō nájnūhun ñn sūchi lúli, ma quívi cuíti rō ndaha Yaā andiví jéē ndacu ya jniñu nuū rō. ⁴ Núu súcuan te ñayuu jeē jéni ni i jeē tu cújéhnú i, nájnūhun jéni ni sūchi lúli yáha, suu i cújéhnú ga nuū ñáyuu jeē ndácu Yaā andiví jniñu nuū. ⁵ Te na-ni ñayuu núu jeē siquí ruhū jetáhú i ñn sūchi lúli nájnūhun sūchi yáha, te ruhū jetáhú i. Achí yá.

Xeēn coo siquí ñáyuu quívi nuū cuéchi
(Mr. 9.42-48; Lc. 17.1-2)

⁶ Te núu ñn sūchi lúli yáha cándije i ruhū, te núu quívi i cuéchi sáha na-ni ñayuu, te vāha ga núu ni conuhnī ñn yōso cáhnu sucūn ñayuu ún, te quēe i chíji ndute mar nuú. ⁷ Nacā xeēn cúu jín ñáyuu ñayívi, chí máni iyó jéē nducú squívi ñayuu nuū cuéchi. Te máni súcuan coo ini ñayívi. Te nacā xeēn ndoho ñayuu jeē squívi jnāhan nuū cuéchi.

⁸ Núu súcuan te núu ndaha ró chí jéhē rō sáha jeē quívi ró cuéchi, vāha ga cahnde rō te scāne ró na quíhín, návāha tuá sáha ró cuéchi. Chí vāha ga jeē coo chácua ró chí coo tícúhndu ró te quívi ró núu cotecu rō ní cáni, vēsú jeē cóndee ndindúú ndaha ró jéhē rō te quívi ró núu ñuhún jeē cayú ní cáni. ⁹ Te núu tinūu ró sáha jeē quívi ró cuéchi, vāha ga tava rō te scāne ró na quíhín, návāha tuá sáha ró cuéchi. Chí vāha ga jeē coo ñn-ni tinūu ró te quívi ró núu cotecu rō ní cáni, vēsú jeē cóndee ndindúú tinūu ró te quívi ró núu ñuhún infierno.

Jnūhun yátá síquī lanchi jeē ní sana
(Lc. 15.3-7)

¹⁰ 'Coto ma sájēē ni rō nuū ní ñn sūchi lúli yáha. Chi cáhán rī jín ró jeē tācá ndajéhé andiví jéē ndíto ya i, níni cáhīn ya nuū maá Tátá rī andiví. ¹¹ Chi ruhū, Yaā ní nduu tēe, vēji ri jeē jnáma ri ñayuu jeē ní sana i nuū Yaā Dios.

¹² '¿Te ndese cájeni ni rō? Núu ñn tēe ndéca de ñn ciento lanchi, te núu sana ñn ti, ¿á tu stóo de cuūn xico xahūn cuūn gā tī yucu, te ndicó de quinanducú de quiiti ní sana ún? ¹³ Te núu ni nanihīn de ti, te ndaā jeē yóhoyo ga cúsi ni de jín quiiti ún vēsú jín cúūn xico xahūn cuūn gā quiiti jeē tu ní sána. ¹⁴ Te suni súcuan máá Tátá rō, Yaā ndeé andiví, tu cúní yā jeē jnahnú ndetū ni ñn sūchi lúli yáha.

Síquī jeē cóne cáhnu ni yō nuū jnáhan yó
(Lc. 17.3)

¹⁵ 'Te núu jnáhan ró ní sáha de cuēchi síquī rō, núu súcuan te castūhun ró nuū mañúhún-ni de jeē ní sáha de cuēchi síquī rō. Te núu ni jetáhú de jnūhun ni cahān rō jín de, núu súcuan te je ni ndumanī de jín ró ní sáha ró. ¹⁶ Te núu tu ní jétáhú de jnūhun cáhán rō, te quicāna ró ñn chí úū gā ñayuu quihīn rō jín núū de, cuu i testigo jín ró, te cundaā cuēchi de te ndumanī de jín ró. ¹⁷ Te núu tu ní jétáhú tucu de jnūhun cácahān tēe ún, yūcuán na te castūhun ró nuū ñayuu cácadíje. Te núu tu ní jétáhú tucu de jnūhun cahān ñayuu cácadíje ún, te siáá rō de na cóo de nájnūhun ñn tēe tu cándíje nuū Yaā Dios chí tēe stútú xūhun renta.

¹⁸ 'Jendaá cahán rī jín ró jéē tāca jéē cási rō jeē ma sáha ñayuu ini ñayiví yáha, suni casi jeē cáyucú

nde andiví. Te tāca jēē cuáha ró jnúhun sáha i ini ñayīvi yáha, suni jeē cáyūcú nde andiví cuáha jnúhun.

19 Te suni cáhán rī jín ró, núu uū jnáhan ró ini ñayīvi yáha, inuú cani ni rō siquī ñn jeē cacán tahu rō, núu súcuan te máá Tátá rī andiví cuáha ya jeē cájicān rō. 20 Chi núu ndé mí ndútútú úū chí únī ñayuu jeē cáchiñúhún i ruhū, te yūcuan íne ri jín i, áchí yá.

21 Yūcuán na te ni quee Pedro nuū yā, te ni cajnúhún de ya:

¿Nasaa jínu cone cáhnu ni na núū jnáhan ná jēē sáha de cuēchi siquī ná? ¿A ndé uxā jínu chí naún? áchí de.

22 Te ni cahān Jesús:

Tu cáhán rī jín ró jeē maá úxā jínu, chi nde uxā jínu jeē uní xico uxī.

Jnúhun yátá siquī mozo jeē tu ní íne cáhnu ni

23 Núu súcuan te Yaā ndeé andiví, suhva cúu jeē íne cáhnu ni yā nuū ñayuu ndácu ya jniñu nuū: Cúu nájnúhun ñn rey jeē cuní de sándaā de jín mozo de jeē cátaū nuū de. 24 Te ni quejéé de sándaā de jín i. Te ni caquindeca i ñn mozo jeē taú tijni millón peso nuū de. 25 Te tú na vé névāha mozo un chunaa nuū de. Te ni ndacu de jniñu jeē na cúyāhu mozo un jín ñasihí jín séhe jín táca ndajniñu, te nucūnaa xūhun táú. 26 Yūcuán na te ni jecuiñi yití mozo un, te ni cahān ndahú de jín patrón de ún: Condetu ní, te na chúnaa ndihi ná xūhun ní, áchí de. 27 Te máá patrón ni cundáhú ni de mozo de. Te ni ine cáhnu ni de jeē taú mozo de ún, te ni siaá de jeē ma chúnaa gā. 28 Te ni quenda mozo un cuáhān de, te ni najnáhan-ni

de jíin ñn jnáhan mozo de jeē taú jecu peso nuū de. Te ni jnñ de tēe ún, te ni quitu de sucūn, te ni cahān de: Chunaa jeē taú rō nuū rī, achí de. ²⁹ Te jnáhan mozo de un ní jecuññīyítí núū de, te ni cahān ndahú jíin de: Condetu te na chúnaa ndihī ri xūhun ró, achí. ³⁰ Te máá de tu ní cúní de, chi ni chune de tēe un vécāa nde quivī nachunaa jeē taú nuū de. ³¹ Te tāca jnáhan mozo de ni cajito jeē súcuan ni sáha de, te ni cajnahuhū ndasí ni de. Te cuango de nuū patrón de, te ni cacachi de ndihī ndese ni cuu. ³² Yūcuán na te patrón un ní nacana de mozo un, te ni cahān de jíin: Mozo ndevāha cúu ró. Chi ni ine cáhnu ni rī ndihī jeē taú rō nuū rī, chi ni cahān ndahú ró jíin rí. ³³ Te nájnūhun ni cundáhú ni rī rohó, suni súcuan ni jini ñúhún cundáhú ni rō jnáhan mozo rō nuú, achí de. ³⁴ Te ni quitī ndasí ni patrón, te ni ndacu de jniñu jeē na quivī vecāa nde nachunaa ndihī jeē taú nuū de.

³⁵ Te ni jīnu ni cahān yā, te achí yá:

Nájñūhun ni sáha rey un jíin mozo de, suni súcuan sáha máá Tátá rī andiví jíin táca rōhó núu tu cone cáhnu ni rō nuū jnáhan ró nde jíin ini jíin ánuá rō, núu na-ni cuēchi sáha i nuū rō. Achí yá jíin de jíin de.

*Siquī jeē ma stóo jnáhan tēe jíin ñahan
(Mr. 10.1-12; Lc. 16.18)*

19

¹ Te nuū ní ndihī ni cahān Jesús tāca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núū cáne

niāndii. ² Te cuehē ñayuu ni candiquīn i ya, te yūcuan ní nasávāha ya ñayuu cácuhū.

³ Yūcuán na te ni quecoo jecu tēe grupo fariseo nuū yā, chí cácuñi de coto ndee de ya núu ndese cahān yā. Te ni cacajnūhún de ya:

¿A íyó ley jeē cuu ndusín ñn tēe jíin ñasihí de núu na-ni siquī cúu, chí naún? áchí de.

⁴ Te ni cahān yā:

¿A tu ní cácahu ró tutu iī ndese ni sáha Yaā Dios ñayuu nde xīhna ñúhún? Chi tēe jíin ñahan ni sáha ya, achí. ⁵ Te suni ni cahān Yaā Dios: Jeē yūcuan cúu jeē stóo tēe tátá de náná de, te quijnáhan de jíin ñasihí de, te ñn na cuu ndindúú de, áchí Yaā Dios, achí tutu. ⁶ Núu súcuan te tuá cúu uū jnáhan de, chí ñn na cúu. Jeē yūcuan tu íyó váha jeē stóo jnáhan, chí jeē ni squíjnáhan Yaā Dios cúu, áchí yá.

⁷ Te ni cacajnūhún de ya:

Núu súcuan ¿te naun ni ndacu Moisés jniñu jehahán jeē núu stóo ñn tēe ñasihí de, te na cúvāha acta jeē ndusín de jíin ña? áchí de.

⁸ Te ni cahān yā jíin de:

Siquī jeē níhni ni rō jijnáhan ró, jeē yūcuan ní jēhe Moisés jnūhun jeē stóo ró ñasihí ró. Te nde xīhna ñúhún chí nasūu súcuan ní cuu. ⁹ Te ruhū chí cáhán rī jíin ró, núu ñn tēe stóo de ñasihí de, te núu nasūu jéé tíjni ni ña, te quijnáhan de jíin inga ñahan, núu súcuan te cásiquí ndéē de ña. Te núu ñn tēe condeca de ñahan ní ndusín, suni cásiquí ndéē de ña, áchí yá.

¹⁰ Yūcuán na te ni cacahān tēe cáscuáha jíin yá:

Te núu ma cúu stóo tēe ñasihí de, núu súcuan te vāha ga ma cóndeca de ñahan, áchí de.

¹¹ Te ni cahān yā jíin de:

Jnūhun ni cahān rō yāhá, tu níhín jniñu nuū ndihi tēe, chi máá nene tēe jeē ni sáha Yaā Dios jeē nihín jniñu nuū. ¹² Chi íyó tijni siquī jeē jési jeē ma cóndeca tēe ñahan. Chi sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma cóndeca de ñahan siquī jeē ndihví ni de jíin jniñu jeē ndácu Yaā andiví nuū de. Tēe jeē cúu cuatáhú jnúhun jeē ma cóndeca de ñahan, na cuatáhú de núu súcuan. Achí yá.

Jeē ni jícān tahu Jesús jehē sūchi lúli
(Mr. 10.13-16; Lc. 18.15-17)

¹³ Yūcuán na te ni quecoo ñayuu jíin sūchi lúli, jēe na sóo yá ndaha ya xinī i te cacān tahu yā jehē i. Te tēe cáscuáha jíin yá, ni cacahān de nuū ñáyuu vējicoo jíin i. ¹⁴ Te ni cahān Jesús:

Cuāha jnūhun na quíjicoo sūchi lúli jíñā nuū rī, te ma cási rō jeē quíjicoo i. Chi ñayuu jeē ndió cóo ni i cani ni i nájnūhun sūchi yáha, suu i quíví ndaha Yaā andiví jēe ndacu ya jniñu nuū i, áchí yá.

¹⁵ Te ni sóo yá ndaha ya xinī i jíinahan i. Te ni quenda ya yūcuan cuáhān yā.

Jnūhun tēe cúcá
(Mr. 10.17-31; Lc. 18.18-30)

¹⁶ Te ñin tēe suchí ní quee de nuū Jesús, te ni cajnūhún de ya:

Tēe vāha cúu ní Maestro. Te cachi ní, ¿na jniñu váha sáha ná te nihīn tahu na cotecu na nñí cáni andiví? áchí de.

¹⁷ Te ni cahān yā jíin de:

¿Naun cáhān rō jeē tēe vāha cúu rí? Tú ni ñin tēe vāha íyó, chi máá ñin-ni Yaā Dios. Te núu cúni rō

cotecu rō nií cáni, te squícu ró jniñu ní ndacu ya. Achí yá.

¹⁸ Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndīyi. Ma cosíquí ndéē jnáhan ró. Ma sacuíhná ró. Ma sajnúhún ró. ¹⁹ Cuatáhú ró nuū tatá rō nuū naná rō. Te cundáhú ni rō jnáhan ró nájnūhun cúndáhú ni rō maá ró, achí yá.

²⁰ Te ni cahān tēe suchí un:

Tācá jniñu yáha je ni squícu ná ndé ná lulí ná. ¿Te na vé cúmanī gā sáha ná núu súcuan?

²¹ Te ni cahān Jesús:

Núu cúni rō squícu ndihí ró, cuáhán te xīco ró ndihí jeē névāha ró, te cuāha ró núu ñáyuu ndahú. Te nde andiví cuáha ya jeē ndetū ndasí coo ró. Yūcuán na te quiji ró condiquīn rō ruhū quihīn yō, achí yá.

²² Te tēe suchí un, ná ni jini sōho de jnūhun yáha, te ni cucuíhyá ni de te cuahān de, chí cúcá ndasí de.

²³ Yūcuán na te ni cahān Jesús jíin tēe cáscuáha jíin yá:

Jendaá cahán rī jíin ró, tēe cúcá chí yōhyo yíi quívicoo de ndaha Yaā andiví jeē ndacu ya jniñu nuū de. ²⁴ Te cáhán tucu rī jíin ró jeē yachī gā yáha ñin camello yaū yutícuí, vēsú jeē quíví ñin ñayuu cucá ndaha Yaā Dios jeē ndacu ya jniñu nuū i, achí yá.

²⁵ Te tēe cáscuáha jíin yá, yōhyo ni canaa ni de jeē ní cajini de jnūhun yáha, te ni cacajnūhun jnáhan de:

¿Ndé ñáyuu cúu jeē cácu núu súcuan?

²⁶ Te ni ndacoto Jesús nuū de, te ni cahān yā:

Ñayuu chi ma cúu squívī i máá i ndaha Yaā Dios, te máá yá chi ndihī-ni cuu sáha ya, achí yá.

²⁷ Yūcuán na te ni cahān Pedro:

Sāña jíjnáhan ná ni castóo ná ndihī jeē cánevāha ná, te cándiquīn na níhín. ¿Te na vé nihín na núu súcuān? áchí de.

²⁸ Te ni cahān Jesús jíin de:

Ruhū, Yaā ní nduu tēe, jendaá cahán rī jíin ró jíjnáhan ró jēē ĩn quívī conene rī mesa ndacu rī jniñu, te yōhyo luu kujénu rī ini ñayīví jéé. Te quívī ún te máá ró jeē ní cacondiquīn rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxí uū yucūn ñayuu Israel.

²⁹ Te tāca ñayuu jeē ni stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, síquī jeē cóndiquīn i ruhū, te nanihīn i ĩn ciento gā jeē súcuān. Te suni nihīn tahú i cotecu i ní cáni.

³⁰ Te cuehē ñayuu jeē vijna cácuu i nuū, nduu i sandīhí. Te ñayuu jeē vijna cácuu i sandīhí, nduu i nuū. Achí yá.

Jnūhun yátá síquī tēe cáśájniñu

20

¹ Te suhva cúu jeē ndácu Yaā andīví jniñu nuū ñayuu: Cúu nájnūhun ĩn tēe chíí ñuhun. Te ĩn nehen ni quenda de, ndúcú de tijni mozo jeē taxín ndéhē uva de. ² Te ni sándaā de jíin mozo un jéē chúnaa de ĩn denario jeē quívī. Te ni tají de tēe un cuángoo jeē taxín uva de. ³ Yūcuán na te ni quenda tucu de nájnūhun cahīn. Te ni jito de nuū sava ga tēe cáyūcu sáá-ni de nuū yáhu. ⁴ Te ni cahān de jíin: Róhó jíjnáhan ró, cuángoo taxín ró uva rī, te chunaa vāha rī yáhu ró, áchí de. Te tēe un cuángoo de. ⁵ Te ni

quenda tucu de jeē cuácuu cahuxī uū jíin jēē cuácuu cahunī, te suni súcuan ni nihīn tucu de mozo. ⁶ Te jeē cuácuu cahuhūn ni quenda tucu de. Te ni nihīn tucu de jecu gā tēe cáyūcu sáá-ni nuū yáhu. Te ni cahān de jíin: ¿Najehē cáhīn sáá-ni ró yáha ní ndiáca? áchí de. ⁷ Te ni cacahān tēe ún: Siqū jeē tú ni ĩn ní cána sãña jēē sájniñu ná. Te ni cahān de jíin tēe ún: Núu súcuan te suni máá ró quingoo ró taxín ró ndehē uva rī, chí chunaa vāha ri yáhu ró, áchí de. ⁸ Te nuū ní ini, te tēe chíí ñuhun ni cahān de jíin tēe cújéhnū nuū mozo de: Cana xinī tēe cásájniñu te chunaa rō yáhu de, te xīhna gā tēe ni quívicoo sandīhí, te sáá te tēe ni quívicoo xīhna ñúhún, áchí de. ⁹ Te ni quecoo tēe jeē ni quívicoo cahuhūn. Te ĩn denario ni caquihin ĩn ĩn de. ¹⁰ Yūcuán na te ni quecoo tēe jeē ni quívicoo xīhna ñúhún. Te cájeni ni de jeē cuehē gā quiyāhu de. Te ĩn-ni denario ni caquihin ĩn ĩn de. ¹¹ Te nuū ní caquihin de, te ni caquejéé de cácahān sōó de siqū tēe chíí ñuhun, áchí de: ¹² Máá ná jijnáhan ná, ndiáca ni casájniñu ná, te ni candoho ná jēē jihní. Te tēe yáha jēē ni quívicoo sandīhí, chí máá ĩn hora-ni ni casájniñu de. Te ĩnuú-ni ni chiyāhu ní sãña jíin de, áchí de. ¹³ Te tēe chíí ñuhun ni cahān jíin ĩn de: Amigo, nasūu jēē tú vāha sáha ri jíin ró. ¿A tu ní sãndaā yō jeē ĩn denario quiyāhu ró, chí naún? ¹⁴ Núu súcuan te quihin yáhu ró te quinhun rō. Chí cúní rī jeē tēe ni quívicoo sandīhí yáha, ĩnuú quiyāhu de jíin máá ró. ¹⁵ ¿Te á tu cuu sáha ri ndese cúní rī jíin xúhun máá rí? ¿Te chí cúcuésún ni rō jeē ní chiyāhu vāha ri de jijnáhan de siqū jeē vāha ni rī? áchí de. ¹⁶ Te nájnūhun ni sáha tēe chíí ñuhun, suni súcuan sáha

Yaā Dios. Chi ñayuu cácuu sandīhí, nduu i nuū. Te ñayuu cácuu nuū, nduu i sandīhí. Chi cuehē ñayuu cána ya jeē candíje i ya. Te jecu-ni i cándíje, te nácāji ya maá i jeē ndúu i sēhe ya. Achí yá.

*Jeē ni cáhān tucu Jesús jeē cúu yā
(Mr. 10.32-34; Lc. 18.31-34)*

¹⁷ Yūcuán na te ná ni quihin Jesús ichi cuahān yā ñuu Jerusalén, te ni cana sūn ya ndihúxí uū tēe cáscuáha jíin yá. Te ni cahān yā jíin de:

¹⁸ Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujuhnu jíin núu tēe cástéén tutu ley. Te ndonda de siquī rī jeē cúu rī. ¹⁹ Te squívī de ruhū nuū tēe nación Roma jeē cáyūcú Jerusalén cándacu jniñu. Te tāca tēe un sácata de nuū rī. Te cani de ruhū, te sáa te cahni de ruhū jicā cruz. Te nuū uní quívī te natecu rī. Achí yá.

*Jeē ni jícān naná Jacobo jíin Juan ñn favor nuū yā
(Mr. 10.35-45)*

²⁰ Yūcuán na te ni quee ñasihí Zebedeo nuū yā jíin séhe ña Jacobo jíin Juan. Te ni jecuiñī yití ña nuū yā, jícān ña ñn favor nuū yā. ²¹ Te ni cajnūhun yá ña:

¿Na vé cuní rō?

Te ni cahān ña:

Cuāha ní jnūhun jeē quívī ndácu ní jniñu te conēne ndindúú séhe ná yáha xiin ní, ñn i lado váha ní, te inga i lado jecó ní, achí ña.

²² Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho ri? Achí yá.

Te ni cacahān de:

Cuu sáha ná.

²³ Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho rī. Te jeē cónēne ró lado váha ri jíin lado jecó rí, nasūu rúhū cúu jeē cuáha jnūhun. Chi je íyó túhva cuu tāca tēe jeē ní nacāji Tátá rī, te tēe un níhīn. Achí yá.

²⁴ Te uxī gā tēe cáscuáha jíin yá ní cajini de jnūhun yáha. Te ni caquitī ni de nuū uú ñani ún. ²⁵ Te Jesús ni cana ya de, te ni cahān yā jíin de:

Cájini rō ndese cásáha tēe cácujuhnu nuū ñáyuu tācá nación. Chi cándacu níhin de jniñu nuū i, te máa de cáchí ndese coo. ²⁶ Te máa ró jijnáhan ró, chi ma sáha ró súcuan. Chi núu ndé ĩn ró cúní cujéhnu, sa suhva cuajniñu ró núu jnáhan ró. ²⁷ Te núu ndé ĩn ró cúní cuu nuū, sa suhva sáha ró máa ró mozo nuū jnáhan ró. ²⁸ Chi suni súcuan sáha ruhū, Yaā ní nduu tēe, chi nasūu jēe véji rī jeē cuajniñu ñayuu nuū rī, chi sa suhva véji rī jeē cuajniñu rī nuū ñáyuu. Te cuāha ri maá rí cuu rī návāha jnama ri cuehē ñayuu, achí yá.

Jeē ní nasávāha ya uū tēe cuáá

(Mr. 10.46-52; Lc. 18.35-43)

²⁹ Yūcuán na te ni quenda ya jíin de ñuu Jericó. Te cuehē ndasí ñáyuu ni candiquīn i ya. ³⁰ Te yuhíchi un cáyūcu úu tēe cuáá. Te ni cajini de jnūhun jeē yáha Jesús cuahān yā, te ni cacana jee de:

Máa ní jeē cúu ní Séhe yucūn David, cundáhú ni ní sáña, áchí de.

³¹ Te ñayuu un ní cacahān i nuū de jeē na cási de yuhu de. Te víhyá gā ni cacana jee de:

Máá ní jeē cúu ní Séhe yucūn David, cundáhú ni ni sáña víi, achí de.

³² Te ni jecuiñī Jesús, te ni cana ya ndindúú tée cuáá un, te ni cajnūhun yá de:

¿Na vé sáha ri jíin ró cáacuni rō?

³³ Te ni cacahān de jíin yá:

Jeē na ndúndijin tinūu ná cáacuni ná, achí de.

³⁴ Te ni cundáhú ni yā de. Te ni tee ya ndaha ya tinūú de. Te ni candundijin-ni tinūú de. Te ni candiquīn de ya cuango de jíin yá.

*Jeē ni quávi Jesús ñuu Jerusalén
(Mr. 11.1-11; Lc. 19.28-40; Jn. 12.12-19)*

21

¹ Te nuū cuácuyajni ya ñuu Jerusalén, te ni jinū yā jíin tée cáscuáha jíin yá ñuu Betfagé, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de. ² Te achí yá jíin de:

Cuáhán ñuu lulí íne ichi núú. Te yūcuan níhīn rō ñn burra, núhní tī jíin ñn burro lulí. Te ndají ró tī, quiijicoo ró jíin tī nuū rī. ³ Te núu ndé ñn cahān jíin ró, te cachi rō nuū: Máá Jítóho yō jíni ñúhún yá tī, achi rō. Yūcuán na te siáá-ni i tī, quiji ró jíin tī, achí yá.

⁴ Te súcuan ni cuu tācá jniñu yáha návāha squícu jnūhun ni cahān tēe ni nacani jnūhun Yaā Dios nde jenahán, yósó núu tútu:

⁵ Cachi rō nuū ñáyuu ñuu Jerusalén jeē naní ñuu Sión:

Yáhá condēhe ró jeē véji Rey rō.

Tu sájéhnu ya maá yá, chi maá burra-ni yósó yá, jíin burrito, sēhe quiiti ndíso.

Achí tutu.

⁶ Yūcuán na te tēe cáscuáha un cuángoo de, te ni casáha de nájnūhun ni ndacu Jesús jniñu nuū de.

⁷ Te ndéca de burra jíin séhe ti, ni ndecoo de nuū yā. Te ni casoó de sahma de siquī tī, te ni jecosō yā tī.

⁸ Te cáhīin cuehē ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi. ⁹ Te ñayuu cuangoo ichi núú jíin ñayuu cuangoo ichi yátá, cácana jee i:

Yōhyo cújéhnu Yaā cúu Sēhe yucūn rey David. Yōhyo vāha Yaā cúu Yaā jeē véji jíin jniñu máá Jítóho yō Yaā Dios. Te yōhyo cújéhnu máá Yaā Dios. Achí i.

¹⁰ Te nuū ni quívi ya ñuu Jerusalén, te ndihi ñayuu ñuu un ní cacuvaā i, te cuehē i cájnūhun jnáhan:

¿Ndé tée cúu tēe yáha? áchí i.

¹¹ Te ni cacahān ñayuu vējicoo jíin yá:

Yāha cúu Jesús jeē nácani jnūhun Yaā Dios, jeē véji nde ñuu Nazaret ndañúū Galilea. Achí i.

Jeē ní quenehen ya ñayuu ini templo

(Mr. 11.15-19; Lc. 19.45-48; Jn. 2.13-22)

¹² Yūcuán na te ni quívi Jesús ini templo cáhnu Yaā Dios. Te ni quenehen ya tāca ñáyuu cájeen quiiti te cánaxíco núú ñáyuu jeē socō i. Te ni scotúú ndeyi ya tāca mesa tēe cástáyí xūhún, jíin silla tēe cáxíco paloma. ¹³ Te áchí yá jíin i:

Yósó núú tútu iī jeē cahán Yaā Dios: Vehe ri chi vehe nuū cájicān tahu cúu, áchí Yaā Dios. Te máá ró jijnáhan ró, chi nájnūhun yaū cava ñacuīhná ni canasáha ró. Achí yá.

¹⁴ Yūcuán na te sava ñayuu cuaá jíin ñáyuu chacuá ni quecoo i nuū yā ini templo un. Te ni

nasávāha ya i. ¹⁵ Te sutū cácujuhnu jíin tée cástéén tutu ley Yaā Dios, ni cajito de tācá jniñu jéhnú sáha ya, te ni cajini de jeē cácana jee sūchi lúli ini templo: Yōhyo cújuhnu Yaā cúu Sēhe yucūn rey David, achí i. Te ni caquitī ni de. ¹⁶ Te ni cacahān de jíin yá:

¿A tu jíni ró jeē súcuan cácahān sūchi yáha? áchí de.

Te ni cahān Jesús jíin de:

Jíni ri. ¿Te á ná tu cahu ró jeē yosó núu tútu iī jeē suhva cáhān iin tēe jíin Yaā Dios?

Sáha ní jeē tāca sūchi lúli jíin sūchi cájexin, vāha ndasí cáhān i jeē Yaā cujuhnu cúu Cristo.

Achí.

¹⁷ Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuāá ún.

Jeē ni cáhān yā nuū yújnu higo

(Mr. 11.12-14, 20-26)

¹⁸ Te jenéhen inga quiivī cuanuhun yā ñuu Jerusalén, te jíi yā sōco. ¹⁹ Te ni jito ya iin nundēhe higo, íin yuhíchi. Te ni jehēn yā jehē. Te tú na ndehē ni níhín yā, chí máá ndaha-ní íin. Te ni cahān yā jíin:

Vijna te ma cúun cuiiti gā ndehē xinī rō, achí yá.

Te ni ichī-ni yujnu higo ún. ²⁰ Te tēe cáscuáha jíin yá, ni canaa ni de cájito de. Te ni cacajñuhún de ya:

¿Nde se ni sáha ní jeē yachí-ni ni ichī yujnu higo? achí de.

²¹ Te ni cahān yā jíin de:

Jendaá cahān rī jíin ró, núu candíje ró te tú cani siquí ni rō, te cuu sáha ró jniñu jéhnú nájnūhun ni sáha ri jíin yujnu higo. Te nde jniñu jéhnú ga cuu sáha ró, chí nde cuu cahān rō jeē cújiyo yucu yáha,

quihīn nuū mar, te sáha nájnūhun cahān rō. ²² Te tāca jéē cacán tahú rō jijnáhan ró, te núu candíje ró jéē nihín rō, te nihīn rō. Achí yá.

Siquī jeē ndíso jniñu Jesús
(Mr. 11.27-33; Lc. 20.1-8)

²³ Te ni quīvī tucu ya ini templo cáhnu. Te níni stéén yā jnūhun, te sutū cácujeñnu jíin táca téé jéñnu jeē cándacu jniñu nuū ñáyuu hebreo, ni quecoo de nuū yā. Te ni cacajñuhún de ya:

¿Ndé ní nihīn jniñu ró jéē sáha ró jniñu yáha? ¿Te ndé ñn ni tee jniñu siquī rō jeē sáha ró súcuan? Achí de.

²⁴ Te ni cahān Jesús:

Suni ruhū, cajñuhun rí rohó ñn jnūhun jíjnáhan ró, te núu cuu stíó cuñí rō, yūcuán na te cachi rī nuū rō ndé ní nihīn jniñu rī jeē sáha rī jniñu yáha.

²⁵ ¿Ndé ñn ni tee jniñu siquī Juan jeē ni scuándute de? ¿A Yaā Dios chí táca téé? áchí yá jíin de.

Yūcuán na te ni candajñuhun máá de:

Núu cahān yō jeē Yaā Dios ni tee ya jniñu un siquī Juan, te cahān de jíin yó: Núu súcuan ¿te najehē tu ní cácaandíje ró de? ²⁶ Te núu cahān yō jeē ñáyuu ni catee jniñu un siquī de, te cáyūhu yó ñáyuu, chi ndivii i cácaandíje i jeē téé ni nacani jnūhun Yaā Dios ni cuu ndije Juan. Achí de cácahān maá de.

²⁷ Te ni cacahān de jíin Jesús:

Tu cájini rī, achí de.

Yūcuán na te ni cahān yā jíin de:

Ni ruhū, suni ma cachi rī nuū rō ndé ñn ni tee jniñu siquī rī sáha rī jniñu yáha, achí yá.

Jnūhun yátá siquī uú sēhe yí

²⁸ Te ni cahān gā yā jíin de:

Cuni nahín ró jnūhun yátá yáha: ĩn tēe ni ĩyo uū sēhe yí de. Te ni cahān de jíin ĩn i: Séhē, quihīn rō taxín ró ndehē uva rī vijna, áchí de. ²⁹ Te ni cahān i: Ma quihín na, áchí i. Te ni cunúu, te ni nacani ni i, te cuahān i nuū jniñu ún. ³⁰ Te tēe un ní jehēn de nuū inga sēhe de, te suni súcuan ni cahān de jíin i. Te ni cahān i: Cuu núu súcuan, te quihīn na, áchí i. Te tu ní jéhén i. ³¹ ¿Te ndese cájeni ni rō? Jeē ndindúú i, ¿ndé ĩn i ni squícu jniñu cúní tatá i? áchí yá.

Te ni cacahān de:

Sūchi jēe ni cáhān de jíin xihna gā, achí de.

Te ni cahān Jesús jíin de:

Súcuan cúu, te jendaá cahán rī jíin ró jeē tēe cástútú xūhun renta jíin ñahan cájica jnéni, yachí canacani ni i jeē stóo i cuēchi i te quívicoo i ndaha Yaā Dios jeē ndacu ya jniñu nuū i, te máá ró jijnáhan ró chi ma quíví ró. ³² Chi ni quiji Juan, ni steén de ndese condiquīn rō jnūhun ndaā, te tu ní cá candíje ró jnúhun ni cahān de. Te sa suhva tēe cástútú xūhun renta jíin ñahan cájica jnéni, ni cacandíje i jnūhun ni cahān de. Te máá ró, vēsú ni cajito ró jēe ní cacandíje i, te tu ní canacani cuiṭi ni rō jeē candíje ró. Achí yá.

Jnūhun yátá síquī tēe née cásjjniñu nuū uva

(Mr. 12.1-12; Lc. 20.9-19)

³³ Cuni sōho inga jnūhun yátá jijnáhan ró: Ni ĩyo ĩn tēe chíi ñuhun. Te ni nachuhun de cuehē ndehē uva. Te ni jesi de corral, te ni sáha de ĩn nuū cúhun ndehē un táxīn. Te ni jeni de ĩn vehe súcún návāha cuu coto de ní cáhnu.

Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá

de. ³⁴ Te máá tiempo ndutútú uva, te ni tají de jecu mozo cuanuquihin sava uva nuū tée cásájniñu ún.

³⁵ Te tēe un ní cajñi de mozo un. Te ñn i ni cacani de, te inga i ni cajehni de, te inga i ni cajēhe de yuū xinī. ³⁶ Te tēe chíí uva ni tají tucu de jecu gā mozo cuango, cuehē gā vēsú jeē xíhna ñúhún. Te suni súcuan ni casáha tēe un jíin ndihi mozo un.

³⁷ Te jeē sándñí na te ni tají de sēhe de cuahān. Te jéni ni de: Tēe ún chi cuatáhú de jíináhan de nuū séhe ri. ³⁸ Te tēe cásájniñu ún, núu ní cajito de nuū séhe tēe chíí uva, te ni cacahān maá: Tēe chíí táhū cúu jeē yáha. Na cáhni yō de, te ndōo tahū de cuu yó, áchí. ³⁹ Te ni cajñi de i, te ni caquenehen de i inga lado, te ni cajehni de i. Achí yá.

⁴⁰ Yūcuán na te ni cajñuhun yá de:

Núu súcuan te núu na quíji tēe chíí uva un, ¿te ndese sáha de jíin tée cásájniñu ún? áchí yá.

⁴¹ Te ni cacahān de jíin yá:

Ma cundáhú cuiti ni de tāca tée cásáha jniñu néé un, chi cahni de. Te cuāha de ñuhun cáá uva un núu inga sava tēe sájniñu nuū, cuu sava de ndehē jíin. Te quivī ndutútú ndehē, te tēe ún nacuāha de sava ndehē nuū tée chíí uva. Achí de.

⁴² Te ni cahān Jesús jíin de:

¿Te á ná tu cahu ró jñuhun yáha jeē yosó núu tútu ñi, jeē ruhū cúu nájñuhun ñn yuū? Chí áchí tutu: Yuū jeē ní casquéhichí tēe cájeni vehe, yuū yáha nduu jeē quítuu vehe. Máá Jítóho yō Yaā Dios ni sáha ya súcuan, te cánaa ni yō jíto yó jniñu yáha. Achí tutu. ⁴³ Núu súcuan te cáhán rī jíin ró jeē cujiyo-ni jeē ndácu Yaā Dios jniñu nuū rō jíináhan ró, te nacuāha ya jniñu un núu inga ñayuu jeē

squícu váha i jniñu ndácu ya nájnūhun cúni yā. ⁴⁴ Te ñayuu tu cácan díje, ndoho i nájnūhun ndóho ñayuu jeē cotúú siquī yuú te jnáhnú i. Te quivī sándaā Yaā Dios cuēchi, te ñayuu tu cácan díje, ndoho i nájnūhun ndóho ñayuu jeē nínga yuū siquī i te cundihī i sáha. Achí yá.

⁴⁵ Te sutū cácu jéhnū jín tée grupo fariseo ni cajini sōho de tāca jnūhun yátá ní cahān yā. Te ni cajecūhun ni de jeē siquī maá de cúu jnūhun yátá ní cahān yā siquī tée cásajniñu nuū uva jín tée cájeni vehe. ⁴⁶ Te ni canducú de modo jñi de ya. Te cáyūhú de jeē quitī ni ñayuu, chi cájeni ni i jeē tée nácani jnūhun Yaā Dios cúu ya.

Jnūhun yátá siquī vico nándāha

22

¹ Yūcuán na te ni cahān tucu Jesús inga jnūhun yátá jín de jínáhan de:

² Súcuan cúu jeē ndácu Yaā andiví jniñu nuū ñáyuu: Cúu nájnūhun ñn rey jeē sáha de ñn vico jeē nándāha sēhe yí de. ³ Te ni tají de tāca mozo de cuacana ñayuu jeē ni cáhān de jín jéē quíjicoo. Te ñayuu ún tu ní cácu ni i quíjicoo i. ⁴ Te ni tají tucu de jecu gā mozo quingoo, te áchí de jín: Cahān jín ñáyuu ní cana ri un jéē iyó túhva ndeyu. Chi je ni jehni rī stiquī rī jín táca gá quitī ní nduu, te ndihí je iyó túhva. Nehen jijnáhan ró vico nándāha. Achi rō jín i. Achí de. ⁵ Te ñayuu ní cana de ún tu ní cásáha i cuenta. Chi ñn i cuahān nuū ítu i, te inga i cuahān nuū jniñu sáha i. ⁶ Te sava ga i ni cajñi i tāca mozo rey, te ni casácatā i nuū, te ni cajehni i. ⁷ Yūcuán na te yōhyo ni quitī ni rey. Te ni tají de soldado

de ni jengoo, ni cajehni de ñayuu ní cajehni ndīyī ún, te ni cajehmu de ñuu i. ⁸ Yūcuán na te ni cahān de jín sava ga mozo de: Ndihi je iyó túhva jeē cóo vico nándāha. Te ñayuu ní cana rī ún, tu iyó váha jeē quíjicoo i chi nasūu ñáyuu vāha cácuu i. ⁹ Núu súcuan te cuáhán jijnáhan ró táca núu náquijnáhan calle. Te cana ró núu nasaa ñayuu nihīn rō, na quíjicoo i vico nándāha. Achí de. ¹⁰ Te ni quendacoo mozo un cuángoo tācá ichi. Te ni castútú de ndihi ñayuu ní canihīn de, cúu ñayuu cunéé, cúu ñayuu váha. Te súcuan te ni chitú ñáyuu ini vehe nuū iyó vico nándāha.

¹¹ Te ni quīvī rey ini vehe jeē cahán de jín ñáyuu ni cutútú. Te ni jito de nuū ñn tēe jeē tu ñúhun sahma jeē ni jéhe de cuhun ñayuu quíjicoo vico nándāha. ¹² Te ni cahān de jín tēe ún: Amigo, ¿ndese ni quīvī ró yáha jéē tu ñúhun ró sahma vico nándāha? áchí de. Te máá tēe ún tu ní cáhán cuiti de. ¹³ Yūcuán na te ni cahān rey jín tēe cájeni cohō: Jñi de te cuhni rō ndaha de jehē de, te quenehen ró de na quíhín de nuū quéhe nuū néē. Te yūcuan ndáhyū de te nacayīhí yuhu de jeē ndóho xeēn de. Achí rey. ¹⁴ Chi cána Yaā Dios cuehē ñayuu jeē na cándíje í. Te jecu-ni i cándíje, te máá i nácāji ya jeē ndúu i sēhe ya. Achí Jesús.

Siquī xúhun renta

(Mr. 12.13-17; Lc. 20.20-26)

¹⁵ Yūcuán na te cuangoo tēe grupo fariseo. Te ni candajnūhún de núu ndese sáha de návāha cahān yā ñn jñuhun jeē nihín de cuēchi siquī yā. ¹⁶ Te ni catajī de jecu tēe cáscuáha jín máá de jín tēe grupo Herodes cuangoo de. Te ni cacahān de jín yá:

Maestro, cájini na jéē tée cáhán ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ní ñn ñayuu siquī ní, chí tu sáha ní cuenta ndese cúu ñn ñn i, chí ñnuú-ni sáha ní jíin i. ¹⁷ Núu súcuan te cahán ní ndese jéni ni ní: ¿A íyó váha jeē chúnaa yō renta nuū rey nación Roma jeē jñí nación yō, chí tuú? áchí de.

¹⁸ Te ni jini Jesús jeē cájito ndee de ya. Te ni cahán yā jíin de:

Tēe stáhú-ni cácuu ró. ¿Najehē cájito ndee rō ruhū? ¹⁹ Stéén xūhun jéē jéconaa renta na cóto ri, achí yá.

Te ni castéén de ñn denario nuū yā. ²⁰ Te ni jito ya, te ni cajñūhun yá de:

¿Ndé ñn nuū cúu jeē ndeé nuū xūhun yáha, te ndé síhví cúu jeē ndeé yāhá?

²¹ Te ni cacahán de jíin yá:

Nuū jíin síhví rey un cúu, áchí de.

Yūcuán na te ni cahán yā jíin de:

Núu súcuan te nacuaaha ró núū rey un jéē yíhi cuenta nuū de, te nacuaaha ró núū Yaā Dios tāca jéē yíhi cuenta nuū maá yá, achí yá.

²² Te nuū ní cajini de jeē ndichí ní cahán yā jñūhun yáha, te ni canaa ni de, te ni castóo de ya, te cuangoo de.

*Jeē ní cacajñūhún de siquī jeē nátecu ndīyí
(Mr. 12.18-27; Lc. 20.27-40)*

²³ Te suni quivī un ní quecoo jecu tēe grupo saduceo nuū yā. Te tēe un cácahán jeē tu nátecu cuítī ndīyí. Te ni cacahán de jíin yá siquī ñn jñūhun, áchí de:

24 Maestro, Moisés ni cahān de jeē núu ìn tēe cuu de, te ndōo ñasihí de, te núu tú sēhe de ní ìyo jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuññī nuū ndīyī ñani de. Achí Moisés. 25 Te ñuu na ní ìyo uxā ñani. Te tēe núu ní quijnáhan de jíin ñahan. Te ni jihī de. Te jeē tú sēhe de ní ìyo, te ni ndōo ñasihí de nuū ñáni de. 26 Te tēe ún suni ni jihī de, te tú na sēhe de ní ìyo tucu. Te suni súcuan tēe unī, nde jíin ndihúxá de. 27 Te nuū ní ndihī de ni cajihī, te suni ni jihī ñahan ún. 28 Núu súcuan te quiñvī nátecu ndīyī, ¿ndé ìn de cuu ña ñasihí de? Chi ndihúxá de ni condeca de ña. Achí de jíin yá.

29 Yūcuán na te ni cahān yā jíin de:

Yōhyo cástivī ró jnūhun siquī jeē tu cájecūhun ni rō jeē cahán tutu ì, ni tu cájini rō jeē iyó poder Yaā Dios jeē nastécu yā ndīyī. 30 Chi quiñvī nátecu ndīyī, te tuá na jnūhun quijnáhan tēe jíin ñahan coo. Chi coo i nájnūhun ndajéhé Yaā Dios andivī. 31 Te siquī jeē nátecu ndīyī, ¿á tu ní cácahu ró tutu jnūhun jeē cahán Yaā Dios jíin ró? 32 Máá rí cúu Yaā Dios Abraham jíin Isaac jíin Jacob, achí Yaā Dios. Chi vēsú je ni cajihī de, te cátecu de nuū iyó máá yá, chi cúu ya Yaā sáha jeē técu ñayuu ñí cáni. Achí yá jíin de.

33 Te ñayuu un ní canaa ni i cájini nahín i jnūhun stéén yā.

*Jniñu cánuú ndasí gá jeē ní ndacu Yaā Dios
(Mr. 12.28-34)*

34 Yūcuán na te tēe grupo fariseo ni cajini de jeē ní cajesī tēe saduceo yuhu de ni sáha ya. Te ni candutútú de nuū yā. 35 Te ìn de jeē cúu tēe stéén

tutu ley Yaā Dios, ni cajnūhún de ya, chi coto ndee de ya cuní de:

³⁶ Maestro, ¿ndé ìn cúu jnūhun ndácu jniñu cánuú ndasí gá nuū tútu ley? achí de.

³⁷ Te ni cahān Jesús jíin de:

Coo manī ndasí ró jíin máá Jítóho rō Yaā Dios, nde jnāā ndasí ró sáha ró ndihí jeē cúsiī ni yā, nde jíin ini jíin ánuá rō, jíin ní jéē níjnūní rō, achí tutu.

³⁸ Yāha cúu jniñu ndácu ya jeē kujéhu ga te cánuú ndasí gá. ³⁹ Te jniñu uū jeē ní ndacu ya, suni súcuan cáhán: Cundáhú ni rō jnāhan ró nájnūhun cundáhú ni rō maá ró. ⁴⁰ Te chíji ndindúú jnūhun yāha ní quenda ndihí ley jeē ní tee Moisés, jíin ndihí jeē ní castéén tēe ni canacani jnūhun Yaā Dios, achí yá.

*Siquí jeē cúu Cristo sēhe yucūn David
(Mr. 12.35-37; Lc. 20.41-44)*

⁴¹ Te níni cáyūcu tútú gá tēe fariseo un, te Jesús ni cajnūhun yá de:

⁴² ¿Ndese cájeni ni rō siquí Cristo? ¿Sēhe ndé yucūn cúu ya?

Te ni cacahān de:

Sēhe yucūn David, achí de.

⁴³ Te ni cahān yā jíin de:

Núu súcuan ¿te ndese cúu jeē David ni cahān de Jítóho de ya, ni sáha Espíritu Santo nde jenahán? Chí ni cahān de:

⁴⁴ Máá Jítóho yō Yaā Dios ni cahān yā jíin Jítóho rī, Yaā quíji:

Cucōo ró lado váha ri nuū kujéhu ró, te na sáha ri jeē quende rō poder tāca jéē cájito uhū rohó.

Achí Yaā Dios. Achí David. ⁴⁵ Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

⁴⁶ Te ni ñn de tu ní cúu stió cuíñí cuiti de jnūhun nuū yā. Te nde quivī ún tuá ni ñn de ní chūndeyí ni de cajnūhún de ya.

*Jeē ni cáhān yā jeē iyó cuéchi de jínáhan de
(Mr. 12.38-40; Lc. 11.37-54; 20.45-47)*

23

¹ Yūcuán na te ni cahān Jesús jín ñáyuu jín téé cáscuáha jín yá:

² Tēe cástéén tutu ley Yaā Dios jín téé grupo fariseo, cájeni ni de jeē ndíso jníñu de jeē steén de ley jeē ni jéhe ya nuū Moisés. ³ Núu súcuan te cuatáhú ró te squícu ró táca jéē cándacu de nuū rō. Te ma sáha ró nájñūhun casáha máá de. Chi cácahān-ni de, te tu cásquícu de. ⁴ Chi suni cástéén de táca ley ni catava maá de jeē yí sáha, te cátee de siquī ñáyuu, te tu cákundeyí i squícu i. Te máá de jínáhan de, chi ni ñn xinī ndáha de tu cáscánda de jeē squícu de. ⁵ Te máni siquī jeē na cuájñúhún ñáyuu de cúu ndíhi jeē casáha de. Chi cánujnahan ni de cuhni de cuehē jnūhun tutu ñ jneē de jín ndaha de. Te suni cáscáni ga de yuhvā yusáhma de jeē steén jeē cácujuhnu ga de vēsú inga ñayuu. ⁶ Te cánujnahan ni de cucōo de nuū silla yíñúhún gá nuū cáyeji ñayuu vico, jín silla yíñúhún gá ini vehe ñ sinagoga. ⁷ Te suni cánujnahan ni de jeē cahán yíñúhún ñáyuu jín de nuū calle, jín jéē cahán i maestro jín de.

⁸ Te máá ró jijnáhan ró, ma cuáha ró jnúhun jeē cahán ñayuu maestro jíin ró. Chi inuú cácuu ndíhi ró jéē cácuu ró hermano, te íyó ñn-ni Maestro rō jeē cúu ruhū, Cristo. ⁹ Te ma chiñúhún ró ni ñn tēe ñayívi yáha jeē cahán rō padre jíin de. Chi íyó ñn-ni Tátá rō jijnáhan ró, Yaā ndeé andiví. ¹⁰ Te suni ma cuáha ró jnúhun jeē cahán i jitohe jíin ró. Chi íyó ñn-ni Jitohe rō, te suu cúu ruhū, Cristo. ¹¹ Te tēe mēhñu ró jijnáhan ró jeē jejníñu nuū jnáhan, suu de cúu jeē cujéhnú ga. ¹² Chi tēe jeē sajehnú de máá de, sa ndululí de. Te tēe jeē sálulí de máá de, sa ndujéhnú de.

¹³ Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cájesi rō jeē quívi ñayuu ndaha Yaā andiví jéē ndacu ya jniñu nuū i. Chi tu quívicoo máá ró, ni tu cájēhe ro jnúhun quívicoo ñayuu nducú quívi.

¹⁴ Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cáquende rō vehe ñahan ní caquendōo ndáhú. Yūcuán na te cájicān tahu nahán ró návāha cani ni ñayuu jeē tú na cuēchi ró. Jeē yūcuan xeēn gā ndoho ró castigo.

¹⁵ Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi níñuhun íchi jíin níñ mar cájica cuu ró cánducú ró ñn ñayuu scandíje ró sáhān maá ró. Te núu ni candíje i, te cásáha ró jéē vihyá gā cúu cuēchi i jeē quihín i infierno vēsú maá ró.

¹⁶ Nacā xeēn ndoho ró, chi cácuu ró nájñuhun tēe cuáá jéē steén ichi nuū ñáyuu. Chi cácahān rō: Núu ndé tēe jéjñuhun téyí de, te núu cahān de jeē Yaā Dios jeē ndeé ini templo na cuáha ya castigo

núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō.

¹⁷ Tēe cánéé tēe cuáá cácuu ró jēē castívi ró jnūhun cácahān rō. ¿Ndé ìn cúu jeē kujéhu ga, á oro un chíí Yaā Dios jeē ndeé ini templo jeē sáhiī oro un?

¹⁸ Te suni cácahān rō: Núu ndé tēe jéjnūhun téyí de, te núu cahān de jeē Yaā Dios jeē chíí altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí ndajníñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō. ¹⁹ Tēe cánéé tēe cuáá cácuu ró jēē castívi ró jnūhun cácahān rō. ¿Ndé ìn cúu jeē kujéhu ga, á ndajníñu yúcu nuū altar, chíí Yaā Dios jeē sáhiī yā ndajníñu ún?

²⁰ Núu súcuan te tēe jéjnūhun téyí, te núu ndácunehen de Yaā Dios jeē chíí altar, núu súcuan te nde jíin ndajníñu yúcu nuū altar ndácunehen de. ²¹ Te tēe jeē jéjnūhun téyí, te núu ndácunehen de templo, núu súcuan te nde jíin Yaā Dios jeē ndeé ini templo ndácunehen de. ²² Te tēe jéjnūhun téyí, te núu ndácunehen de andívi, núu súcuan te suni ndácunehen de mesa Yaā Dios te nde jíin máá Yaā Dios jeē ndeé nuū mesa un.

²³ 'Nacā xeēn ndoho rōhó tēe cástéén tutu ley jíin rōhó tēe fariseo, chí tēe stáhú-ni cácuu ró. Chí cásáha ró úxī uxī nuhnī tamínú jíin yucū anís jíin yucū comino, te cásocō rō ìn ìn siquī tāca úxī un núu Yaā Dios. Te cástóo ró jnūhun cánuú ndasí gá nuū ley, suu jeē cáca ndaā rō, jíin jēē cundáhú ni rō jnáhan ró, jíin jēē candíje ró. Tāca jēē yáha cánuú sáha ró núú, te suni ma stóo ró jēē socó rō tāca yúcū

ún. ²⁴ Cácuu ró nájñūhun tēe cuáá jéē steén ichi nuū ñayuu. Chi cásquícū ró ññ jeē lulí gá un, te cástóo ró jéē cánuú gá. Te suu cúu nájñūhun jeē cátava rō chūcún ndíhī jeē ññūhun nuū ndúxi, te cácocó ró ññ quiṭi cáhnu jeē naní camello.

²⁵ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi nájñūhun jeē cánacate ró yátā vaso jíin yátā cohó. Te ichi íni rō chi ññūhun máni máá jñūhun cuihná jíin jñūhun ndíyo ni. ²⁶ Tēe cuáá cácuu ró, fariseo. Xihna gā sáha ró jéē coo ndoo ini anuá rō, te yūcuán na te suni coo ndoo tāca jéē casáha ró jéē cájito ñayuu nuū.

²⁷ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cándāa ró nájñūhun vehe ndīyi nuū panteón jeē cáyaa. Chi ichi yátá jíto luu, te ichi íni ññūhun chitú yiqui ndīyi jíin táca jéē tehyú. ²⁸ Te súcuan cácuu máá ró, chi ichi yátá rō casáha ró jeē tēe ndaā cácuu ró núū ñáyuu. Te ichi íni rō ññūhun chitú jñūhun stáhú-ni jíin jñūhun néé.

²⁹ 'Nacā xeēn ndoho rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi casáha ró vehe siquī nuū yíndūji ndīyi jíi rō, tēe ni canacani jñūhun Yaā Dios nde jenahán. Te casáha luu ró vehe siquī nuū yíndūji tāca tēe ni iyo ndaā.

³⁰ Te cácahān rō: Núu jeē suni yúcu yó tiempo jeē ní cotecu ndīyi jíi yō, te ma squívi nduu yō jíin de jeē cáhni yō tēe ni canacani jñūhun Yaā Dios, achí ró. ³¹ Te súcuan cácahān ndaā rō jeē máá ró cácuu yucūn ñayuu ni cajehni tēe ni canacani jñūhun ya.

³² Núu súcuan te tāca cuéchi jeē ní casquéjéé ndīyi jíi rō, máni un casáha ga máá ró.

³³ Va sēhe coō cácuu ró, chi xeēn rō nájñuhun coō. ¿Ndese cācu ró jēē ma jnahnú ndetū rō quingoo ró infierno? ³⁴ Núu súcuan te tají rí tāca téē nacani jñuhun Yaā Dios nuū rō, jiín tāca téē ndíchí jēē castéén jñuhun ya. Te sava de cahni rō, te sava de cata caa ró jicā cruz. Te sava ga de cani ró de ini tācá vehe iī sinagoga, te scúnu ró de quingoo de tācá ñuu. ³⁵ Te súcuan te condee cuēchi siquī maá ró jeē ní cajehni jíí rō tāca téē ndaā, xīhna gā nde Abel téē ndaā, te nde Zacarías sēhe Berequías, téē ni cajehni de ini templo sava mēhñu cuarto iī jiín altar. ³⁶ Jendaá cahán rī jiín ró jeē tāca cuéchi yáha condee siquī ñáyuu iyó vijna.

*Jeē cucuíhyá ni yā jíto ya ñuu Jerusalén
(Lc. 13.34-35)*

³⁷ 'Róhó ñuu Jerusalén, jéhni rō téē cánacani jñuhun Yaā Dios, te jéhe ro yúū xinī téē tájí Yaā Dios vējicoo nuū rō. Te cuehē jínu ni cuni rī nastútú rí sēhe ró, nájñuhun ndují jēē nastútú tí sēhe tí chíji ndijēn tī, te tu ní cúní rō. ³⁸ Núu súcuan te vijna te stóo uun na ri rohó jíín séhe ró. ³⁹ Chi cáhán rī jiín ró jēē ndé vijna te ma cóto cuítí gā rō nuū rī, chi nde quiiji quiiví jeē cahán sēhe ró: Yōhyo vāha Yaā cúu Yaā véndiji jíín jniñu máá Jítóho yō Yaā Dios, achi i. Achí yá.

*Jeē ní cachi yā jeē náā templo
(Mr. 13.1-2; Lc. 21.5-6)*

24

¹ Te ni quenda Jesús ini templo cáhnu cuahān yā. Te ni quecoo téē cáscuáha jíín yá, te ni cacahān de

jíin yá siquī tācá vehe jeē ndejnáhan jeē cúu máá templo un. ² Te ni cahān yā jíin de:

Tāca jéē cájito ró yáha, jendaá cahán rī jíin ró jeē quiji quivī jeē ma cóso jnáhan ga ni ñn yuū, chi ndihī jnanū. Achí yá.

*Na seña coo nuū cuácuyajni ndihī ñayiví
(Mr. 13.3-23; Lc. 21.7-24; 17.22-24)*

³ Te ni jehēn yā jíin tée cáscuáha jíin yá nde yucu Olivos, te ni cucōo ya yūcuán. Te ni quecoo de nuū yā, te ni cacajñuhun sñn de ya:

Castūhun ní ndé quivī coo tāca jéē ní cachi ní jéē coo. ¿Te na seña coo núu ni cuyajni quivī ndíji ní jíin jéē jínu ñayiví? áchí de.

⁴ Te ni cahān Jesús:

Coto ró jéē ma stahú ni ñn de róhó. ⁵ Chi quijicoo cuehē tée jeē stahú jíin síhví rí. Máá rí cúu Cristo, achi de. Te súcuan stáhú de cuehē ñayuu. ⁶ Te nihīn rō jñuhun jeē tāca lado iyó guerra, chí je yajni coo guerra. Te ma yūhu ró, chi cánuu coo súcuan. Te ni ná tu jinū quivī ndihī ñayiví. ⁷ Chi ndonda nación siquī inga nación, te ndonda ñuu siquī inga ñuu jeē cuajnáhan. Te coo jnamā jíin cuéhyī xeēn. Te cháha chúcuan jnāa. ⁸ Te tāca jéē yáha cácuu jñundóho quejéé xihna ñúhún gá.

⁹ Yūcuán na te nastúu i róhó jíjnáhan ró jéē stóho i róhó te cahni i róhó. Te ndihī ñayuu quitī ni i nuū rō jeē siquí ruhū. ¹⁰ Te quivī ún chi cuehē ñayuu candíje caca yátá i, te quitī ni i nuū jnáhan i, te nastúu jnáhan i. ¹¹ Te canecoo cuehē tée stáhú, te cahān de jeē jnúhun Yaā Dios cánacani de, te stáhú de cuehē ñayuu. ¹² Te nducuehē jniñu néé, te jeē yúcuan cuehē i ma cóo manī gā i. ¹³ Te ñayuu cuiñi

n̄hin jín jnūhun ri nde quiṽí jínu, ñayuu ún chi cācu. ¹⁴Te jnūhun yáha síquī ndese ndácu Yaā Dios jniñu, cuitē núu n̄í cáhnu ñayīṽí, návāha cuni ñayuu tācá nación. Yūcuán na te jīnu ñayīṽí.

¹⁵Te Daniel, tēe ni nacani jnūhun Yaā Dios, ni tee de jnūhun ñn tēe néé jéé quiji. Te róhó jéé cácahu tutu ún, na jécūhun ni rō. Chi ñn quiṽí te cuni rō jeé sáha ndevāha de jeé stívi de tācá ndajniñu ñi ini templo, te cuiñi de ini lugar ñi. ¹⁶Te núu cuni rō jeé súcuan cúu, te ñayuu cáyūcú región Judea, na cúnu i caa i yucu quingoo i. ¹⁷Te ñayuu cáyūcu núu quehe, ma ndívi i ini vehe jeé queñehen i ndajniñu i, chi cánuú cunu yachī i návāha cācu i. ¹⁸Te ñayuu cáhñi nuū ítu, ma ndíji i vehe jeé quihin i sahma i. ¹⁹Te quiṽí ún nacā jeé ndahú ñahan cáñuhun sēhe jín ñahan cándeca yiquín, chi ma cúnihin ña cunu yachī ña. ²⁰Te cacān tahu rō jeé ma quiji jnūndóho un jéé cunu ró máá tiempo cúun yuhvā ni quiṽí ndétátú. ²¹Chi jeé quejéé un te coo cuehē jnūndóho xeñ, jeé ná tu coo súcuan nde quiṽí ní jecōo ñayīṽí te nde vijna. Te jeé ndíhi jnūndóho ún te ni ma cóo ga jeé súcuan. ²²Te núu tú nastíyi Yaā Dios tiempo jnūndóho ún, te ni ñn ñayuu ma cácu cuiti i. Te jeé síquí ñáyuu cácandíje jeé ní nacāji ya, jeé yúcuan nastíyi ya tiempo un.

²³Núu súcuan te núu ñn ñayuu cahān jín ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéé cahán i. ²⁴Chi canecoo tēe cástáhú jéé achi de jeé Cristo cúu de, chí achi de jeé tēe nacani jnūhun Yaā Dios cúu de. Te sáha de jniñu jéhu jeé naa ni ñayuu coto i, návāha stáhú de nde maá ñáyuu ní nacāji ya, te núu na

cúu. ²⁵ Je ni castūhun rí nuū rō vijna nde ná tu coo. ²⁶ Núu súcuan te núu cahān ñayuu jíin ró: Cuácondēhe ró, chi nde nuū ñūhun téhé íne ya, achi i, te ma quihín rō condēhe ró. Chí núu cahān i: Nehen condēhe ró, chi ini vehe yāha íne ya, achi i, te ma candíje ró jíjnáhan ró. ²⁷ Chi nájnūhun jeē ndíndēe sáha taja te cúndijin nde ichi núū cáne niāndii jíin ndé ichi núū quée niāndii, suni súcuan coo quivī ndiji ruhū, Yaā ní nduu tēe, chi ndihi ñayuu coto. ²⁸ Te nájnūhun jeē cutútú téji ndé-ni cúu nuū catú quití ní jíhī, suni súcuan coo tāca jēē ni cáhān rī ndé-ni cúu-ni nuū cáhīyo ñayuu.

Ndese coo quivī ndiji Yaā ní nduu tēe
(Mr. 13.24-37; Lc. 21.25-33; 17.26-30, 34-36)

²⁹ 'Yūcuán na te núu ni ndihi tāca jnūndóho quivī ún, te cojnúú níāndii, te yoō ma ndíi gā. Te ñingoo quimi andiví. Te tāca jēē ín andiví chi quisí i. ³⁰ Yūcuán na te coto ñayuu nuū maá rí, Yaā ní nduu tēe, ndiji ri ichi ándiví. Te ndahyū ñayuu tācá nación ní cáhnu ñayiví. Te coto i nuū ruhū, Yaā ní nduu tēe, ndiji ri jíin vícō andiví, te condiso ri cuehē poder, te yōhyo luu kujéhnu ri. ³¹ Te tají rí ndajéhé rī quingoo, te tiví ñihin ya trompeta. Te quinastútú yá ñayuu ní nacāji ri ndicúún lado ñayiví, nde ñin lado ñayiví jíin ndé inga lado.

³² 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. ³³ Te suni súcuan núu ni cajini rō jeē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndiji ri, te yachí coo. ³⁴ Jendaá cahán rī jíin ró jeē ma cúu ndihi ñayuu jeē cóto jnūndóho ún, chi nde

squícu ndihi jniñu ún. ³⁵ Andiví jín ñáyiví chi naa, te tāca jnūhun cáhán rī chi ma náā, chi ndihi squícu.

³⁶ Te quiví jín hora jeē ndíji ri, tú ni ñn ñayuu jiní, ni máá ndajéhé cáhīyo andiví, ni máá rí, Sēhe Yaā Dios. Chi máá ñn ni Tátá rī Yaā Dios cúu jeē jiní.

³⁷ 'Chi nájnūhun ni cuu quiví ni íyo Noé, suni súcuan coo quiví ndiji ruhū, Yaā ní nduu tēe. ³⁸ Chi quiví ún, nde ná tu cuun saū xeén, te cáyeji i cájihī i, cánandāha i, te cájēhe i sēhe síhī i jeē nándāha, nde ni jinū quiví jeē ni quiví Noé ini barco cáhnu jeē naní arca. ³⁹ Te tu ní cá candíje ñayuu jeē cuun saū xeén, te ni cuun, te ni ndaa ndute ni cajihī ndihi i. Te suni súcuan coo núu na ndíji ruhū, Yaā ní nduu tēe. ⁴⁰ Te quiví ún cone uū tēe sájniñu nuū ítu. Te ñn de naquihin ri, te inga de ndōo. ⁴¹ Te coo uū ñahan jeē ndíco cáhnu, te ñn ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chi tu ní cá candíje i.

⁴² 'Núu súcuan te ndito na cóo ni rō, chi tu cájini rō na quiví ndiji Jitoho rō. ⁴³ Te na chúhun ni rō jeē cahán jnūhun yátá yáha: Tēe chíí vehe, núu jeē jiní de na hora quiji ñacuīhná, te condito de, te ma cuáha de jnūhun sácuīhná ndajniñu vehe de núu. ⁴⁴ Te róhó jijnáhan ró, suni súcuan coo tūhva ró, chi máá hora jeē tú na vé cájeni ni rō, te ndiji ruhū, Yaā ní nduu tēe.

*Jnūhun yátá síquī mozo
(Lc. 12.41-48)*

⁴⁵ 'Núu súcuan te coo ró nájnūhun ñn mozo jeē ndító xinī te squícu vāha. Te máá patrón ni jeni de mozo un jēē cóto i ñayuu vehe de, návāha scáji i máá hora. ⁴⁶ Te yōhyo ndetū mozo un jēē núu ni

ndee patrón, te cuni de jeē súcuan squícu vāha i. ⁴⁷ Jendaá cahán rī jíin ró jeē cani de mozo un jēē cóto i ndihī ndajníñu de. ⁴⁸ Te núu mozo sáha néé cúu i, te jéni ni i jeē ma ndíji yachī patrón i, ⁴⁹ te quejéé i cani i jnáhan mozo i, te caji i coho i jíin téé cánajīni, ⁵⁰ núu súcuan te ndee-ni patrón quivī jeē tu ndétu i jíin hora jeē tú na vé jéni ni i. ⁵¹ Te stóho xeēn de i, te squívī de i nuū cáhīin téé stáhú-ni. Te yūcuan ndáhyū i te nacayihī yuhu i jeē ndoho xeēn i. Achí yá.

Jnūhun yátá síquī uxī sūchi síhí

25

¹ Te suhva cúu jeē ndácu Yaā andiví jniñu nuū ñáyuu: Cúu nájñūhun ñn vico nándāha. Te ni ñyo uxī sūchi síhí jeē ní caquihin i linterna cándaha i, te ni quendacoo i cuajnahān i ñn téé nandāha. ² Te uhūn i chi tú ndito xinī i, te uhūn i chi ndito xinī i. ³ Te sūchi tú ndito xinī, cándaha i linterna i, te tu cándaha i petróleo jeē náchuhun i. ⁴ Te sūchí ndito xinī, chi cándaha i botella petróleo jíin linterna i. ⁵ Te níni cúcuéé quiji téé nandāha ún, te ni quee māhná, te ni caquixī ndihī i. ⁶ Te nuū ní cuu sava ñuú, te ni cajini i jeē cácana jee: Je vēji téé nandāha. Cuángoo quijnahan rō de jíjnáhan ró, áchí. ⁷ Yūcuán na te tāca súchi síhí un ní candonda i, te ni casátūhva i linterna i. ⁸ Te sūchi tú ndito xinī, ni cacahān i jíin súchi ndito xinī: Cuāha jecu petróleo nuū rī jijnáhan ró, chi cuandahvā linterna rī, achí i. ⁹ Te ni cacahān sūchí ndito xinī: Ma cúu, chi ma cánda jeē cúu máá rí jíin máá ró. Vāha ga quingoo ró núū cúyāhu, te cuaan ró jēé cúu máá ró. Achí i. ¹⁰ Te

níní cuángoo i cuaan i, te ni quee-ni tēe nandāha. Te sūchi cáhīyo tūhva un, ní quívicoo i jín de vico nándāha de. Te ni ndihyū yehyí. ¹¹ Te ni cunúu, te ni quecoo uhūn gā sūchi síhí un. Te ni cacahān i jín tēe nándāha: Nune ní yéhyí na quívicoo ná, áchí i. ¹² Te ni cahān maá de: ¿Ndé nuū véjicoo ró? Chi tu jíní rī rohó, áchí de. Achí yá.

¹³ Yūcuán na te ni cahān yā:

Núu súcuan te ndito coo ni rō, chi tu cájini rō na quívī na hora ndiji ruhū, Yaā ní nduu tēe. Achí yá.

Jnūhun yátá síquī tēe ní jēhe núu xūhun núu tāca mozo

¹⁴ 'Te suhva cúu jeē ndácu Yaā andiví jniñu nuū ñáyuu: Cúu nájnūhun ñn tēe jeē quihīn jicá de ñnga ñuu. Te nde ná tu quihīn de te ní cana de mozo de jijnáhan, te ni jēhe núu de xūhún de nuū i, jeē na sájniñu i jín návāha nducuehē.

¹⁵ 'Te nuū ñn i ni jēhe de uhūn mil xūhun cáa. Te nuū ñnga i ni jēhe de uū mil. Te nuū ñnga i ni jēhe de ñn mil. Súcuan ni jēhe de, chi jíní de nasaa canda ñn ñn i sájniñu i jín. Yūcuán na te ni quihin de ichi cuahān jicá de. ¹⁶ Te mozo jeē ní quihin uhūn mil xūhún, ni sájniñu de jín. Te ni nihīn de uhūn gā mil síquī. ¹⁷ Te mozo jeē ní quihin uū mil xūhún, suni ní nihīn de uū gā mil síquī. ¹⁸ Te mozo jeē ní quihin ñn mil xūhún, ni jehēn de ni jete de yaū, te ni chisāhí de xūhún patrón de.

¹⁹ 'Te ni yāha cuehē tiempo, te ni ndee patrón mozo un jijnáhan. Te ni nandacān de cuenta nuū i. ²⁰ Te ni quee mozo jeē ní quihin uhūn mil xūhún un, te ni nacūaha de xūhún un núu patrón de jín úhūn gā mil jeē ni nihīn de síquī. Te ni cahān de:

Ni jēhe ní úhūn mil nuū ná, te yāha íyó úhūn gā mil jeē ni níhīn na síquī. Achí de. ²¹ Te ni cahān patrón jíin de: Iyó váha núu súcuan. Yōhyo vāha mozo cúu ró jéē squícu vāha ró. Chi vāha ni squícu ró ñn jniñu lúli-ni, te vijna te cuāha ri jniñu jéhu ndacu ró. Te quīvi ró núu cusī ni rō jíin rí. Achí de. ²² Yūcuán na te ni quee mozo jeē ní quihin uū mil xūhún un. Te ni cahān de: Ni jēhe ní úū mil nuū ná, te yāha íyó úū gā mil jeē ni níhīn na síquī. Achí de. ²³ Te ni cahān patrón jíin de: Iyó váha núu súcuan. Yōhyo vāha mozo cúu ró jéē squícu vāha ró. Chi vāha ni squícu ró ñn jniñu lúli-ni, te vijna te cuāha ri jniñu jéhu ndacu ró. Te quīvi ró núu cusī ni rō jíin rí. Achí de. ²⁴ Te ni quee mozo jeē ní quihin ñn mil xūhún un, te ni cahān de jíin patrón: Je jíni na níhín jéē tée xeēn cúu ní. Chi cuehē gā cuní ní vēsú jeē cúu sáha mozo ni, te cuehē gā nándacān ní vēsú jeē ni jéhe ní. ²⁵ Te jeē yúcuan ní yūhu ná, te ni jehēn na ní chisāhi ná xūhun ní chíji ñuhun. Te yāhá na nácuāha na xūhun ní. Achí de. ²⁶ Te ni cahān patrón jíin de: Mozo cuxí cúu ró te máni jniñu néé sáha ró. Chi jéni ni rō jeē cuehē gā cuní rī vēsú jeē cuu sáha mozo rī, te cuehē gā nándacān rī vēsú jeē ni jéhe rí. ²⁷ Núu jeē ni chúne ró xūhun rí nuū banco nuú, te jeē ní ndee rī te naquihin rí xūhun rí nde jíin séhe xūhun núu. Achí de jíin i. ²⁸ Te ni cahān de jíin táca gá mozo de: Núu súcuan te quende rō mil xūhun jíñā nuū i, te cuāha ro núu mozo névāha uxī mil. ²⁹ Chi ñayuu jeē névāha, sa quiji ga nuū i, te cone vāha cuehē i. Te ñayuu jeē tu névāha, sa cujiyo-ni vēsú jecu jeē névāha i. ³⁰ Te mozo yáha jéē tu sájniñu vāha, quenehen ró i na quíhín i nuū quéhe nuū néē. Te

yūcuan ndáhyū i te nacayihí yuhu i jeē ndoho xeēn i. Achí patrón un.

Siquī jeē cóo juicio tācá nación

³¹ Te ni cahān gā yā:

Īn quivī te ndiji máá Yaā ní nduu tēe, te cuu ya Rey nuū ñayuu. Te tācá ndajéhé yā cuiñi ní xiin ya. Te cucōo ya mesa nuū ndácu ya jniñu, te yōhyo luu kujéhnua ya. ³² Te ndutútú ñayuu tācá nación nuū yā. Te sásin ya i jijnáhan i, nájñūhun cúsin lanchi jín ndixúhú sáha tēe ndíto ti. ³³ Te ñayuu váha jeē cúu nájñūhun lanchi, chucú yá i lado váha ya. Te ñayuu neé jeē cúu nájñūhun ndixúhú, chucú yá i lado jecó yá. ³⁴ Yūcuán na te cahān Rey jín ñayuu cáhīn lado váha ya: Nacā ndetū rō jeē ní sáha Tátá rī jín ró. Nehen quivicoo ró núū ndácu ró jniñu. Chi nde quivī ní jecōo ñayiví te je ni sátūhva ya nuū ndacu ró jniñu. ³⁵ Chi ni jii rī sōco, te ni cajēhe ro jēe ní yeji rī. Ni jichī rī ndute, te ni cajēhe ró jēe ní jihī rī. Ni quiji rī nde ñuu jicá, te ni cajēhe núú ró vehe ni ndōo rī. ³⁶ Ni cumanī sahma rī, te ni cajēhe ró. Ni cocuhū rī, te ni jecondēhe ró ruhū. Ni ine ri vecāa, te suni ni jecondēhe ró ruhū. Súcuan cahān yā jín ñayuu cáhīn lado váha ya. ³⁷ Yūcuán na te cahān ñayuu váha un jín yá: ¿Na quivī ní cajito ná níhín jēe jíi ní sóco, te ni cajēhe na jēe ní yeji ní, chí jēe jichí ni ndute, te ni cajēhe ná ní jihī ní? ³⁸ ¿Te na quivī ní cajito ná jēe ní quiji ní ndé ñuu jicá, te ni cajēhe núú ná vehe ni ndōo ní, chí jēe cúmanī sahma ní, te ni cajēhe ná? ³⁹ ¿Te na quivī ní cajito ná jēe cuhú ni, chí jēe íne ní vecāa, te ni jecondēhe ná níhín? achi i. ⁴⁰ Yūcuán na te cahān Rey jín i: Jendaá cahán rī jín ró jēe ná ni casáha ró súcuan jín ĩn tācá hermano

rī jeē cá candíje, vēsú ñayuu núu ga cúu i, te nuū maá rí ni casáha ró.

⁴¹ Yūcuán na te suni cahān Rey jíin ñáyuu cáhīn lado jecó yá: Ñayuu jnahnū ndetū cácuu ró. Cuiyo quingoo ró núu ñuhún jeē cayú ní cáni, nuū iyó túhva cone jexeén jíin táca táchī jeē cájejnīñu nuū.

⁴² Chi ni jíi rī sōco, te tu ní cájēhe ro jéē caji rī. Ni jichī rī ndute, te tu ní cájēhe ro jéē coho rī. ⁴³ Ni quiji ri nde ñuu jicá, te tu ní cájēhe núu ró vehe ndōo rī. Ni cumanī sahma ri, te tu ní cájēhe ró. Ni cocuhū rī, ni ine ri vecāa, te tu ní jécondēhe ró ruhū. Súcuan cahān yā jíin ñáyuu cáhīn lado jecó yá. ⁴⁴ Yūcuán na te cahān ñayuu un jíin yá: ¿Na qui vī ní cajito na níhín jéē jíi ni sōco, chí jéē jichí ni ndute, chí jéē ní quiji ní ndé ñuu jicá, chí jéē cúmanī sahma ní, chí jéē huhú ni, chí jéē íne ní vecāa, te tu ní cájēhe na jéē cúmanī nuū ní? Achi i. ⁴⁵ Yūcuán na te cahān yā jíin i: Jendaá cahán rī jíin ró, jeē tu ní casáha ró súcuan jíin ni ñn tācá hermano rī jeē cá candíje, vēsú ñayuu núu ga cúu i. Núu súcuan te suni nuū maá rí cúu jeē tu ní casáha ró, achi yā. ⁴⁶ Yūcuán na te quingoo ñayuu un núu ndóho i ní cáni. Te ñayuu váha un qui vīcoo i nuū cótecu i ní cáni. Achí Jesús.

*Jeē ní casquíjnáhan de jnūhun jeē jnñ de Jesús
(Mr. 14.1-2; Lc. 22.1-2; Jn. 11.45-53)*

26

¹ Te nuū ní ndihí ni cahān Jesús táca jnūhun yáha, te ni cahān yā jíin téé cáscuáha jíin yá:

² Je cájini rō jeē uū na qui vī te coo vico pascua. Te ruhū, Yaā ní nduu tēe, nastúu i ruhū jeē cúu rī jicā cruz, achí yá.

³ Yūcuán na te sutū cácujuhnu, jíin tée cástéén tutu ley, jíin táca tée jéhu jeē cándacu jniñu nuū ñáyuu hebreo, ni candutútú de ini patio vehe palacio maá sūtū cujuhnu ga jeē naní Caifás. ⁴ Te ni candajnūhún de ndese jñi de Jesús jíin jnūhun stáhú, te cahni de ya. ⁵ Te ni cacahān de:

Ma jñi yó de máá quívi víco, chi ndonda ñayuu siquī yō, achí de.

*Jnūhun ñahan jeē ní chuhun perfume xinī yā
(Mr. 14.3-9; Jn. 12.1-8)*

⁶ Te íne Jesús ñuu Betania vehe Simón, tēe ni ndoho cuehyī stehyú. ⁷ Te ni quee ñn ñahan nuū yā, ndáhá ña ñn frasco yuū luu jeē ñūhun aceite perfume jeē yóhyo yahu ndéé. Te ni chuhun ña xinī yā níní jéē yéji yā staā. ⁸ Te ni cajito tēe cáscuáha jíin yá, te ni caquiñi ni de, te ni cacahān de:

¿Najehē cúu jeē náā saá-ni perfume jíñā? ⁹ Chi cuu xīcó yahu yó núú, te cuāha yo xūhun núú ñáyuu ndahú. Achí de.

¹⁰ Te ni jini Jesús jnūhun cácahān de. Te ni cahān yā jíin de:

¿Naun cásáha ró jéē nácani uhū ni ñahan yáha? Chi ñn jniñu váha cúu jeē ni sáha ña jíin rí. ¹¹ Chi níní coyūcu ñáyuu ndahú jíin ró, te ruhū chi tuá condee rī jíin ró. ¹² Chi jeē ní chuhun ña perfume yáha ruhū, suu cúu jeē ni sātūhva ña ruhū nde quívi quíndūji rí. ¹³ Jendaá cahān rī jíin ró jeē ní cáhnu ñayāvi ndé-ni cúu nuū cuité jnūhun yáha jéē jnáma rí ñayuu, suni nacani i jnūhun jeē ni sáha ñahan yáha, návāha cocuhun ni ñayuu ña, achí yá.

Jeē ní nastúu Judas yā
(Mr. 14.10-11; Lc. 22.3-6)

¹⁴ Yūcuán na te ñin jeē ndihúxí uū tēe cáscuáha ún, nání de Judas Iscariote, ni jehēn de nuū sutú cácujuhnu. ¹⁵ Te ni cahān de jíin:

¿Nasaa cuāha ní núū ná, te na nástúu ná de nuū ní? áchí de.

Te ni cajēhe ocō uxī xūhun plata nuū de. ¹⁶ Yūcuán na te nde quivī un ní quejéé de ndúcú de modo ndese nastúu de ya nuū sutú jijnáhan.

Jeē ní jequin yā Cena yā
(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Te máa quivī jeē quejéé vico jeē cáyeji ñayuu pan jeē tú na levadura yāhi, te ni quijicoo tēe cáscuáha un núū Jesús. Te ni cacahān de jíin yá:

¿Ndé nuū cuní ni jéé quísatūhva ná cuxíni ní vico pascua? áchí de.

¹⁸ Te ni cahān yā:

Cuángoo nde ñuu, vehe tēe jeē jé ni cacahān yō, te cahān rō jíin de: Achí máa Maestro jeē ní cuyajni quivī cuu yā. Te vijna te caji yā vico pascua ini vehe ní jíin tēe cáscuáha jíin yá, achi rō. Achí yá.

¹⁹ Te tēe cáscuáha jíin yá, ni casáha de nájñuhun ni ndacu Jesús jniñu nuū de, te ni casátūhva de jeē cuxíni ya vico pascua.

²⁰ Te jeē cuácuaa, te ni quee yā, te ni cucōo ya mesa jíin ndihúxí uū tēe cáscuáha jíin yá. ²¹ Te níni yéji yā jíin de te ni cahān yā:

Jendaá cahán rī jíin ró jeē ñin rōhó nastúu ruhū vijna, áchí yá.

²² Te ni cacucuíhyá ndasí ni de. Te ná ñin ná ñin de ni cacajñuhún de ya:

¿A sáña cúu? áchí de.

²³ Te ni cahān yā:

Ñin rōhó jēē cáyeji cáhnu jíin rí ñin cohō, suu ró nastúu ruhū. ²⁴ Te ruhū, Yaā ní nduu tēe, jendaá cúu jeē quihín rī cuu rī, nájñuhun yósó jñuhun ri nuū tútu ñi. Te nacā xeēn ndoho tēe nastúu ruhū. Vāha ga núu tu ní cácu tēe un núú, áchí yá.

²⁵ Yūcuán na te ni cahān Judas, tēe nastúu ya:

¿A sáña cúu, Maestro? achí de.

Te ni cahān yā jíin de:

Suu ró cúu, áchí yá.

²⁶ Te níni jēē cáyeji de jíin yá, te ni quihin ya pan, te ni nacuatáhú yá, te ni tahú cuéchi yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chi yāha cúu yiqui cúñu rī, achí yá.

²⁷ Yūcuán na te ni quihin ya ñin copa ndūxi uva, te ni nacuatáhú yá, te ni jēhe ya nuū de. Te ni cahān yā:

Coho jíjnáhan ró. ²⁸ Chi yāha cúu niñi rī jeē cuáha ri jeē cúu contrato jeé, te cati jeē ndundoo cuēchi cuehē ñayuu, te coo jñuhun cáhnu ni nuū cuéchi i.

²⁹ Te cáhán rī jíin ró jeē ndé vijna te ma cóho ga rī ndūxi ndehē uva yāhá, chi nde quiji quiví ndacu Tátá rī jniñu ní ñayiví, te sáa te coho tucu ri jíin ró jijnáhan ró. Achí yá.

Jeē ní cachi yā jeē yūhu Pedro cahān de jeē jiní de ya

(Mr. 14.26-31; Lc. 22.31-34; Jn. 13.36-38)

³⁰ Te ni jita ya ñn yaa iī jín de jínáhan de. Te ni quenda ya cuahān yā jín de nde yucu Olivos.

³¹ Yūcuán na te ni cahān yā:

Ndivii rō nayūhu ró jeē siquí ruhū jecuáa vijna. Chi suhva je yósó jnúhun ri nuū tútu iī, ni cahān Yaā Dios: Cuāha ri jnúhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, achí.

³² Te jeē nátecu rī, te xīhna ruhū cosnúu rí quihīn rī región Galilea, te sáa te najinūcoo ró, achí yá.

³³ Yūcuán na te ni cahān Pedro:

Vēsú ndihī de na náyūhú de, te máa ná chi ma náyūhú cuítē ná, achí de jín yá.

³⁴ Te ni cahān yā jín de:

Jendaá cahán rī jín ró jeē jecuáa vijna, nde ná tu cana líhli, te yūhu ró jeē jñi ñayuu rohó, te unī jínu cahān rō jeē tu jíní rō ruhū, achí yá.

³⁵ Te ni cahān Pedro jín yá:

Vēsú núu cuu na jín ní, te ma cahán cuítē na jēe tu jíní na níhín, achí de.

Te suni súcuan ni cacahān ndihī tēe cáscuáha jín yá.

Jeē ni jícān tahu yā nuū huerto Getsemaní

(Mr. 14.32-42; Lc. 22.39-46)

³⁶ Yūcuán na te ni jinū Jesús jín tēe cáscuáha jín yá ñn lugar nuū naní Getsemaní. Te ni cahān yā jín de:

Yāhá-ni cucōo ró, te na quíhín rī yūcuan cácan tahu rī, achí yá.

³⁷ Te ni jeca ya Pedro jín ndindúú séhe Zebedeo cuahān yā jín de. Te ni quejéé yá cucuíhyá ndasí ni yā te cúxíí ni yā jeē quíji jñūdóho siquí yā.

³⁸ Yūcuán na te ni cahān yā jín de:

Yōhyo cúcuíhyá ni rī, te ndúcú sáha jeē cúū rī.
Yāhá condetu ró te condito ró jíin rí.

³⁹ Te ni jica ya jecu gā, te ni jecuiñī yití yá ni
jequin ya nuū yā nuū ñúhun, te ni jicān tahú yā
suhva nuū Yaā Dios:

Tátá maá ná, núu cuu te tejiyo ní jnúndóho yáha
jeē ma quíji siquī ná. Te nasūu jéē cuní maá ná, chí
jeē cuní maá ní na cóo, áchí yá.

⁴⁰ Yūcuán na te ni ndee yā nuū ndinúní tée
cáscuáha jíin yá, te ni jito ya jeē cáquixī de. Te ni
cahān yā jíin Pedro:

¿A tu ní cánda ró condito ró jíin rí vēsú ñn hora?

⁴¹ Coó ndito ni rō te cacān tahú rō jeē chindéé
ñáhán yá rohó jéē ma sáha ró cuéchi jeē coto ndee
jeneé rōhó. Chí cuní ndije ánuá rō squícu vāha ró,
te yiqui cúñu rō chí tu fuerza, achí yá.

⁴² Te ni jehēn tucu ya vuelta uū, te suhva ni jicān
tahú yā:

Tátá maá ná, te núu ma cúu cujiyo jnúndóho yáha
jeē ma ndóho ná, te na cóo jeē cuní maá ní núu
súcuan, áchí yá.

⁴³ Te ni ndee tucu ya nuū de, te ni jito ya jeē
cáquixī tucu de, chí yōhyo cájiī de māhná. ⁴⁴ Te ni
stóo ya de, te cuahān tucu ya cuacacān tahú yā
vuelta unī. Te suni jnūhun yúcuan ní cahān yā.

⁴⁵ Yūcuán na te ni ndee tucu ya nuū de jíjnáhan de,
te ni cahān yā jíin de:

Vijna te cusū rō te ndetātu ró. Te je ni quee hora,
te ruhū, Yaā ní nduu téē, natūu rí te jñī téē cáhīyo
cuéchi ruhū. ⁴⁶ Ndocuiñī jijnáhan ró, chí je vēji téē
nastúu ruhū, te quihīn yō jíin de, áchí yá.

*Jeē ní cajñi de Jesús**(Mr. 14.43-50; Lc. 22.47-53; Jn. 18.2-11)*

⁴⁷ Te sá cáhán gā yā súcuan, te ni quee-ni Judas, ñn jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujeñnu jíin táca tēe jéñnu cándacu jniñu nuū ñáyuu hebreo, ni catají tēe ún. ⁴⁸ Te Judas, tēe nástúu ya ún, je ni jēhe de ñn seña nuū tēe un jíjnáhan, chi ni achi de:

Tēe jeē téchūhu rí un cúu. Te jñi ró jíjnáhan ró, áchí de.

⁴⁹ Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya. ⁵⁰ Te ni cahān Jesús jíin de:

Amigo, ¿na jniñu vēji ró? áchí yá.

Yūcuán na te ni jinūcoo táca gā tēe ún, te ni cajñi de Jesús.

⁵¹ Te ñn tēe jeē cáhīn jíin Jesús, ni tava de espada de, te ni jehnde de sōho ñn mozo maá sūtū cujéñnu ga. ⁵² Yūcuán na te ni cahān Jesús jíin de:

Nachuvāha espada rō, chi táca jēe cájejnáhan jíin espada, suni jíin espada cuu. ⁵³ ¿Te á tu cájini rō jeē cuu cacān tahu rī nuū Tatá rī, te vijna ñúhún tají yá víhyá gā uxí uū mil ndajéhé andiví jeē jnama ruhū?

⁵⁴ Te núu súcuan, ¿te ndese cuu squícu jñūhun cáhán tutu ñi jeē cánuú ndoho rí súcuan? áchí yá.

⁵⁵ Yūcuán na te ni cahān yā jíin ñáyuu cuehē ún:

¿Te va tēe cuíhná cúu rí jeē vējicoo ró jíin espada jíin yujnu jeē jñi ró rúhū jeē súcuan. Táca quívī ni cucōo rí jíin ró jíjnáhan ró ini templo cáhnu, ni steén rī jñūhun, te tu ní cájñi ró rúhū. ⁵⁶ Te súcuan cásáha ró návāha na squícu jeē cahán tutu ñi jeē ní catee tēe ni canacani jñūhun Yaā Dios, achí yá.

Yūcuán na te ndihi tēe cáscuáha jíin yá, ni castóo de ya, ni cajinu de cuango de.

Jeē ní indichi Jesús nuū junta tēe cáscujéhnu ga
(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Te tēe ni cajni Jesús, cuango de jíin yá nuū Caifás, tēe cúu sutū cujéhnu ga. Te yūcuan cáhīn tútú tēe cástéén tutu ley jíin táca tēe jéhnu cándacu jniñu. ⁵⁸ Te Pedro chi jíca-ni ndíquín de ya, te ni jinū de patio sutū cujéhnu ga. Te ni quivī de ini patio, te ni cucōo de jíin táca policía, návāha coto de ndese coo síquī yā.

⁵⁹ Te sutū cáscujéhnu jíin táca tēe jéhnu jíin ndihi tēe cása ha junta cujéhnu ga, ni canducú de tēe cahān jnūhun yáa síquī Jesús, chi cahni de ya cácuni de. ⁶⁰ Te vēsú ni quecoo cuehē ñayuu cácahān yaá, te tu ní cánihīn de cuēchi síquī yā jeē cáhni de ya. Te jeē sándihí te ni quecoo uū testigo jeē cahān yaá síquī yā. ⁶¹ Te áchí:

Tēe yáha ní cahān de jeē cuu canu de templo Yaā Dios, te nuū uní-ni quivī te nucondichi sáha de, áchí.

⁶² Yūcuán na te ni ndocuñi maá sūtū cujéhnu ga, te ni cahān de jíin yá:

¿Naun tu cáhān cuiti rō? ¿A íyó ndāā jeē cácahān tēe yáha síquī rō? Achí de.

⁶³ Te Jesús tu ní cáhān cuiti yā. Te ni cahān maá sūtū cujéhnu ga:

Ndácu ri jniñu nuū rō jeē cahān ndāā rō cuni nahín maá Yaā Dios, Yaā técu. Cachi cají te núu máa ró cúu Cristo, Sēhe Yaā Dios, achí de jíin yá.

⁶⁴ Te ni cahān yā:

Suu ri cúu, nájnūhun cáhán rō. Te na cástūhun rí nuū rō jijnáhan ró jēē tāca quívi jeē quíji te coto ró rúhū, Yaā ní nduu tēe, condee rī lado váha Yaā iyó poder. Te coto ró jēē ndíji ri ichi ándiví jíin vícō. Achí yá.

⁶⁵ Yūcuán na te sutū cujéhnū ga ni jehnde de sahma de jeē quití ndasí ni de, te ni cahān de:

Tēe yáha chí cáhán de jnūhun ndevāha jeē quití ni Yaā Dios, chí sáha de máá de Sēhe Yaā Dios. ¿Ndé jíni ñúhún gá yō testigo núu súcuan? Chí je ni cajini ró jnúhun ndevāha cáhán de. ⁶⁶ ¿Te ndese cájeni ni rō? achí de.

Te ni cacahān tēe cuehē ún:

Cuēchi cúu jeē cahán de súcuan, te jíni ñúhún cuu de, áchí.

⁶⁷ Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā. ⁶⁸ Te ni cacahān de:

Te núu Cristo cúu ró, te cachi rō ndé ñn cúu jeē ní cani róhó, achí de.

Jeē ní cachi Pedro jeē tu jíni de ya

(Mr. 14.66-72; Lc. 22.56-62; Jn. 18.15-18, 25-27)

⁶⁹ Te níni jēē súcuan cúu, te Pedro néne de nuū quéhe ini patio. Te ni quee ñn ñahan jéjníñu vehe ún, te ni cahān ña jíin de:

Róhó chí suni ni jica ró jíin Jesús tēe Galilea, achí ña.

⁷⁰ Te máá de tu ní cáchi de, chí ni cahān de ni cajini ndíhi ñayuu:

Tu jíni rī na jnūhun cáhán rō, achí de.

⁷¹ Te ni quenda de yéhyí núu quéhe, te ni jito inga ñahan nuū de. Te ni cahān ña jíin ñáyuu cáhīn yūcuán:

Tēe yáha chi suni ni jica de jíin Jesús, tēe ñuu Nazaret, achí ña.

⁷² Te inga jíinu tu ní cáchi tucu de, chi sa ni cahān teyí de:

Tu jíiní rī tēe ún, áchí de.

⁷³ Te ni cunúu jecu gā, te ñayuu cáhīin yūcuan ní quecoo i nuū Pedro, te ni cacahān i:

Jendaá ndije jeē suni jnáhan tēe un cúu ró, chi ndijin cahán rō jeē tēe Galilea cúu ró, áchí i.

⁷⁴ Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíiní cuiti rī tēe ún, áchí de.

Te ni cana-ni líhli. ⁷⁵ Te ni nucūhun ni de jnūhun ni cahān Jesús jíin de: Nde ná tu cana líhli, te yūhu ró te cahān rō unī jíinu jeē tu jíiní rō ruhū. Te ni quenda de cuahān de, te yōhyo ni ndahyū de jeē ní cachi de jeē tu jíiní de ya.

*Jeē cuángoo de jíin yá nuū Pilato
(Mr. 15.1; Lc. 23.1-2; Jn. 18.28-32)*

27

¹ Yūcuán na te ni cundijin. Te tāca sūtū cácujuhnu jíin táca tēe jéhnū jeē cándacu jniñu nuū ñáyuu hebreo, ni casquíjnáhan de jnūhun ndese sáha de jeē cuu Jesús. ² Te ni cajihni de ya, te cuangoo de jíin yá nuū Poncio Pilato, tēe cúu gobernador.

Jeē ni jíihī Judas

³ Yūcuán na te Judas, tēe ni nastúu ya un, ní jito de jeē ní cunīhin siquī yā jeē cúu yā. Te ni jnahuhū ni de, te ni nacūaha de ocō uxī xūhun plata jeē ni níhīn de nuū sutú cácujuhnu jíin núu tāca tēe jéhnū.

⁴ Te ni cahān de jíin:

Cuēchi ni sāha ná jéē ní nastúu ná ìn tēe cuu de, te tú na cuēchi de.

Te máá sūtū un ní cacahān de:

¿Vé jítú ni ruhū? Cuēchi máá ró cúu. Achí de.

⁵ Te ni scáne Judas xūhún un ini templo. Te ni quenda de cuahān de, te ni scuéhne de máá de.

⁶ Te sutū cácujuhnu ni canastútú de xūhún un, te ni cacahān de:

Ma cúu chuhun yó xúhun yáha ini yejnū nuū cásocō ñayuu, chí xūhun jéē ni jéconā jeē cúu ìn tēe cúu, áchí de.

⁷ Yūcuán na te ni casándaā de jeē xūhun yúcuán cuaan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá. ⁸ Jeē yúcuán cúu jeē ndé vijna nání ñuhun ún Lugar Ñuhun Niñī. ⁹ Te súcuán ni squícu jnūhun ni cahān Jeremías, tēe ni nacani jnūhun Yaā Dios nde jenahán: Ni caquihin de ndihócó uxī xūhun plata, te súcuán-ni cúu ìn yāhu jeē ní casáha ñayuu Israel cuenta jeē ndeé yā nuū i. ¹⁰ Te jíin xúhun un ní cajeen de ñuhun quíxin, nájnūhun ni ndacu máá Jítóho yō Yaā Dios jniñu nuū rī. Achí Jeremías.

Jeē ní indichi Jesús nuū Pilato

(Mr. 15.2-5; Lc. 23.3-5; Jn. 18.33-38)

¹¹ Te nuū ní jinūcoo de jíin Jesús nuū gobernador, tēe cúu Pilato, te ni cajnūhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu ri cúu, nájnūhun cáhán rō.

¹² Te sutū cácujuhnu jíin tēe jéhu cándacu jniñu, ni cacahān de cuēchi siquī yā. Te tú na vé ni cáhán cuiñi yā. ¹³ Yūcuán na te ni cahān Pilato jíin yá:

¿A tu jíni ró jéē cácahān de cuehē cuēchi siquī rō? achí de.

¹⁴ Te tu ní cáhán cuiti yā ni ñn jnūhun jíin de. Te nahán ní naa ni gobernador jeē tú na vé ni cáhán yā jíin de.

Jeē ní cundaā jeē cúū yā

(Mr. 15.6-20; Lc. 23.13-25; Jn. 18.38-19.16)

¹⁵ Te íyó costumbre gobernador jeē quivī víco un siaá de ñn tēe íne vecāa, núu na-ni tēe cáconi ñayuu. ¹⁶ Te suu quivī un íyó ñn tēe íne vecāa, nání de Barrabás, te je ni jitē núu jnūhun jeē ni sáha de cuēchi xeēn. ¹⁷ Te nuū ní candutútú ñayuu, te ni cahān Pilato jíin i:

¿Ndé tēe cáconi rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

¹⁸ Súcuán ni cahān de chí cúní de siaá de Jesús. Chí je ni jecūhun ni de jeē ní cacucuésún ni táca sūtū un cájito de ya, te jeē yúcuán ní quijicoo jíin yá nuū de.

¹⁹ Te níní jéē néne Pilato silla nuū sándaā de jniñu, te ñasihí de ni tají ña jnūhun nuū de: Ma quivī nduu rō jíin ñayuu siquī tēe ndaā jiñā, chí yōhyo ni siūhu jéni ruhū cuni jeē siquí de, áchí ña.

²⁰ Te sūtū cácujuhnu jíin táca tēe jéhnu, ni cascáhán de ñayuu jeē na cácan i jeē siaá de Barrabás, te na cúū Jesús. ²¹ Yūcuán na te ni cajnūhún tucu gobernador:

Jeē uú de, ¿ndé ñn de cáconi rō jeē siaá rī? achí de.

Te ni cacahān i:

Siaá ni Barrabás, achí i.

²² Te ni cajnūhún Pilato:

Núu súcuan te ¿ndese cáconi rō jeē sáha ri jíin Jesús, tēe cúu Cristo? achí de.

Te ni cacahān ndihi i:

Cata caa ní de jicā cruz, na cúu de, áchí i.

²³ Yūcuán na te ni cahān Pilato:

¿Na cuēchi ni sáha de núu súcuan? áchí de.

Te ñayuu un ní cacana jee ndasí i:

Cata caa ní de jicā cruz, na cúu de, áchí i.

²⁴ Te ni jini Pilato jeē tu cúndeyí de jíin ñáyuu, chi sa víhyá gā cácuvaā i. Te ni ndacu de jniñu jeē na quíji ndute, te ni nandahá de nuū ñáyuu cuehē ún. Te ni cahān de:

Jeē nándahá rí yāha cúu seña jeē tú na cuēchi condee síquī rī jeē cúu tēe vāha yāhá. Chi síquī maá ró jijnáhan ró na cóndee. Achí de.

²⁵ Te ni cacahān ndihi ñayuu:

Suu síquī maá ná jíin síquī séhe ná na cóndee cuēchi jeē cúu de, áchí i.

²⁶ Yūcuán na te ni siaá de Barrabás. Te ni ndacu de jniñu jeē na cáni tácá soldado un Jesús, jíin jēe cáta caa de ya jicā cruz.

²⁷ Yūcuán na te soldado un cuango de jíin Jesús ini palacio. Te ni cacana de ndihi jnáhan de ni candutútú núu yā. ²⁸ Te ni caquenehen de sahma ya, te ni cachuhun de ya ñin sahma cuehé jeē cúu sahma rey. ²⁹ Te ni casáha de ñin corona iñu, ni cachuhun de xinī yā. Te ni cachihi de ndaha váha ya ñin yujnu jeē nájnūhun bastón. Te ni casácatā de nuū yā, chi ni cajecuiñī yití de, casáha de jeē chiñúhún de ya.

Nacā jeē váha rey cúu Rey ñayuu hebreo, achí de.

³⁰ Te ni catesihí de nuū yā. Te ni caquihin de yujnu jeē ní cachihi de ndaha ya, te ni cacani de

xinī yā. ³¹ Te nuū ní cuu ni casácatā de nuū yā, te ni catava de sahma cuehé un, te ni canachuhun de ya sahma máá yá. Te cuango de jíín yá jeē cata caa de ya jicā cruz.

Jeē ní cacata caa de ya jicā cruz

(Mr. 15.21-32; Lc. 23.26-43; Jn. 19.17-27)

³² Te nuū ní quendacoo soldado un jíín yá, te ni canajnáhan de jíín ñn tēe ñuu Cirene, naní de Simón. Te ni catejníñu de tēe un jéē cóndiso de cruz yā.

³³ Te ni jinūcoo de ñn lugar nuū naní Gólgota, jeē cuní cahān Lugar Yiqui Xíní. ³⁴ Te ni cajēhe de vino jeē ni sácā núu jíín ñn jeē uvuá jeē cóho ya. Te nuū ní jito ndee ya, te tu ní cúní yā coho ya.

³⁵ Te nuū ní cuu ni cacata caa de ya jicā cruz, te ni casáha de sorteo jeē siquī ndese nihīn ñn ñn de sahma ya. Te súcuan ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo siquī ndese nihīn ñn ñn de sahma ri, achí yā, achí tutu. ³⁶ Yūcuán na te ni cacucōo de yūcuan jéē cóto de nde cuu yā. ³⁷ Te ni catee de ñn jnūhun xinī cruz yā jeē cahán na siquī ni jíhī yā: Yāha cúu Jesús, Rey ñayuu hebreo, achí.

³⁸ Te suni ni cacata caa de uū tēe cuíhná núu uū gā cruz, ñn de lado váha ya, te inga de lado jecó yá. ³⁹ Te ñayuu cáyāha yūcuan cáscuicó i xinī i, te cácahān neé i:

⁴⁰ Róhó chí cáhán rō jeē cánu rō templo cáhnu, te nuū uní quivī te nacani ró. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jíicā cruz vii, achí i.

⁴¹ Te sutū cácujeñnu, jíin tée cástéén tutu ley, jíin tée grupo fariseo, jíin tée jéñnu jíjnáhan de, suni súcuan ni cacahān catá de, te áchí de cácahān maá de:

⁴² Núu inga ñayuu ni jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de.

⁴³ Ni candíje de Yaā Dios, te na jnáma ya de vijna te núu cúndáhú ni yā de, chi ni cahān de jeē cúu de Sēhe ya. Achí de jíjnáhan de.

⁴⁴ Te tēe cuíhná jeē cándita caa xiin ya, suni súcuan ni cacahān neé de.

Jeē ni jíhī Jesús

(Mr. 15.33-41; Lc. 23.44-49; Jn. 19.28-30)

⁴⁵ Te nuū ní cuu cahuxī uū, te ni cunee ní cáhnu nde cahunī. ⁴⁶ Te nájñūhun cahunī, te ni cana jee Jesús:

Elí, Elí, ¿lama sabactani? achí yá. Te jñūhun un cúní cahān: Yaā Dios maá ná, Yaā Dios maá ná, ¿naun ni stóo ní sáña?

⁴⁷ Te sava ñayuu cáhīin yūcuan ní cajini i jñūhun ún, te ni cacahān i:

Tēe yáha cána de xinī Elías, tēe ni nacani jñūhun Yaā Dios jenahán, áchí i.

⁴⁸ Te ni jinu-ni ñn tēe, ni jequihin de ñn cachī, te ni chundaji de nuū vinagre iyá. Te ni tee de xinī ñn yujnu, te ni tee de yuhu ya jeē coho ya. ⁴⁹ Te sava ga de ni cacahān:

Condetu ró, na cóndēhe yó núu quiiji Elías jnama de chí tuú, áchí de.

⁵⁰ Te Jesús ni cana jee ya inga jínu, te ni jíhī-ni ya. ⁵¹ Te sahma ndíta caa jeē ndihyú cuarto iñ ini templo cáhnu, ni ndatā-ni sava sava nde xinī te nde

nuū jehé. Te ni jnāa, te ni catahū sáva toto. ⁵² Te ni cananune yaū nuū yíndūji ndīyi. Te cuehē ndīyi jeē ní cacandíje i Yaā Dios, ni canatecu i. ⁵³ Te nuū ní natecu Jesús, te ni quendacoo i nuū yíndūji i. Te ni ndīvicoo i ini ñuu iī Jerusalén, te cuehē ñayuu ni cajito nuū i.

⁵⁴ Te ná ni jihī Jesús, te tēe cúu capitán jíin tēe cáhīn jíin de jeē cándito de nde cuu yā, ni cajini de jeē ni jnáa, jíin táca gá jniñu ní cuu. Te yōhyo ni cayūhú de, te ni cacahān de:

Jendaá ndije jeē Séhe Yaā Dios cúu tēe yáha, áchí de.

⁵⁵ Te yūcuan cáhīn cuehē ñahan, cándēhe jícá ña. Te suu ñahan un ní candiquīn ña Jesús nde Galilea, vējicoo ña cájejniñu ña nuū yā. ⁵⁶ Te unī ñahan un cácuu María ñuu Magdala, jíin María naná Jacobo jíin José, jíin naná ndíndúú séhe Zebedeo.

Jeē ní quindūji Jesús

(Mr. 15.42-47; Lc. 23.50-56; Jn. 19.38-42)

⁵⁷ Te nuū ní ini quiṽi ún, te ni quee ñn tēe cúca, nání de José, te tēe ñuu Arimatea cúu de. Te suni tēe ni scuáha jíin Jesús cúu de. ⁵⁸ Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de. ⁵⁹ Te José ni quihin de yiqui cúñu yā, te ni chusúcun de ñn sahma cuitá íyó ndoo. ⁶⁰ Te névaha de ñn yaū jeē ní caan jeé jícā ñn cava, nuū ná tu quindūji ndīyi. Te yūcuan ní chindūji de ya. Te ni jesi de ñn yuū cáhnu yuhu yáú un, te cuahān de. ⁶¹ Te María ñuu Magdala, jíin inga María, cáyúcú ña ichi núú nuū yíndūji ya.

Jeē ní cacondito soldado nuū yíndūji ya

⁶² Te ni cuu t̄acá jniñu yáha máá quiv̄i jeē casátūhva ñayuu jeē quiji quiv̄i ndétātú. Yūcuán na te ni cundijin maá quiv̄i ndétātú. Te sutū cácujuhnu jíin tée grupo fariseo ni jengoo de nuū Pilato. ⁶³ Te ni cacahān de:

Cánucūhun ni na jēē nde na técu tēe stáhú néé un te ni cahān de jeē nátecu de nuū uní quiv̄i. ⁶⁴ Núu súcuán te ndacu ní jniñu na cóto vāha t̄acá soldado yuhu yáú un nde núu ni yāha unī quiv̄i. Chi núu tuú te sanaa te quijicoo tēe ni cascuáha jíin de, te tava cuihná de nd̄iyi ún jecuáā, quingoo de jíin. Yūcuán na te cachi de nuū ñayuu jeē ní natecu tēe ún. Te cáhú gá cuu jnūhun stáhú yúcuán vēsú jeē xihna ñúhún. Achí de.

⁶⁵ Te ni cahān Pilato:

Yāha cáhiyo soldado. Cuángoo jíin de, te sácutú váha ró yuhu yáú un, te coto vāha ró, núu ndese vāha ga cuu sáha ró. Achí de.

⁶⁶ Te cuangoo de, te ni casácutú de yuū jeē ndihyú yuhu yáú nuū ȳindūji ya, te ni cast̄in n̄ihin de. Te ni castóo de t̄acá soldado un cándito.

Jeē ní natecu Jesús

(Mr. 16.1-8; Lc. 24.1-12; Jn. 20.1-10)

28

¹ Te ni yāha quiv̄i ndétātú un, te ni cundijin quiv̄i domingo. Te María ñuu Magdala jíin inga María un, ní jecondēhé ña nuū ní ȳindūji Jesús. ² Yūcuán na te ñin sanaa-ni te ni jnāa n̄ihin ndasí. Chi ñin ndajéhé maá Jítoho yō Yaā Dios ni cuun ya ichi ándiví, ni quee ya nuū ní ȳindūji Jesús. Te ni stáa ya yuū ndihyú yuhu yáú un, te ni cucōo ya siquī.

³ Te ndíndēe núu yā nájñūhun taja, te sahma ñúhún

ya yaa quiyi nájnūhun yuhvā volcán. ⁴ Te soldado cándito yūcuan ní quisi i de jeē cáyūhú de cájito de ya. Te ni cacuu ndiyi de. ⁵ Te ni cahān ndajéhé jíin ndindúú ñahan ún:

Ma yūhu ró, chí jíin rī jeē vécondēhe ró Jesús, Yaā ni jíhī jicā cruz. ⁶ Tuá yā yāhá, chí je ni natecu yā, nájnūhun ni cahān yā. Nehen condēhe ró nuū ní cachindūji de ya. ⁷ Te yachī quingoo ró, te cachi rō nuū tée cáscuáha jíin yá jeē ní natecu yā. Te xīhna gā maá yá jinū Galilea, te sáá te najinūcoo de. Te yūcuán coto de nuū yā. Achi rō na cúni de. Je ni castūhun rí nuū rō, achí ndajéhé.

⁸ Te ni quendacoo ña nuū ní yindūji ya, te yachī cuangoo ña. Te cáyūhú ña, te suni yōhyo cácusī ni ña. Te ni cajinu ña cuacastūhún ña nuū tée cáscuáha jíin yá. ⁹ Te níni cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñúhún ña ya. ¹⁰ Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tācá hermano rī, tēe ni cascuáha jíin rí, jeē na núngoo de nde Galilea, te yūcuán coto de nuū rī. Achí yá.

Jnūhun ní cacahān soldado

¹¹ Te níni cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujuhnu tācá jniñu jeē ní cuu. ¹² Te sutū cácujuhnu ni candutútú de nuū táca tée jehnu cándacu jniñu, te ni casquíjnáhan de jnūhun. Yūcuán na te ni cajēhe de cuehē xūhun núū soldado jijnáhan. ¹³ Te ni cacahān de jíin:

Cahān rō jijnáhan ró jeē tée cáscuáha jíin de ni quijicoo jecuáa, te ni catava cuīhna ndíyī un níni cáquixī rō, achi rō. ¹⁴ Te núu na cúni gobernador jnūhun yáha, te máá rí quiscahán rī de, návāha tú nihīn rō castigo jijnáhan ró. Achí de.

¹⁵ Te soldado un ní caquihin de xūhún un, te ni cacachi de nájnūhun ni cacahān jíin de. Te nde vijna chi súcuan cácahān ñayuu hebreo nájnūhun ni cacahān soldado un.

Jeē ní tejniñu ya de nacani de jnūhun

(Mr. 16.14-18; Lc. 24.36-49; Jn. 20.19-23)

¹⁶ Te ndihúxí ñn tēe ni cascuáha un cuánungoo de nde Galilea, nde yucu nuū ní cachi Jesús jeē quíngoo de. ¹⁷ Te nuū ní cajito de nuū yā, te ni cachiñúhún de ya. Te sava de tu cácañdije vāha de jeē maá yá cúu. ¹⁸ Te ni quee ya nde nuū de, ni cahān yā jíin de:

Je ni jēhe Tátá rī ndihī poder nuū rī jeē ndácu ri jniñu andiví jíin ñáyiví. ¹⁹ Núu súcuan te cuángoo nuū ñayuu tācá nación, te stéén rō jnūhun ri nuū i návāha na cándije i. Te scuándute ró i jeē ní cacandije i máá Tátá jíin Séhe jíin Espíritu Santo. ²⁰ Te stéén rō nuū i jeē na cuátáhú i tācá jniñu ní ndacu ri nuū rō. Te cocuhun ni rō jeē maá rí íne ri jíin ró ñí cáni nde quiví jínu ñayiví. Achí yá. Te ni cuu. Amén.

Nuevo Testamento en mixteco
New Testament in Mixtec, Atatláhuca (MX:mib:Mixtec,
Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9665e546-39d0-5bd5-8b10-38916a94951f